



Early European Books, Copyright © 2010 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
Ald.1.4.7



Early European Books, Copyright © 2010 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
Ald.1.4.7





Early European Books, Copyright © 2010 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
Ald.1.4.7




Early European Books, Copyright © 2010 ProQuest LLC.

Images reproduced by courtesy of the Biblioteca Nazionale Centrale di Firenze.

Ald.1.4.7





Early European Books, Copyright © 2010 ProQuest LLC.

Images reproduced by courtesy of the Biblioteca Nazionale Centrale di  
Firenze.

Ald.1.4.7




Early European Books, Copyright © 2010 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
Ald.1.4.7



Alb. 1/4

6483



*Ex Libris Joannis Nenaini*


1874



BIBLIOTECA CENTRALE FIRENZE  
INI  
INIZIO  
NE









TVSCVLANARVM QVAESTIO-  
NUM CICERONIS AD  
M. BRVTVM LIBRI V.

*Cum scholijs Pauli Manutij.*



CORRIGENTE PAVLO MANV-  
TIO ALDI FILIO.

VENETIIS, M. D. XLVI.



inter  
Flam  
dio  
mibi  
sophi  
set :  
inuer  
ab ill  
in qu  
dome  
muy  
mello  
loque  
ualue  
nata



M. TVLLII CICERONIS TV SCVLA=  
 NARVM QVAESTIONVM AD  
 M. BRVTVM LIBER PRI=  
 MV S DE CONTEM=  
 NENDA MORTE.

C Vm defensionū laboribus, sena  
 torijsq; muneribus aut omni=  
 no, aut magna ex parte essem  
 aliquando liberatus, retuli me  
 Brute, te hortante maxime, ad  
 ea studia, quæ retēta animo, re=  
 missa tēporibus, lōgo interuallo  
 intermissa reuocaui. & cū omniū artium, quæ ad re=  
 etam uiuendi uiam pertinerent, ratio & disciplina stu=  
 dio sapientia, quæ philosophia dicitur, cōtineretur: hoc  
 mihi latinis literis illustrandum putauī: nō quia philo=  
 sophia græcis & literis, & doctōribus percipi non pos=  
 set: sed meū iudiciū semper fuit, omnia nostros aut  
 inuenisse per se sapientius, quā Græcos; aut accepta  
 ab illis, fecisse meliora, quæ quidem digna statuissent,  
 in quibus elaborarēt. nā mores, & instituta uitæ, resq;  
 domesticas, ac familiares nos profeclo & melius tue=  
 mur, & lautius. rem uero publicā nostri maiores certe  
 melioribus temperauerūt & institutis, & legibus. quid  
 loquar de re militari? in qua cū uirtute nostri multū  
 ualuerunt, tum plus etiam disciplina. iam illa, quæ  
 natura, non literis, affecuti sunt, neque cum Græ=

ad ij



T V S C. Q V A E S T.

cis, neque ulla cum gente sunt conferenda . quæ enim tanta gravitas, quæ tanta constantia, magnitudo animi, probitas, fides, quæ tam excellens in omni genere uirtus in ullis fuit, ut sit cum maioribus nostris comparanda ? doctrina Græcia nos, & omni literarum genere superabat . in quo erat facile uincere non repugnantes . nam cum apud Græcos antiquissimum è doctis sit genus poetarum, si quidem Homerus fuit, & Hesiodus ante Romam conditam, Archilochus regnante Romulo : serius poeticam nos accepimus : annis enim ferè C C C C C X post Romam conditã Liuius fabulã dedit, C. Claudio Cæci filio, M. Tuditana Consulibus, anno ante natũ Ennium : qui fuit maior natu, quàm Plautus, & Neuius . sero igitur à nostris poetæ uel cogniti, uel recepti . quanquam est in Originibus, solitos esse in epulis canere conuiuas ad tibicinem de clarorũ hominum uirtutibus . honorem tamen huic generi non fuisse, declarat oratio Catonis, in qua obiecit ut probrum Marco Nobiliori, quod is in prouinciam poetas duxisset : duxerat autem Consul ille in Aetoliam, ut scimus, Ennium . quo minus ergo honoris erat poetis, eo minora studia fuerunt . nec tamen si qui magnis ingenijs in eo genere extiterunt, non satis Græcorum gloriæ responderunt . an censemus, si Fabio nobilissimo homini laudi datum esset, quod pingeret, nõ multos etiam apud nos saturos Polycletos, & Parrhasios fuisse ? hos nos alit artes ; omnesq; incenduntur ad studia gloria ; iacentq; ea semper, quæ apud quosq; improbatur . summam eruditionem Græci sitam censebant in neruorũ, uocumq; cantibus . igitur & Epaminodas, princeps meo



iudicio Græcia, fidibus præclare cecinisse dicitur: The-  
 mistoclesq; aliquot ante annis, cū in epulis recusasset ly-  
 rā, habitus est indoctior. ergo in Græcia musici florue-  
 runt, discebantq; id omnes, nec, qui nesciebat, satis ex-  
 cultus doctrina putabatur. in summo apud illos honore  
 geometria fuit: itaque nihil mathematicis illustrius. at  
 nos metiendi, ratiocinandiq; utilitate huius artis termi-  
 nauimus modum. at contra oratorem celeriter comple-  
 xi sumus, nec eum primo eruditum, aptum tamen ad  
 dicendum, post autem eruditum: nam, Galbā, Afri-  
 canum, Lælium, doctos fuisse, memoriæ traditum est,  
 studiosum autem eū, qui hos ætate anteebat, Catonem,  
 post uero Lepidum, Carbonem, Gracchos, deinde ita  
 magnos nostram ad ætatem, ut non multum, aut nihil  
 omnino Græcis cederetur. philosophia iacuit usque ad  
 hanc ætatem, nec ullum habuit lumen literarū latina-  
 rum: quæ illustranda, & excitanda nobis est, ut, si oc-  
 cupati profuimus aliquid ciuibus nostris, profimus etiā,  
 si possumus, otiosi. in quo eo magis nobis est elaboran-  
 dum, quod multi iam esse latini libri dicuntur scripti in  
 considerate ab optimis illis quidem uiris, sed nō satis eru-  
 ditis. fieri autem potest, ut recte quis sentiat, & id, quod  
 sentit, polite eloqui non possit. sed mandare quenquā  
 literis cogitationes suas, quæ eas nec disponere, nec illus-  
 trare possit, nec delectatione aliqua allicere lectorem,  
 hominis est intemperanter abutentis & otio, & lite-  
 ris. itaque suos libros ipsi legunt cum suis, nec quisquam  
 attingit, præter eos, qui eandem licentiam scribendi si-  
 bi permitti uolunt. quare si aliquid oratoriæ laudi  
 nostra attulimus industria, multo studiosius philoso-



T V S C. Q V A E S T.

phia fontes aperiemus, è quibus etiam illa manabant. sed ut Aristoteles, uir summo ingenio, scientia copia, cum motus esset Isocratis rhetoris gloria, dicere etiam coepit adolescentes docere, & prudentiam cū eloquentia iungere: sic nobis placet nec pristinū dicendi studiū deponere, & in hac maiore, & uberiore arte uersari: hanc enim perfectā philosophiam semper iudicauī, quæ de maximis quæstionibus copiose posset, ornateq; dicere. in quam exercitationem ita nos studiose operam dedimus, ut iam etiam scholas Græcorū more habere auderemus: ut nuper tuum post discessum in Tusculano, cum essent complures mecum familiares, tentauī quid in eo genere possem. ut enim antea declamabatā causas, quod nemo me diutius fecit: sic hæc mihi nunc senilis est declamatio. ponere iubebā de quo quis audire uellet: & id aut sedens, aut ambulans disputabam. itaque dierum quinque scholas, ut Græci appellant, in totidem libros contuli. fiebat autem ita, ut, cum is, qui audire uellet, dixisset quid sibi uideretur, tum ego contra dicerem: hæc est enim, ut scis, uetus, & Socratica ratio contra alterius opinionem differendi: nam ita facillime, quod uerissimillimum esset, inueniri posse Socrates arbitrabatur. sed quo cōmodius disputationes explicentur, sic eas exponā, quasi agatur res, non quasi narretur. ergo ita nascetur exordium.

A V D I T O R. Malum mihi uidetur esse mors.

M A R C V S. Iis ne, qui mortui sunt; an ijs, quibus moriendum est? A. Vtrisque. M. Est igitur miserū, quoniam malū. A. Certe. M. Ergo & ijs, quibus euenit iam, ut morerentur, & ijs, quibus euenturū



est, miseri. A. Mihi ita uidetur. M. Nemo ergo non miser. A. Prorsus nemo. M. Et quidem, si tibi constare uis, omnes, quicunque nati sunt, erunt ue, nō solū miseri, sed etiam semper miseri. nam si solos eos diceres miseros, quibus moriendum esset: neminem tu quidem eorum, qui uiuerēt, exciperes; moriendum est enim omnibus: esset tamen miseriæ finis in morte. quoniam autem etiam mortui miseri sunt, in miseriam nascimur sempiternam: necesse est enim miseros esse eos, qui centum millibus annorum ante occiderunt, uel potius omnes, quicunque nati sunt. A. Ita prorsus existimo. M. Dic quaeso, num te illa terrent, triceps apud inferos Cerberus, Coccyi fremitus, transuectio Acherontis, mento summam aquam attingens siti eneclius Tantalus? num illud, quod Sisyphus uersat

22 Saxum sudans nitendo, neque proficit hilum? fortasse etiam inexorabiles iudices Minos, et Rhadamanthus. apud quos nec te L. Crassus defendet, nec M. Antonius, nec, quoniam apud Græcos iudices res agetur, poteris adhibere Demosthenē: tibi ipsi pro te erit maxima corona causa dicenda. hæc fortasse metuis, & iccirco mortē cēses esse sempiternū malū. A. Adeo ne me delirare censes, ut ita esse credā? M. An tu hæc non credis? A. Minime uero. M. Male hercule narras. A. Cur, quaeso? M. Quia disertus esse possem, si cōtra ista dicerē. A. Quis enim nō in eiusmodi causa? aut quid negocij est, hæc poetarū et pictorū portenta cōvincere? M. Atqui pleni sunt libri philosophorū cōtra ista ipsa differētū. A. Inapte sanē: quis est enim tā excors, quē ista moueāt? M. Si ergo apud inferos miseri nō sunt,

aa iiij



TVSC. QVAEST.

ne sunt quidem apud inferos ulli. A. Ita prorsus existimo. M. Vbi ergo sunt ij, quos miseros dicis? aut quem locum incolunt? si enim sunt, nusquam esse non possunt.

A. Ego uero nusquam esse illos puto. M. Igitur ne esse quidem. A. Prorsus isto modo: Et tamen miseros ob id ipsum quidem, quia nulli sunt. M. Iam mallem Cerberum metueres, quam ista tam incōsiderate diceres. A.

Qui tandem? M. Quem esse negas, eundem esse dicis: ubi est acumen tuum? cū enim miserum esse dicis, tum eum, qui non sit, dicis esse. A. Non sum ita hebes, ut ista dicam. M. Quid dicis igitur? A. Miserum esse uerbi causa M. Crassum, qui illas fortunas morte dimiserit; miserum Cn. Pompeium, qui tanta gloria sit orbatus; omnes denique miseros, qui hac luce careant. M. Reuolueris eodem. sint enim oportet, si miseri sunt. tu autē modo negabas eos esse, qui mortui essent. si igitur non sunt, nihil possunt esse: ita ne miseri quidem sunt.

A. Non dico fortasse etiam, quod sentio. nam istud ipsum, non esse cum fueris, miserrimum puto. M. Quid miserius, quam omnino nunquam fuisse? ita, qui non dum nati sunt, quia non sunt, miseri iam sunt: Et nos ipsi, si post mortem miseri futuri sumus, miseri fuimus, antequam nati. ego autem non commemini, antequam sum natus, me miserum. tu si meliore memoria es, uelim scire, ecquid de te recordere. A. Ita iocaris, quasi ego dicam eos esse miseros, qui nati non sunt; Et non eos miseros, qui mortui sunt. M. Esse ergo eos dicis. A. Immo, quia non sunt, cum fuerint, eos miseros esse. M. Pugnantia te loqui non uides? quid enim tam pugnat, quam non modo miserum, sed



omnino quidquam esse, qui nō sit? an tu egressus porta Capena, cum Calatini, Scipionum, Seruiliorum, Metellorum sepulcra uides, miseros putas illos? A. quoniam me uerbo premis, posthac non ita dicam, miseros esse, sed tantum miseros, ob id ipsum, quia non sunt.

M. Non dicis igitur, miser est M. Crassus, sed tantum miser M. Crassus. A. Ita planē. M. Quasi nō necesse sit, quidquid isto modo pronuncies, id aut esse, aut non esse. an tu dialecticis ne imbutus quidem es? in primis enim hoc traditur. omne pronūciatum (sic enim mihi in praesentia occurrit, ut appellarem ἀξιωμα: utar post alio, si inuenero melius) id ergo est pronūciatum, quod aut uerum, aut falsum esse dicitur. cum igitur dicis, miser M. Crassus: aut hoc dicis, miser est M. Crassus; ut possit iudicari, uerum id, falsum ne sit: aut nihil dicis omnino. A. Age iam concedo non esse miseros, qui mortui sunt; quoniam extorsisti ut faterer, quī omnino non essent, eos ne miseros quidem esse posse. quid? qui uiuimus, cū moriendum sit, non ne miseri sumus? quæ enim potest in uita esse incunditas, cum dies et noctes cogitandum sit, iam iamque esse moriendū? M. Ecquid ergo intelligis, quantum mali ex humana conditione deieceris? A. quoniam modo? M. quia, si mori etiam mortuis miserum esset, infinitum quoddam et sempiternum malum haberemus in uita. nunc uideo calcem: ad quem cum sit decursus, nihil sit praeterea extimescendum. sed tu mihi uideris Epicharmi, acuti, nec insulsi hominis, ut Siculi, sententiam sequi.

A. Quam? non enim noui. M. Dicam, si poterō, latine: scis enim me graece loqui in latino sermone



T V S C. Q V A E S T.

non plus solere, quàm in græco latine. A. & recte quidem. sed quæ tādē est Epicharmi ista sententia? M.  
 » Emori nolo: sed me esse mortuum nihili æstimo.  
 A. Iam agnosco græcum. sed quoniam coegisti, ut cōcederem, qui mortui essent, eos miseros nō esse; perface, si potes, ut ne moriendum quidem esse miserū putem.  
 M. iam istuc quidem nihil negocij est: sed etiam maiora molior. A. Quo modo hoc nihil negocij est? aut quæ tandē sunt ista maiora? M. Quoniā, si post mortem nihil est mali, ne mors quidem est malū: cui proximum tempus est post mortem, in quo mali nihil esse concedis: ita ne moriendū quidem esse, malum est: id est enim, perueniendum esse ad id, quod non esse malum cōfitemur. A. Vberius ista quæso: hæc enim stenosiora prius ut confitear me cogunt, quàm ut assentiar. sed quæ sunt ea, quæ dicis te maiora moliri? M. Vt doceam, si possim, non modo malum non esse, sed bonum etiam esse mortem. A. Nō postulo id quidem, aueo tamen audire: ut enim nō efficias quod uis, tamen, mors ut malum non sit, efficies. sed nihil te interpellabo: continentem orationem audire malo. M. Quid, si te rogauero aliquid, non ne respondebis? A. Superbi id quidem esset. sed, nisi quid necesse erit, malo ne roges. M. Geram tibi morem, & ea, quæ uis, ut potero, explicabo, nec tamen quasi Pythius Apollo, certa ut sint, & fixa quæ dixerō; sed ut homunculus unus è multis probabilia coniectura sequens: ultra enim quō progrediar, quàm ut uerisimilia uideam, non habeo: certa dicent ij, qui & percipi ea posse dicunt, & se sapientes esse profitentur. A. Tu, ut ui-

de  
 eui  
 mi  
 corp  
 fieri  
 anim  
 cens  
 semp  
 magn  
 quo e  
 sica il  
 » Egre  
 Empe  
 guine  
 princip  
 rebri q  
 de, ali  
 animu  
 nomina  
 mus, &  
 tentia:  
 Zenoni  
 quæ dix  
 reliqua  
 autem  
 tionem  
 fidibus,  
 natura  
 cantu so  
 men dix



detur. nos ad audiendum parati sumus. M. Mors igitur ipsa, quæ uidetur notissima res esse; quid sit, primum est uidendum. sunt enim, qui discessum animi a corpore putent esse mortem. sunt, qui nullum censeant fieri discessum, sed unâ animum & corpus occidere, animumq; cū corpore extingui. qui discedere animum censeant, alij statim dissipari, alij diu permanere, alij semper. quid sit porro ipse animus, aut ubi, aut unde, magna dissensio est. alijs cor ipsum animus uidetur: ex quo excordes, uecordes, concordēsq; dicuntur: & Na-  
sica ille prudens bis Consul Corculum, &

» Egregie cordatus homo Catius Aeliu' Sextus.

Empedocles animum esse censet cordi suffusum sanguinem. alijs pars quædam cerebri uisa est animi principatum tenere. alijs nec cor ipsum placet, nec cerebri quandam partem esse animum: sed alij in corde, alij in cerebro dixerunt animi esse sedem, & locū. animum autem alij animam, ut ferè nostri declarant, nominari: nam & agere animam, & efflare dicimus, & animosos, & bene animatos, & ex animi sententia: ipse autem animus ab anima dictus est. Zenoni Stoico animus ignis uidetur. Sed hæc quidē, quæ dixi, cor, cerebrum, animam, ignem, uulgo: reliqua ferè singuli, ut multi ante ueteres. proxime autem Aristoxenus musicus, idemq; philosophus, intentionem ipsius corporis quandam; uelut in cantu & fidibus, quæ harmonia dicitur, sic ex corporis totius natura, & figura uarios motus cieri, tanquam in cantu sonos. hic ab artificio suo non recessit, & tamen dixit aliquid, quod ipsum quale esset, erat mul-



T V S C. Q V A E S T.

to ante & dictum, & explanatum à Platone. Xenocrates animi figuram, & quasi corpus negavit esse, uerum numerum dixit esse, cuius uis, ut iam antea Pythagoræ uisum erat, in natura maxima esset. eius doctor Plato triplicem finxit animam: cuius principatum, idest rationem, in capite, sicut in arce, posuit: & duas partes separare uoluit, iram, & cupiditatem: quas locis disclusit; iram in pectore, cupiditatem subter præcordia locauit. Dicaearchus autem in eo sermone, quæ Corinthi habitum tribus libris exponit doctorum hominum disputantium, primo libro multos loquentes facit: duobus Pherecratem quendam Phthiotam senem, quem ait à Deucalione ortum, differentem inducit, nihil esse omnino animum, & hoc esse nomen totum inane, frustra; animalia, & animantes appellari; neque in homine inesse animum, uel animam, nec in bestia; uimque omnem eam, qua uel agamus quid, uel sentiamus, in omnibus corporibus uim æquabiliter esse fusam, nec separabilem à corpore esse, quippe quæ nulla sit, nec sit quidquam nisi corpus unum, & simplex, ita figuratum, ut temperatione naturæ uigeat, & sentiat. Aristoteles longe omnibus (Platonem semper excipio) præstans & ingenio, & diligentia, cum quatuor illa genera principiorum esset complexus, è quibus omnia oriuntur; quintam quandam naturam censet esse, è qua sit mens: cogitare enim, & providere, & discere, & docere, & inuenire aliquid, & tam multa alia, meminisse, amare, odisse; cupere, timere; angere, letari; hæc & similia eorum in horum quatuor generum nullo inesse putat. quintum genus adhi-

bet  
pel  
tion  
sunt  
enim  
tura  
dam  
quod  
ram  
lima  
tentia  
A. Cu  
le no c  
mortis  
si hac q  
hoc illu  
comodi  
rū sen  
aut sit  
bram e  
reliquo  
ignis, ex  
uetur. q  
mū dica  
tem pert  
uita sen  
lam in p  
afferunt  
corporib  
sui per



bet uacans nomine, & sic ipsum animū εντελεχίαν ap-  
pellat nouo nomine, quasi quandam continuatā mo-  
tionem, & perennem. Nisi quæ me forte fugiunt, hæ  
sunt ferè omnium de animo sententiæ. Democritum  
enim, magnū quidem illum uirum, sed leuibus & ro-  
tundis corpusculis efficientem animum concursu quo-  
dam fortuito, omittamus: nihil est enim apud istos,  
quod non atomorum turba conficiat. harum sententia-  
rum quæ uera sit, deus aliquis uiderit: quæ uerisimili-  
lima, magna quæstio est. utrum igitur inter has sen-  
tentias diiudicare malumus, an ad propositum redire?  
A. Cuperem equidem utrūque, si posset: sed est diffici-  
le nō cōfundere. quare si, ut ista nō differamus, liberari  
mortis metu possumus; id agamus. sin id nō potest, ni-  
si hac quæstione animorū explicata; nunc, si uidetur,  
hoc, illud aliās. M. Quod malle te intelligo, id puto esse  
cōmodius: efficiet enim ratio, ut, quæcūque uera sit ea-  
rū sententiarū, quas exposui, mors aut malum non sit,  
aut sit bonum potius: nā si cor, aut sanguis, aut cere-  
brum est animus, certe, quoniam est corpus, interibit cū  
reliquo corpore: si anima est, fortasse dissipabitur: si  
ignis, extinguetur: si est Aristoxeni harmonia, dissol-  
uetur. quid de Dicaërcho dicā, qui nihil omnino ani-  
mū dicat esse? his sententijs omnibus nihil post mor-  
tem pertinere ad quenquam potest: pariter enim cum  
uita sensus amittitur. non sentientis autem nihil est, ul-  
lam in partem quod intersit. reliquorū sententiæ spem  
afferunt, si te forte hoc delectat, posse animos, cum è  
corporibus excesserint, in cœlum quasi in domicilium  
suū peruenire. A. Me uero delectat: idq; primū ita esse,



T V S C. Q V A E S T.

deinde, etiam si non sit, mihi tamen persuaderi uelim.  
M. Quid tibi ergo opera nostra opus est? num elo-  
quentia Platonem superare possumus? euolue diligen-  
ter eius eum librum, qui est de animo? amplius quod  
desideres, nihil erit. A. Feci mehercule, & quidem sæ-  
pius: sed nescio quo modo, dum lego, assentior; cum po-  
sui librum, & mecum ipse de immortalitate animorū  
cœpi cogitare, assensio omnis illa elabitur. M. Quid  
hoc? das ne aut manere animos post mortem, aut mor-  
te ipsa interire? A. Do uero. M. Quid, si maneant?  
A. Beatos esse cōcedo. M. Si intereant? A. Nō esse  
miseros, quoniam ne sint quidem. iam istuc coacti à te  
paulo ante concessimus. M. quo modo igitur, aut  
cur mortem malum tibi uideri dicis, quæ aut beatos nos  
efficiet animis manentibus, aut nō miseros sensu caren-  
tes? A. Expone igitur, nisi molestum est, primum  
animos, si potes, remanere post mortem: tum, si mi-  
nus id obtinebis, (est enim arduum) docebis carere o-  
mni malo mortem: ego enim istuc ipsum uereor ne ma-  
lum sit, non dico carere sensu, sed carendum esse. M.  
Auctōribus quidem ad istam sententiam, quam uis ob-  
tineri, uti optimis possumus: quod in omnibus causis  
& debet, & solet ualere plurimum: & primum qui-  
dem omni antiquitate: quæ quo propius aberat ab or-  
tu, & diuina progenie, huic melius ea fortasse, quæ  
erant uera, cernebat: itaque unum illud erat insitum  
priscis illis, quos Cæcos appellat Ennius, esse in morte  
sensum, neque excessu uitæ sic deleri hominē, ut fundi-  
tus interiret: idq; cū multis alijs rebus, tum è pontifi-  
cio iure, & ceremonijs sepulcrorum intelligi licet: quas

maxi-  
niola-  
sisset i-  
mnia i-  
gration-  
fœmini-  
neretur  
opinion-  
» Romulo  
ut fama  
deq; peri-  
tantis, e-  
natus. e-  
qui nō m-  
etiam nu-  
nō ne Les-  
à nostris  
quar, non  
tari uete-  
derat, et  
habentur,  
quare, q-  
reminiscer-  
rijs: tū den-  
non dum  
physica di-  
natura a-  
rerū non  
hijs; max-  
cesserant,



maximis ingenijs præditi nec tanta cura coluissent, nec uiolatas tam inexpiabili religione sanxissent, nisi hæc sisset in eorum mentibus, mortem non interitum esse omnia tollentem, atque delentem, sed quandā quasi migrationem, cōmutationemq; uitæ, quæ in claris uiris, & foeminis dux in cœlum solet esse, in cæteris humi retineretur, & permaneret tamen. ex hoc & nostrorum opinione

- 2) Romulus in cœlo cum dijs agit æuū,  
ut famæ assentiens dixit Ennius: & apud Græcos, indeq; perlapsus ad nos, & usque ad Oceanū Hercules, tantus, & tā præsens habetur deus. hinc Liber Semele natus. eademq; famæ celebritate Tyndaridæ fratres: qui nō modo adiutores in prælijs uictoriæ populi R. sed etiam nuncij fuisse perhibentur. quid? Ino Cadmi filia nō ne Leucothea nominata à Græcis, Matura habetur à nostris? quid? totum propè cœlum, ne plures persequar, non ne humano genere cōpletū est? si uero scrutari uetera, & ex his ea, quæ scriptores Græciæ prodiderūt, eruere coner; ipsi illi maiorum gentium dii qui habentur, hinc à nobis profecti in cœlum reperientur. quare, quorum demonstrantur sepulcra in Græcia; reminiscere, quoniam es initiatus, quæ tradantur myste-  
rijs: tū denique, quā hoc late pateat, intelliges. sed qui non dum ea, quæ multis post annis tractari cœpissent, physica didicissent, tantum sibi persuaserant, quantum natura admonente cognouerant, rationes & causas rerū non tenebant, uisis quibusdam sape mouebantur, hisq; maxime nocturnis, ut uiderentur ij, qui uita ex-  
cesserant, uiuere. ut porro firmissimum hoc afferri ui-



T V S C. Q V A E S T.

detur, cur deos esse credamus, quod nulla gens tam fe-  
ra, nemo omnium tam sit immanis, cuius mentem non  
imbuerit deorum opinio. multi de dijs praua sentiunt:  
id enim uitioso more effici solet: omnes tamē esse uim,  
& naturam diuinam arbitrantur. nec uero id collocu-  
tio hominum, aut consensus efficit: nō institutis opinio  
est confirmata, non legibus. omni autem in re consen-  
sio omnium gentium, lex naturæ putanda est. quis est  
igitur, qui suorum mortem primū non eo lugeat, quod eos  
orbatos uitæ commodis arbitretur? tolle hanc opinio-  
nem: luctum sustuleris: nemo enim moeret suo incō-  
modo. dolent fortasse, & anguntur: sed illa lugubris  
lamentatio, fletusq; moerens ex eo est, quod eum, quem  
dileximus, uitæ commodis priuatam arbitramur, idq;  
sentire. atque hæc ita sentimus natura duce, nulla ra-  
tione, nullaq; doctrina. maximum uero argumentum  
est, naturam ipsam de immortalitate animorum taci-  
tam iudicare, quod omnibus curæ sunt, & maximæ  
quidem, quæ post mortem futura sint. serit arbores,  
quæ alteri seculo prosint, ut ait Statius in Synephebis;  
quid spectans, nisi etiam postera secula ad se pertinere?  
ergo arbores seret diligens agricola, quarum afficiet  
baccam ipse nunquam: uir magnus leges, instituta,  
Remp. conferet. quid procreatio liberorum, quid  
propagatio nominis, quid adoptiones filiorum, quid tes-  
tamentorum diligentia, quid ipsa sepulcrorum monu-  
menta, quid elogia significant, nisi nos futura etiam co-  
gitare? quid illudē num dubitas, quin specimen natu-  
ræ capi deceat ex optima quaque natura? quæ est igitur  
melior in hominum genere natura, quàm eorum,

qui se n  
dos arb  
set, nisi  
uisset. n  
ea, quid  
fectos co  
men suu  
sine ma  
ad morte  
monde, li  
sed nescio  
rum quo  
mis inger  
apparet  
amens, e  
loquor de  
nobilitari  
» Afficite  
» Hic o  
merceder  
rat glori  
» Nemo me  
» Faxit  
sed quid  
lunt. qu  
in clypeo  
stri philo  
de conte  
si omnia  
ubique s



qui se natos ad homines iuuandos, tutandos, conseruandos arbitrantur? abiit ad deos Hercules. nunquā abiisset, nisi, cum inter homines esset, eam sibi uiam munisset. uetera iam ista, & religione omnium consecrata. quid in hac Rep. tot, tantosq; uiros ob Remp. interfectos cogitasse arbitramur? iisdem ne ut finibus nomen suum, quibus uita, terminaretur? nemo unquam sine magna spe immortalitatis se pro patria offerret ad mortem. licuit esse otioso Themistocli, licuit Epaminonda, licuit, ne & uetera, & externa quæram, mihi: sed nescio quo modo inhaeret in mentibus quasi seculorum quoddam augurium futurorum: idq; in maximis ingenijs, altissimisq; animis & existit maxime, & apparet facillime. quo quidem dempto, quis tam esset amens, qui semper in laboribus, & periculis uiueret? loquor de principibus. quid poetæ? non ne post mortem nobilitari uolunt? unde ergo illud?

- » Aspicite d ciues senis Ennij imaginis formam.  
 » Hic uestrum panxit maxima facta patrum.  
 mercedem gloriæ flagitat ab ijs, quorum patres affecerat gloria. idemq;

- » Nemo me lacrymis decoret, nec funera fletu

- » Faxit: cur? uolito uiuus per ora uirum.

sed quid poetas? opifices post mortem nobilitari uolunt. quid enim Phidias sui similem speciem inclusit in clypeo Mineruæ, cum inscribere non liceret? quid nostri philosophi? non ne in his ipsis libris, quos scribunt de contemnenda gloria, sua nomina inscribunt? quod si omnium consensus, naturæ uox est; omnesq; qui ubique sunt, consentiunt esse aliquid, quod ad eos per-



tineat, qui è uita cesserunt: nobis quoque idē existimā-  
dum est. & si, quorū aut ingenio, aut uirtute animus  
excellit, eos arbitramur, quia natura optima sint, cer-  
nere naturæ uim maxime: uerisimile est, cum optimus  
quisque maxime posteritati seruiat, esse aliquid, cuius is  
post mortem sensum sit habiturus. sed ut deos esse na-  
tura opinamur; qualesq; sint, ratione cognoscimus: sic  
permanere animos arbitramur consensu nationum o-  
mnium; qua in sede maneant, qualesq; sint, ratione  
discendum est. cuius ignoratio finxit inferos, easq; for-  
midines, quas tu contemnere non sine causa uideba-  
re: in terram enim cadentibus corporibus, hisq; humo  
tectis, ex quo dictum est humari, sub terra censebant  
reliquam uitam agi mortuorum. quam eorum opi-  
nionem magni errores consecuti sunt. quos auxerunt  
poetæ: frequens enim confessus theatri, in quo sunt  
mulierculæ, & pueri, mouetur audiens tam grande  
carmen:

- » Adſū, atq; aduenio Acherōte uix uia alta, atq; ardua,  
» Per speluncas saxiſ ſtructas aſperis, pendentibus,  
» Maximis: ubi rigida conſtat craſſa caligo inferum.  
tātūmq; ualuit error, qui mihi quidem iam ſublatus uī-  
detur, ut corpora cremata cum ſcirent, tamen ea fieri  
apud inferos fingerent, quæ ſine corporibus nec fieri  
poſſent, nec intelligi: animos enim per ſe ipſos uiuentes  
non poterant mente complecti: formam aliquam, figu-  
ramq; quærebāt. inde Homeri tota uerba: inde ea quæ  
meus amicus Appius uerbo uertit ita faciebat: inde in ui-  
cinea noſtra Auerni lacus,  
» Vnde animæ excitantur obſcura umbra, aperto hoſtio

» Alti-  
has ta-  
gna, n-  
num a-  
terant  
ingenij  
conſue-  
tot ſecu-  
Phereci  
piternos  
hanc op-  
firmam  
tenuit n-  
plina, tu-  
niguit P-  
tur. ſed  
non ſerē  
ptionibus  
cognoſce-  
tum Ar-  
thagore  
non ſolū  
etiā attu-  
hanc tot-  
tu, cum  
ris ē err-  
ei facias  
iſtis uer-  
cum eor-  
bitamur



» Alti Acherontis, falso sanguine imagines mortuorum .  
 has tamen imagines loqui uolūt : quod fieri nec sine lin-  
 gua, nec sine palato, nec sine faucium, laterum, pulmo-  
 num ui, & figura potest : nihil enim animo uidere po-  
 terant : ad oculos omnia referebant . magni autē est  
 ingenij reuocare mentem à sensibus, & cogitationem à  
 consuetudine abducere. itaque, credo equidem etiā alios  
 tot seculis disputasse de animis, sed, quod literis extet,  
 Pherecides Syrus primū dixit animos hominū esse sem-  
 piternos. antiquus sanē : fuit. n. meo regnante gentili.  
 hanc opinionem discipulus eius Pythagoras maxime cō-  
 firmavit : qui cum superbo regnāte in Italiā uenisset,  
 tenuit magnam illam Græciam cum honore, & disci-  
 plina, tum etiam auctoritate : multaq; secula postea sic  
 uiguit Pythagoreorum nomen, ut nulli alij docti uiderē-  
 tur. sed redeo ad antiquos. rationem illi sententiæ suæ  
 non ferē reddebant, nisi quid erat numeris, aut descri-  
 ptionibus explicandū. Platonem ferunt, ut Pythagoreos  
 cognosceret, in Italiam uenisse, et in ea cū alios multos,  
 tum Architam, Timæumq; cognouisse, & didicisse Py-  
 thagorea omnia ; primumq; de animorum eternitate  
 non solū sensisse idem, quod Pythagoras, sed rationem  
 etiā attulisse. quam, nisi quid dicis, pratermittamus, &  
 hanc totam spem immortalitatis relinquamus. A. An  
 tu, cum me in summam expectationem adduxeris, dese-  
 ris ? errare mehercule malo cū Platone, quem tu quan-  
 ti facias scio, & quem ex tuo ore admiror, quā cum  
 istis uera sentire. M. Maeste uirtute : ego enim ipse  
 cum eodem ipso nō inuitus errauerim . num igitur du-  
 bitamus, an, sicut pleraque, sic & hoc ? quanquā hoc



TVSC. QVAEST.

quidem minime . persuadent enim mathematici, terrā  
in medio mundi sitam, ad uniuersi cœli cōplexū, quasi  
puncti instar obtinere, quod κέντρον illi uocant : eam  
porrò naturam esse quatuor omnia gignentium corpo=  
rum , ut quasi partita habeant inter se, & diuisa mo=  
menta ; terrena & humida suapte nutu & suo pon=  
dere ad pares angulos in terram , & in mare feran=  
tur ; reliquæ duæ partes , una ignea , altera animalis,  
ut illæ superiores in medium locum mundi gravitate fe=  
rantur , & pondere, sic hæ sursum rectis lineis in cœ=  
lestem locum subuolent, siue ipsa natura superiora ap=  
petente , siue quoddà grauioribus leuiora natura repel=  
lantur . quæ cum consent, perspicuum debet esse, ani=  
mos , cum è corpore excefferint , siue illi sint animales,  
id est spirabiles , siue ignei , sublime ferri . si uero aut  
numerus quidam sit animus , quod subtiliter magis ,  
quàm dilucide dicitur ; aut quinta illa nō nominata ma=  
gis , quàm non intellecta natura : multo etiam inte=  
griora ac puriora sunt , ut à terra longissime se effe=  
rant . horum igitur aliquid animus est, ne tam uegeta  
mens aut in corde , cerebro'ue, aut in Empedocleo san=  
guine demersa iaceat. Dicæarchum uero cum Aristoxe  
no æquali, et condiscipulo suo, doctos sanè homines, omit=  
tamus : quorum alter ne condoluisse quidem unquam  
uidetur , qui animum se habere non sentiat : alter ita  
delectatur suis cantibus , ut eos etiam ad hæc transfer=  
re conetur . Harmoniam autem ex interuallis sonorum  
nosse possumus, quorum uaria compositio etiam harmo=  
nias efficit plures : membrorum uero situs, & figura cor=  
poris uacās animo quam possit harmoniam efficere, nō

uide  
hac n  
ne en  
71 Quam  
illam  
leuior  
tamen  
est ani  
rum qu  
tur, ex  
deri uic  
enim fo  
perant  
siue per  
magis  
rum pat  
qui est  
derior  
sum, at  
pora m  
ardore  
mus eius  
sum, et  
cius, m  
tate con  
milis :  
omne c  
guntur  
pter ex  
rauit d



uideo . sed hic quidem , quamuis eruditus sit , sicut est ,  
hæc magistro concedat Aristoteli , canere ipse doceat : be-  
ne enim illo prouerbio Græcorum præcipitur ;

» Quam quisque norit artem , in hac se exerceat .

illam uero funditus eijciamus indiuiduorum corporū ,  
leuium , & rotundorum concursiōem fortuitam : quā  
tamen Democritus concalescētā , & spirabilem , id  
est animalem esse uoluit . is autem animus , qui si est ho-  
rum quatuor generum , ex quibus omnia constare dicū-  
tur , ex inflammata anima constat , ut potissimum ui-  
deri uideo Panatio , superiora capeſſat necesse est : nihil  
enim habent hæc duo genera proni , & supera semper  
petunt . ita , siue dissipantur procul à terris , id euenit ;  
siue permanent , & conseruant habitum suum , hoc etiā  
magis necesse est ferantur ad cælum , & ab his per-  
rumpatur , & diuidatur crassus hic & concretus aer ,  
qui est terræ proximus : calidior est enim , uel potius ar-  
dentior animus , quā est hic aer , quem modo dixi cras-  
sum , atque concretum . quod ex eo sciri potest , quia cor-  
pora nostra terreno principiorum genere confecta ,  
ardore animi concalescunt . accedit , ut eo facilius ani-  
mus euadat ex hoc aere , quem sæpe iam appello cras-  
sum , eumq; perrumpat , quod nihil est animo uelo-  
cius , nulla est celeritas , quæ possit cum animi celeri-  
tate contendere . qui si permanet incorruptus , suiq; si-  
milis : necesse est ita feratur , ut penetret , & diuidat  
omne cælum hoc , in quo nubes , imbres , uentiq; co-  
guntur , quod & humidum , & caliginosum est pro-  
pter exhalationes terræ . quam regionem cum supe-  
rauit animus , naturamq; sui similem contigit , &



T V S C. Q V A E S T.

agnouit : iunctus ex anima tenui, & ex ardore solis te-  
perato, ignibus insistit, & finem altius se efferendi fa-  
cit: cum enim sui similem & leuitatem, & calorem a-  
deptus est, tanquam paribus examinatus ponderibus,  
nullam in partem mouetur; eaq; ei demum naturalis est  
sedes, cum ad sui simile penetravit, in quo nulla re egēs  
aletur, & sustentabitur iisdem rebus, quibus astra su-  
stentantur, & aluntur. cumq; corporis facibus inflam-  
mari soleamus ad omnes ferè cupiditates, eoq; magis in-  
cendi, quòd ijs æmulemur, qui ea habeant, quæ nos ha-  
bere cupiamus: profecto beati erimus, cum, corpori-  
bus relictis, & cupiditatum, & æmulationum erimus  
expertes: quodq; nunc facimus, cum laxati curis sumus,  
ut spectare aliquid uelimus, & uisere; id multo tum  
faciemus liberius, totosq; nos in contemplandis rebus,  
perspiciendisq; ponemus; propterea quòd et natura in-  
est mentibus nostris insatiabilis quædā cupiditas ueri ui-  
dendi, & oræ ipsæ locorum illorum, quòd perueneri-  
mus, quo faciliorem nobis cognitionem rerum cœlesti-  
um, eo maiorem cognoscendi cupiditatem dabunt: hæc  
enim pulchritudo etiam in terris patritam illam, & aui-  
tam, ut ait Theophrastus, philosophiam cognitionis cu-  
piditate incensam excitauit. præcipue uero fruentur ea  
qui tum etiam, cum has terras incolentes circūfusi erāt  
caligine, tamen acie mentis dispicere cupiebant. etenim  
si nunc aliquid assequi se putant, qui hostium Ponti ui-  
derunt, & eas angustias, per quas penetravit ea, quæ  
est nominata

- » Argo, quia Argiui in ea delecti uiri
- » Vecti petebant pellem inauratam arietis;



aut ij, qui Oceani freta illa uiderunt,  
 » Europam Libyamq; rapax ubi diuidit unda :  
 quod tandem spectaculum fore putamus, cum totam  
 terram contueri licebit, eiusq; cum situm, formam, cir-  
 cumscriptionem, tum & habitabiles regiones, & rur-  
 sum omni cultu propter uim frigoris, aut caloris uacan-  
 tes? nos enim ne nunc quidem oculis cernimus ea, quæ  
 uidemus. neque enim est ullus sensus in corpore, sed, ut  
 non solum physici docent, uerum etiam medici, qui ista  
 aperta & patefacta uiderunt, uix quasi quædam sunt  
 ad oculos, ad aures, ad nares à sede animi perforatæ.  
 itaque sæpe aut cogitatione, aut aliqua ui morbi impe-  
 diti, apertis atque integris & oculis, & auribus, nec ui-  
 demus, nec audimus: ut facile intelligi possit, animum  
 & uidere, & audire, non eas partes, quæ quasi fene-  
 stræ sunt animi; quibus tamen sentire nihil queat mēs,  
 nisi id agat, & adsit. quid, quod eadem mente res dissi-  
 millimas comprehendimus, ut colorem, saporem, calo-  
 rem, odorem, sonum? quæ nunquam quinque nuncijs  
 animus cognosceret, nisi ad eum omnia referrentur, ut  
 idem omnium iudex solus esset. atque ea profecto tum  
 multo puriora, & dilucidiora cernentur, cum, quod na-  
 tura fert, liber animus peruenerit. nam nunc quidem,  
 quanquam foramina illa, quæ patent ad animum à cor-  
 pore, callidissimo artificio natura fabricata est, tamen  
 terrenis, concretisq; corporibus sunt intersepta quodam  
 modo. cum autem nihil erit præter animum, nulla res  
 obiecta impediet, quo minus percipiat, quale quidq; sit.  
 quamuis copiose hæc diceremus, si res postularet, quàm  
 multa, quàm uaria spectacula animus in locis coelestibus

bb iij



esset habiturus . quæ quidem cogitans , soleo sepe mirari non nullorum insolentiam philosophorum , qui naturæ cognitionem admirantur , eiusq; inuentori , & principi gratias exultantes agunt , eumq; uenerantur ut deum : liberatos enim se per eum dicunt grauissimis dominis , terrore sempiterno , & diurno ac nocturno metu : quo terrore ? quo metu ? quæ est anus tam deliræ , quæ timeat ista , quæ uos uidelicet , si phisica non didicissetis , timeretis ?

» Acherontia templa , alta orci , pallida

» Leti , obnubila , obsita tenebris loca .

non pudet philosophum in eo gloriari , quodd hæc non timeat , & quodd falsa esse cognouerit : ex quo intelligi potest , quàm acuti natura sint , qui hæc sine doctrina credituri fuerint . præclarum autem nescio quid adepti sunt , qui didicerunt , se , cum tempus mortis uenisset , totos esse perituros . quod ut ita sit , ( nihil enim pugno ) quid habet ista res aut letabile , aut gloriosum ? nec tamen mihi sanè quidquam occurrit , cur non Pythagoræ sit & Platonis uera sententia . ut enim rationem Plato nullam afferret , ( uide , quid homini tribuam ) ipsa auctoritate me frangeret . tot autem rationes attulit , ut uelle cæteris , sibi certe persuasisse uideatur . sed plurimi contra nituntur , animosq; quasi capite damnatos morte mulctant : neque aliud est quidquã , cur incredibilis his animorum uideatur eternitas , nisi quodd nequeunt , qualis animus sit uacans corpore , intelligere , & cogitatione comprehendere . quasi uero intelligant , qualis sit in ipso corpore , quæ conformatio , quæ magnitudo , qui locus : ut , si iam possent in homine uno cerni omnia , quæ

nunc  
mus , d  
putent  
re posse  
misi qu  
occurrit  
corpore  
exierit  
nerit .  
telligere  
num at  
cili non  
quia dif  
tia , null  
dem uel  
mirum i  
net , ut  
ut mem  
neque n  
pori tuo  
sce anim  
aliquod  
tur , id  
non esse  
tributum  
qualis sit  
quid se  
est Platon  
me aut  
mouetur



nunc recta sunt, casurus ne in conspectum uideatur animus, an tanta sit eius tenuitas, ut fugiat aciem. hæc reputent isti, qui negant animum sine corpore se intelligere posse: uidebunt, quem in ipso corpore intelligant. mihi quidem naturam animo intuenti, multo difficilior occurrit cogitatio, multoq; obscurior, qualis animus in corpore sit tanquam alienæ domui, quàm qualis, cum exierit, & in liberum cælum quasi in domum suam uenerit. si enim, quod nunquam uidimus, id quale sit intelligere non possumus: certe & deum ipsum, & diuinum animum, corpore liberatum, cognitione completi non possumus. Dicaearchus quidem, & Aristoxenus, quia difficilis erat animi, quid aut qualis esset, intelligentia, nullum omnino animum esse dixerunt. est illud quidem uel maximum, animo ipso animum uidere: & nimirum hanc habet uim præceptum Apollinis, quo monet, ut se quisque noscat. non enim, credo, id præcipit, ut membra nostra, aut staturam figuram ue noscamus: neque nos corpora sumus: neque ego tibi dicens hoc, corpori tuo dico. cum igitur, nosce te, dicit, hoc dicit, nosce animum tuum: nā corpus quidem quasi uas est, aut aliquod animi receptaculū: ab animo tuo quidquid agitur, id agitur à te. hunc igitur nosse, nisi diuinum esset, non esset hoc acrioris cuiusdam animi præceptum, sic, ut tributum deo sit. hoc est se ipsum posse cognoscere. sed si, qualis sit animus, ipse animus nesciat, dic quaeso, ne esse quidē se sciet? ne moueri quidē se? ex quo illa ratio nata est Platonis, quæ à Socrate est in Phædro explicata, à me autē posita est in sexto libro de Rep. Quod semper mouetur, id æternum est. quod autem motum affert



T V S C. Q V A E S T.

alicui, quodq; ipsum agitur aliunde; quando finem  
habet motus, uiuēdi quoque finē habeat necesse est. solū  
igitur, quod se ipsum mouet, quia nunquam deferitur à  
se, nunquam ne moueri quidem desinit. quin etiam cæ  
teris, quæ mouentur, hic fons, hoc principium est mo-  
uendi. principij autem nulla est origo: nam ex princi-  
pio oriuntur omnia: ipsum autem nulla ex re alia nasci  
potest: nec enim esset id principium, quod gigneretur  
aliunde. quod si nunquam oritur, ne occidit quidem un-  
quam: nam principium extinctum nec ipsum ab alio re  
nascetur, nec à se aliud creabit; si quidem necesse est à  
principio oriri omnia. ita fit, ut motus principium ex  
eo sit, quod ipsum à se mouetur. id autem nec nasci po-  
test, nec mori. uel concidat omne cælum, omnisq; na-  
tura consistat necesse est, nec uim ullam nascatur, qua  
primo impulsu moueatur. Cum pateat igitur æternum  
id esse, quod se ipsum moueat: quis est, qui hanc natu-  
ram animis esse tributam neget? inanium est enim o-  
mne, quod pulsū agitur externo. quod autem est ani-  
matum, id motu ciatur interiore, & suo: nam hæc  
est propria natura animi, atque uis: quæ si est una ex  
omnibus quæ se ipsam semper moueat, neque nata cer-  
te est, & æterna est. licet concurrant plebei omnes  
philosophi, (sic enim ij, qui a Platone, & Socrate, et  
ab illa familia dissident, appellandi uidentur) non mo-  
do nihil unquam tam eleganter explebunt, sed ne hoc  
quidem ipsum quàm subtiliter conclusum sit intelligēt.  
sentit igitur animus se moueri: quod dum sentit, illud  
unà sentit, se uis sua, non aliena moueri; nec accidere  
posse, ut ipse unquam à se deferatur. ex quo efficitur

æter-  
sum  
nre  
num  
miru  
dum  
uidere  
nos, ne  
potis f  
quo m  
in eo, n  
rem hæ  
ris: hæ  
beret a  
id quoc  
memori  
quàm  
ris uita  
sionem  
trica d  
dit, ut p  
ut grac  
trica di  
re nihil  
to etia  
buit eo  
uis, qu  
terroga  
discere  
ri ullo



æternitas . nisi quid habes ad hæc . A. Ego uero facile  
sum passus ne in mentem quidē mihi aliquid cōtra ue-  
nire : ita isti faueo sententiæ . M. Quid illa tandem ?  
num leuiora censes ? quæ declarant inesse in animis ho-  
minum diuina quædam : quæ si cernerem quemadmo-  
dum nasci possent , etiam , quemadmodum interirent ,  
uiderem . nam sanguinem , bilem , pituitam , ossa , ner-  
uos , uenas , omnem denique membrorum & totius cor-  
poris figuram uideor posse dicere , unde concreta , &  
quo modo facta sint . per animum ipsum , si nihil esset  
in eo , nisi id , ut per eum uiueremus , tam natura puta-  
rem hominis uitam sustentari , quàm uitis , quàm arbo-  
ris : hæc enim etiam dicimus uiuere . item si nihil ha-  
beret animus hominis , nisi ut appeteret , aut refugeret ,  
id quoque esset ei commune cum bestiis . habet primum  
memoriam , & eam infinitam rerum innumerabiliū .  
quam quidem Plato recordationem esse uult superio-  
ris uitæ . nam in illo libro , qui inscribitur Menon , pu-  
sionem quendam Socrates interrogat quædam geome-  
trica de dimensione quadrati . ad ea sic ille respon-  
dit , ut puer : & tamen ita faciles interrogationes sunt ,  
ut gradatim respondens eò perueniat , quasi geome-  
trica didicisset . ex quo effici uult Socrates , ut discere  
re nihil aliud sit , quàm recordari . quem locum mul-  
to etiam accuratius explicat in eo sermone , quem ha-  
buit eo ipso die , quo excessit è uita : docet enim quem  
uis , quī omnium rerum rudis esse uideatur , bene in-  
terroganti respondentem , declarare , se non tum illa  
discere , sed reminiscendo recognoscere : nec uero fie-  
ri ullo modo posse , ut à pueris tot rerum , atque tantarū



## T V S C. Q V A E S T.

insitas, & quasi cōsignatas in animis notiones, quas ev-  
 voīas uocant, haberemus, nisi animus, antequam cor-  
 pus intrasset, in rerum cognitione uiguisset. cumq; ni-  
 hil esset, ut omnibus locis à Platone differitur, (nihil. n.  
 ille putat esse, quod oriatur & intereat, idq; solū esse,  
 quod semper tale sit, qualem ideam appellat ille, nos spe-  
 ciem) non potuit animus hāc in corpore inclusus cogno-  
 scere, cognita attulit. ex quo tam multarū rerum co-  
 gnitionis admiratio tollitur. neque ea planē uidet ani-  
 mus, cum tam repente in tam insolitum, tamq; pertur-  
 batum domicilium immigrauit; sed cum se collegit, at-  
 que recreauit, tum agnoscit ea reminiscendo. ita nihil  
 aliud est discere, nisi recordari. ego autem maiore etiā  
 quodam modo memoriam admiror: quid est enim il-  
 lud, quo meminimus? aut quam habet uim? aut un-  
 de naturam? non quero, quanta memoria Simonides  
 fuisse dicatur, quanta Theodecles, quanta is, qui à Pyr-  
 rho legatus ad senatum est missus, Cyneas, quanta nu-  
 per Carneades, quanta, qui modo fuit, Sceptius Metro-  
 dorus, quanta noster Hortensius: de communi homi-  
 num memoria loquor, & eorum maxime, qui in ali-  
 quo maiore studio, & arte uersantur: quorum quanta  
 mens sit, difficile est existimare: ita multa memine-  
 runt. quorsum igitur hāc spectat oratio? quā sit illa  
 uis, & unde sit, intelligendū puto. non est certe nec cor-  
 dis, nec sanguinis, nec cerebri, nec atomorum. anima sit  
 animus, ignis ue, nescio: nec me pudet, ut istos, fateri ne-  
 scire quod nesciā: illud si ulla alia de re obscura affir-  
 mare possē, siue anima, siue ignis sit animus, eū iurare  
 esse diuinū. quid enim, obsecro te, terra ne tibi, aut hoc

nebul  
 deur  
 quale  
 uides.  
 mo pu  
 memi  
 enim f  
 test ē a  
 quasi e  
 rum re  
 rerum i  
 magnit  
 la uis, q  
 uicio at  
 mortali  
 qui prim  
 est, omni  
 homines  
 uit ē au  
 cis litera  
 larum co  
 magni  
 Ela, qui  
 nerunt  
 sarijs an  
 ribus obl  
 perata u  
 speximu  
 la non  
 nes, on



nebuloso, & caliginoso coelo aut sata, aut concreta uis-  
detur tanta uis memoriae? si, quid sit hoc, non uides: at,  
quale sit, uides. si ne id quidem: at, quantum sit, profecto  
uides. quid igitur? utrum capacitatem aliquam in ani-  
mo putamus esse, quod tanquam in aliquod uas ea, quae  
meminimus, infundantur? absurdum id quidem: qui  
enim fundus, aut quae talis animi figura intelligi po-  
test? aut quae tanta omnino capacitas? an imprimi  
quasi cera animi putamus, & memoriae esse signata-  
rum rerum in mente uestigia? quae possunt uerborum, quae  
rerum ipsarum esse uestigia? quae porro tam immensa  
magnitudo, quae illa tam multa possit effingere? quid il-  
la uis, quae tandem est, quae inuestigat occulta, quae in-  
uentio atque excogitatio dicitur? ex hac ne tibi terrena,  
mortaliq; natura, & caduca concreta ea uidetur? aut  
qui primus, quod summae sapientiae Pythagorae uisum  
est, omnibus rebus imposuit nomina? aut qui dissipatos  
homines congregauit, & ad societatem uitae conuoca-  
uit? aut qui sonos uocis, qui infiniti uidebantur, pau-  
cis literarum notis terminauit? aut qui errantium stel-  
larum cursus, progressiones, institutiones notauit? omnes  
magni: superiores, qui fruges, qui uestitum, qui te-  
cta, qui cultum uitae, qui praesidia contra feras inue-  
nerunt: à quibus mansueti, & exculi, à neces-  
sarijs artificijs ad elegantiora defluximus: nam & au-  
ribus oblectatio magna ex parte est inuenta, & tem-  
perata uarietate, & natura sonorum: & astra su-  
speximus, tum ea, quae sunt infixae certis locis, tum il-  
la non re, sed uocabulo errantia. quorum conuersio-  
nes, omnesq; motus qui animo uidit, is docuit simi-



T V S C. Q V A E S T.

lem animum suum eius esse, qui ea fabricatus in cœlo  
esset. nam cum Archimedes lunæ, solis, quinque erran-  
tium motus in spheram illigauit, effecit idem, quod ille,  
qui in Timeo mūdum ædificauit Platonis deus, ut tar-  
ditate & celeritate dissimillimos motus una regeret cō-  
uersio. quod si in hoc mundo fieri sine deo non potest,  
ne in sphaera quidem eosdem motus Archimedes sine di-  
uino ingenio potuisset imitari. mihi uero ne hæc qui-  
dem notiora, & illustriora carere uī diuina uidentur,  
ut ego aut poetam graue plenumq; carmen sine cœle-  
sti aliquo mentis instinctu putem fundere, aut eloquen-  
tiam sine maiore quadā uī fluere, abundantem sonan-  
tibus uerbis, uberibusq; sententijs. Philosophia uero o-  
mnium mater artium quid est aliud, nisi, ut Plato ait,  
donum, ut ego, inuentum deorum? hæc nos primum  
ad illorum cultum, deinde ad ius hominum, quod si-  
tum est in generis humani societate, tum ad modestiā,  
magnitudinemq; animi erudiuit: eademq; ab animo,  
tanquam ab oculis, caliginem dispulit, ut omnia su-  
pera, infera, prima, ultima, media uideremus. prorsus  
hæc diuina mihi uidetur uis, quæ tot res efficiat, &  
tantas. quid est enim memoria rerum & uerborum?  
quid porro inuentio? profecto id, quo nec in deo quid-  
quam maius intelligi potest: non enim ambrosia deos,  
aut nectare, aut iuuentate pocula ministrante latari  
arbitror: nec Homerum audio, qui Ganimedem à dijs  
raptum ait propter formam, ut Ioui pocula ministra-  
ret. non iusta causa, cur Laomedonti tanta fieret in-  
iuria. fingebat hæc Homerus, & humana ad deos trās-  
ferebat. diuina mallet ad nos: quæ autem diuina?

uiget  
ut eg  
O q  
anim  
uacat  
manu  
dam r  
rum ej  
ipfis uer  
nulla in  
animis  
tum, atq  
quidem  
nihil inre  
beat, que  
complecti  
inueniet  
à deo, si  
mi, se iu  
est illud,  
cœleste e  
se est, nec  
do intelli  
segregat  
tiens, &  
hoc è gen  
igitur, a  
potes ne  
beo, quæ  
mihi per



uigere, sapere, inuenire, meminisse. ergo animus, qui,  
 ut ego dico, diuinus, ut Euripides audet dicere, deus est.  
 ¶ quidem si deus aut anima aut ignis est, idem est  
 animus hominis. nam ut illa natura coelestis & terra  
 uacat, & humore: sic utriusque harum rerum hu-  
 manus animus est expers. sin autem est quinta quæ-  
 dam natura, ab Aristotele inducta primū: hæc & deo-  
 rum est, & animorum. hanc nos sententiam secuti, his  
 22 ipsis uerbis in consolatione hæc expressimus. Animorū  
 22 nulla in terris origo inueniri potest: nihil enim est in  
 22 animis mixtum, atque cōcretum, aut quod ex terra na-  
 22 tum, atque fictum esse uideatur; nihil ne aut humidum  
 22 quidem, aut stabile, aut igneum: his enim in naturis  
 22 nihil inest, quod uim memoriæ, mentis, cogitationis ha-  
 22 beat, quod & præterita teneat, & futura prouideat, et  
 22 complecti possit præsentia: quæ sola diuina sunt. nec  
 22 inuenietur unquā, unde ad hominē uenire possint, nisi  
 22 à deo. singularis est igitur quædā natura, atque uis ani-  
 22 mī, seiuncta ab his usitatis, notisq; naturis. Ita quidqd  
 est illud, quod sentit, quod sapit, quod uult, quod uiget,  
 coeleste & diuinū est, ob eamq; rem æternum sit neces-  
 se est. nec uero deus ipse, qui intelligitur à nobis, alio mo-  
 do intelligi potest, nisi mens soluta quædam, & libera,  
 segregata ab omni concretione mortali, omnia sen-  
 tiens, & mouens, ipsaq; prædita motu sempiterno.  
 hoc è genere atque eadē è natura est humana mēs. ubi  
 igitur, aut qualis est ista mens? ubi tua, aut qualis?  
 potes ne dicere? an, si omnia ad intelligendum nō ha-  
 beo, quæ habere uellem: ne ijs quidem, quæ habeo,  
 mihi per te uti licebit? non ualet tantum animus, ut



- sese ipse uideat: at, ut oculus, sic animus sese nō uidens alia cernit. non uidet autem, quod minimum est, formam suam. fortasse: quanquā id quoque: sed relinquamus: uim certe, sagacitatem, memoriā, motū, celeritatem uidet. hāc magna, hāc diuina, hāc sempiterna sunt. qua facie quidem sit, aut ubi habitet, ne quærendum quidem est. ut, cum uidemus speciem primum, candoremq; coeli, deinde conuersionis celeritatem tantam, quantam cogitare non possumus; tū uicissitudines dierum, atque noctium, cōmutationesq; temporum quadripartitas, ad maturitatem frugum, & ad tēperationem corporum aptas, eorumq; omnium moderatorem et ducem solem, lunamq; accretione, et diminutione luminis quasi fastorum notantem & significantem dies; tum in eodem orbe in XII partes distributo, quinque stellas ferri, eosdem cursus constantissime seruantes, disparibus inter se motibus; nocturnamq; coeli formam undique sideribus ornatam; tum globum terræ eminentem è mari, fixum in medio mundi uniuersi loco, duabus oris distantibus habitabilem & cultum; quarum altera, quā nos incolimus, sub axe posita ad stellas septem, unde
- » Horrifer Aquilonis stridor gelidas molitur niues;
  - altera australis, ignota nobis, quam uocant Græci ἀντάρξιοβα; cæteras partes incultas, quædā aut frigore rigeant, aut urantur calore; hic autem, ubi habitamus, nō intermitteri suo tempore
  - » Cælum nitescere, arbores frondescere,
  - » Vites lætiferas pampinis pubescere,
  - » Ramos baccarum ubertate incurvescere,
  - » Segetes largiri fruges, florere omnia,

Fontes

» Font  
tum  
tim  
ad co  
plato  
minis  
tur, e  
dubita  
sunt, n  
stoliti  
mente  
non ui  
ex me  
tus, o  
tis agn  
capite  
alias;  
qua ej  
fac sp  
do mide  
faciem  
si eius i  
cogniti  
sici pl  
nihil co  
tum, n  
ni, nec  
terive i  
tio, ac  
ctione



Fontes scaterere, herbis prata conuestirier; tum multitudinem pecudū partim ad uescendum, partim ad cultus agrorum, partim ad uehendum, partim ad corpora uestienda; hominemq; ipsum quasi cōtemplatorem cœli ac deorum, ipsorumq; cultorē, atque hominis utilitati agros omnes & maria parentia: hæc igitur, & alia innumerabilia cum cernimus, possumus ne dubitare, quin his præsit aliquis uel effector, si hæc nata sunt, ut Platoni uidetur; uel, si semper fuerint, ut Aristoteli placet, moderator tanti operis & muneris? sic mentem hominis, quamuis eam non uideas, ut deum non uides, tamen, ut deum agnoscis ex operibus eius, sic ex memoria rerum, & inuentione, & celeritate motus, omniq; pulchritudine uirtutis uim diuinam mentis agnoscito. in quo igitur loco est? credo equidem in capite: &, cur credam, afferre possum: sed de hoc aliud: nunc ubi ubi sit animus, certe quidem in te est. quæ est ei natura? propria puto, & sua. sed fac igneā, fac spirabilem: nihil ad id, de quo agimus. illud modo uideto, ut deum noris, et si eius ignores et locum, & faciem, sic animum tibi tuum notum esse oportere, etiā si eius ignores & locum, & formam. in animi autem cognitione dubitare non possumus, nisi planè in physicis plumbei sumus, quin nihil sit animis admixtum, nihil concretum, nihil copulatum, nihil coagmentatum, nihil duplex. quod cum ita sit, certe nec secerni, nec diuidi, nec discerpi, nec distrahi potest: nec interire igitur: est enim interitus quasi discessus, & secretio, ac direptus earum partium, quæ ante interitum inuentione aliqua tenebantur. his, & talibus adductus So-

cc

Fontes



T V S C. Q V A E S T.

crates, nec patronum quæsiuit ad iudicium capitis; nec iudicibus supplex fuit; adhibuitq; liberam contumaciam à magnitudine animi ductam, non à superbia; et supremo uitæ die de hoc ipso multa disseruit; & paucis ante diebus, cum facile posset educi è custodia, noluit; et cum penè in manu iam mortiferum illud teneret poculum, locutus ita est, ut non ad mortem trudi, uerum in cœlum uideretur ascendere. ita enim cœsebat; itaq; disseruit: duas esse vias, duplicesq; cursus animorum è corpore excedentium: nã qui se humanis uitæ cõtaminassent, et se totos libidinibus dedidissent, quibus cæcati uel in domesticis uitæ, atq; flagitijs se inquinassent, uel in Rep. uiolanda fraudes inexpliabiles concepissent, ijs deuium quoddam iter esse, seclusum à concilio deorum: qui autem se integros, castosq; seruauissent, quibusq; fuisset minima cum corporibus cõtagio, seseq; ab his semper seuocassent, essentq; in corporibus humanis uitam imitati deorum, his ad illos, à quibus essent profecti, reditum facilem patere: itaque cômémorat, ut cygni, qui non sine causa Apollini dicati sunt, sed quòd ab eo diuinationem habere uideantur, qua prouidentes quid in morte boni sit, cum cantu & uoluptate moriantur; sic omnibus & bonis, & doctis esse faciendũ. nec uero de hoc quisquam dubitare posset, nisi idem nobis accideret diligenter de animo cogitantibus, quòd ijs sæpe usu uenit, qui acriter oculis deficientem solem intuerentur, ut aspectum omnino amitterent. sic mentis acies se ipsam intuens, non nunquam hebescit: ob eamq; causam contemplandi diligentiam amittimus. itaque dubitans, circumspectans, hæsitans,

Mal  
men  
Grae  
di na  
in no  
ro cas  
nunc  
piens  
tamen  
sed, t  
legitim  
ta eni  
ratio n  
lupat  
minist  
tio om  
mus, t  
cogim  
tem à  
emori  
disiuga  
ri. hoc  
simile  
nus ta  
dibus c  
tardiu  
nos fu  
uemus  
menta  
cõsola



» Multa aduersa reuertens, tanquã ratis in mari im-  
 menso, nostra uehitur oratio. sed hæc & uetera, & à  
 Græcis. Cato autem sic abiit è uita, ut causam morien-  
 di nactum se esse gauderet. uetat enim dominans ille  
 in nobis deus iniussu hinc nos suo demigrare. cum ue-  
 ro causam iustam deus ipse dederit, ut tunc Socrati,  
 nunc Catoni, saepe multis: nã ille mediusfidius uir sa-  
 piens lætus ex his tenebris in lucem illam excesserit: nec  
 tamen illa uincula carceris ruperit: leges enim uetât:  
 sed, tanquam à magistratu, aut ab aliqua potestate  
 legitima, sic à deo euocatus, atque emissus exierit: to-  
 ta enim philosophorum uita, ut ait idem, commen-  
 ratio mortis est. nam quid aliud agimus, cum à uo-  
 luptate, id est à corpore, cum à re familiari, quæ est  
 ministra & famula corporis, cum à Rep. cum à nego-  
 tio omni seuocamus animum? quid inquam tum agi-  
 mus, nisi animum ad se ipsum aduocamus, secum esse  
 cogimus, maximeq; à corpore abducimus? secernere au-  
 tem à corpore animum, nequidquam aliud est, quàm  
 emori discere. quare hoc commentemur, mihi crede;  
 disingamusq; nos à corporibus, id est consuescamus mo-  
 ri. hoc & dum erimus in terris, erit illi coelesti uitæ  
 simile: & cum illuc ex his uinculis emissi feremur, mi-  
 nus tardabitur cursus animorum. nam qui in compe-  
 dibus corporis semper fuerunt, etiam cum soluti sunt,  
 tardius ingrediuntur, ut ij, qui ferro uincti multos an-  
 nos fuerunt. quò cum uenerimus, tum denique ui-  
 uemus. nam hæc quidem uita, mors est: quam la-  
 mentari possem, si liberet. A. Satis tu quidem in  
 cōsolatione es lamentatus: quam cum lego, nihil malo,

cc ij



quàm has res relinquere ; his uero auditis , multo magis. M. Veniet tempus, & quidem celeriter, & siue retardabis, siue properabis : uolat enim ætas . tantum autem abest ab eo, ut malū mors sit , quod tibi dudum uidebatur ; ut uerear , ne homini nihil sit non malum aliud certe , sed nihil bonū aliud potius ; si quidem uel dii ipsi, uel cum dijs futuri sumus . A. Quid refert ? adsunt enim, qui hæc non probent. M. Ego autē nunquam ita te in hoc sermone dimittam ulla uti ratione , ut mors tibi uideri malum possit. A. Qui potest, cum ista cognouerim? M. Qui possit, rogas? cateruæ ueniūt contradicentium, nō solum Epicureorum, quos equidem non despicio , sed nescio quo modo doctissimus quisque contemnit . acerrime autem, deliciæ meæ, Dicaearchus contra hanc immortalitatem disseruit : is enim tres libros scripsit, qui Lesbiaci uocantur, quod Mitylenis sermo habetur ; in quibus uult efficere, animos esse mortales. Stoici autem usuram nobis largiuntur tanquam cornicibus : diu mansuros aiunt animos, semper negant. nū uis igitur audire, cur, etiam si ita sit, mors tamen nō sit in malis ? A. ut uidetur : sed me nemo de immortalitate depellet. M. Laudo id quidem : etsi nihil nimis oportet confidere : mouemur enim sæpe aliquo acute cōcluso : labamus, mutamusq; sententiam clarioribus etiā in rebus : in his est enim aliqua obscuritas . id igitur si acciderit , simus armati. A. Sanè quidem : sed, ne accidat, providebo. M. Num quid igitur est causæ, quin amicos nostros Stoicos dimittamus, eos dico , qui aiunt animos manere , è corpore cum excesserint , sed non semper ? istos uero : qui, quod tota in hac causa diffi-



cillimum est, suscipiant, posse animum manere corpore uacantem; illud autem, quod nō modo facile ad credendum est, sed eo concesso, quod uolunt, consequens, id certe non dant, ut, cum diu permāserit, ne intereat.

A. Bene reprehendis: & se isto modo res habet.

M. Credamus igitur Panatio, a Platone suo dissentienti: quem enim omnibus locis diuinū, quem sapientissimum, quem sanctissimum, quem Homerum philosophorum appellat, huius hanc unam sententiam de immortalitate animorum non probat: uult enim, quod nemo negat, quidquid natū sit, interire; nasci autē animos, quod declarat eorum similitudo, qui procreantur; quæ etiam in ingenijs, non solum corporibus appareat. alteram autem affert rationem: nihil esse, quod doleat, quin id ægrum esse quoque possit; quod autem in morbum cadat, id etiam interiturū: dolere autem animos; ergo etiam interire. hæc refelli possunt: sunt enim ignorantis, cum de æternitate animorum dicatur, de mente dici, quæ omni turbido motu semper uacet; non de partibus ijs, in quibus ægritudines, iræ, libidineq; uersentur: quas is, contra quem hæc dicantur, semotas a mente, & disclusas putat. nam similitudo magis appareret in bestijs: quarum animi sunt rationis expertes. hominū autem similitudo in corporum figura magis extat: & ipsi animi magni refert quali in corpore locati sint: multa enim è corpore existūt, quæ acuat mentem; multa, quæ obtūdant. Aristoteles quidem ait, omnes ingeniosos melancholicos esse: ut ego me tardiorē esse non moleste ferā. enumerat multos: idq; quasi cōstet, rationem, cur ita fiat, affert. quod si tanta uis est



ad habitum mentis in ijs, quæ gignuntur in corpore; ea sunt autem, quæcunque sunt quæ similitudinem faciunt: nihil necessitatis affert, cur nascatur animi similitudo. omitto similitudines. uellem adesse posset Panætius. uixit cum Africano. quærerem ex eo, cuius suorum similis fuisset Africani fratris nepos: facie uel patris, uita omnium perditorum ita similis, ut esset facile deterrimus. cuius etiam similis P. Crassi, & sapientis, et eloquentis hominis, nepos; multorumq; aliorum clarorum uirorum, quos nihil attinet nominare, nepotes & filij. sed quid agimus? oblitum ne sumus, hoc nunc nobis esse propositum; cum satis de æternitate dixissemus, ne si interirent quidem animi, quidquam mali esse in morte? A. Ego uero memineram: sed te de æternitate dicentem aberrare à proposito facile patiebar. M. Video te alta spectare, & uelle in cælum migrare. A. Spero fore, ut contingat id nobis: sed fac, ut isti uolunt, animos non remanere post mortem: uideo nos, si ita sit, priuari spe beatoris uitæ. M. Mali uero quid affert ista sententia? fac animum sic interire ut corpus: num igitur aliquis dolor, aut omnino post mortem sensus in corpore est? nemo id quidem dicit: etsi Democritum insimulat Epicurus: Democritici negant. ne in animo quidem igitur sensus remanet: ipse enim nusquam est. ubi igitur malum est, quoniam nihil tertium? an, quoniam ipse animi discessus à corpore non fit sine dolore? ut credam ita esse, quàm est id exiguum. & falsum esse arbitror: & fit plerunque sine sensu, non nunquam etiam cum uoluptate: totumq; hoc leue est, qualecunque est: fit enim ad punctum temporis. illud angit, uel potius



excruciat, discessus ab omnibus ijs, quæ sunt bona in ui-  
 ta . uide , ne à malis dici uerius possit . quid ego nunc  
 lugeam uitam hominum? uere & iure possum sed quid  
 necesse est , cum id agam , ne post mortem miseros nos  
 putemus fore, uitam etiam efficere deplorando misero-  
 rem ? fecimus hoc in eo libro, in quo nosmet ipsos, quan-  
 tum potuimus, consolati sumus. à malis igitur mors ab-  
 ducit , non à bonis, uerum si querimus . hoc quidem à  
 Cyrenaico Hegesia sic copiose disputatur , ut is à Rege  
 Ptolemæo prohibitus esse dicatur illa in scholis dicere ,  
 quodd multi, his auditis, mortē sibi ipsi cōsciscerent. Calli-  
 machi quidem epigramma in Ambraciotam Cleóbrot-  
 um est: quem ait, cum nihil ei accidisset aduersi, è mu-  
 ro se in mare abiecisse lecto Platonis libro. eius autem,  
 quem dixi, Hegesiae liber est ἀποκατεργών ; quodd à uita  
 quidam per inedia discedens, reuocatur ab amicis; qui-  
 bus respondens , uitæ humanæ enumerat incommoda .  
 possem id facere , etsi minus , quàm ille , qui omnino  
 uiuere expedire nemini putat . omitto alios . etiam ne  
 nobis expedit, qui & domesticis, & forensibus solatijs,  
 ornamentisq; priuati, certe , si ante occidissetus, mors  
 nos à malis, non à bonis abstraxisset ? sit igitur aliquis,  
 qui nihil mali habeat, nullum à fortuna uulnus accepe-  
 rit . Metellus ille honoratus quatuor filijs : at quin-  
 quaginta Priamus ; è quibus decem & septem iusta  
 uxore natis : in utroque eandem habuit fortuna pote-  
 statem, sed usa in altero est: Metellum enim multi filij,  
 filia , nepotes, neptes in regum imposuerunt: Priamum  
 autem tanta progenie orbatum , cum in aram confu-  
 gisset , hostilis manus interemit . hic si uiuis filijs , in-



columi regno occidisset,

» Astante ope barbarica,

» Tectis coelatis, laqueatis;

utrum tandem à bonis, an à malis discessisset? tum profecto uideretur à bonis. at certe ei melius euenisset, nec tam flebiliter illa canerentur,

» Hæc omnia uidi inflammari,

» Priamo uì uitam euitari,

» Iouis aram sanguine turpari.

quasi uero ista uel quidquam tum potuerit ei melius accidere. quòd si ante occidisset, tamen euentum omnino amisisset, hoc autem tempore sensum malorum amisit. Pompeio nostro familiari, cum grauiter egrotaret Neapoli, melius est factum. coronati Neapolitani fuerunt. nimirum etiam Puteolani uulgo ex oppidis publice gratulabantur. ineptum sanè negocium, & graculum, sed tamen fortunatum. utrum igitur, si tum esset extinctus, à bonis rebus, an à malis discessisset? certe à miseris: non enim cum socero bellum gessisset, non imparatus arma sumpsisset, non domum reliquisset, non ex Italia fugisset, non exercitu amisso nudus in seruorum ferrum, & manus incidisset, non liberi difleti, non fortunæ omnes à uictoribus possessæ. qui, si mortem tum obisset, in amplissimis fortunis occidisset; is propagatione uitæ quot, quantas, quàm incredibiles hausit calamitates? hæc morte effugiuntur, etiam si nō euenierint, tamen quia possunt euenire. sed homines ea sibi occidere posse non cogitant: Metelli sperat sibi quisque fortunam: proinde quasi aut plures fortunati sint, quàm infelices; aut certi quidquā sit in rebus humanis; aut spe-



rare sit prudentius, quàm timere. sed hoc ipsum concedatur, bonis rebus homines morte priuari: ergo etiam carere mortuos uitæ commodis, idq; esse miserum, certe ita dicant necesse est. an potest is, qui non est, re ulla carere? triste enim est nomen ipsum carendi, quia subiicitur hæc uis: habuit, non habet; desiderat, requirit, indiget. opinor hæc incommoda sunt carentis: caret oculis, odiosa cecitas: liberis, orbitas. ualet hoc in uiuis: mortuorum autem non uitæ modo commodis, sed ne uita quidem ipsa quisquam caret. de mortuis loquor, qui nulli sunt. nos, qui sumus, num aut si cornibus caremus, aut pennis, sit qui id dixerit? certe nemo: quid ita? quia, cum id non habeas, quod tibi nec usu, nec natura aptum sit, non careas, etiam si sentias te non habere. hoc premendum etiam atque etiam est argumentum, confirmato illo, de quo, si mortales animi sunt, dubitare non possumus, quin tantus interitus in morte sit, ut ne minima quidem suspicio sensus relinquatur. hoc igitur probe stabilito, & fixo, illud excutiendum est, ut sciatur quid sit carere, ne relinquatur aliquid erroris in uerbo. carere igitur hoc significat, egere eo, quod habere uelis: inest enim uelle in carendo, nisi cum sic tanquam in febris dicitur, alia quadam notione uerbi. dicitur enim alio modo etiam carere, cum aliquid non habeas, & non habere te sentias, etiam si id facile patiare: carere enim malo, id non dicitur; non enim esset dolendum; dicitur illud, bono carere, quod est malum. sed ne uiuus quidem bono caret, si eo non indiget: sed in uiuo intelligi tamen potest. regno carere, dici hoc in te satis subtiliter non potest: posset in Tar-



## TVSC. QVAEST.

quino, cum regno esset expulsus: at in mortuo ne intel-  
 ligi quidem potest: carere enim sentientis est, nec sensus  
 in mortuo est: ne carere quidem igitur in mortuo est.  
 quanquam quid opus est in hoc philosophari, cum rem  
 non magnopere egere philosophia uideamus? quoties nō  
 modo ductores nostri, sed uniuersi etiam exercitus ad  
 non dubiam mortem cōcurrerunt? quæ quidem si time-  
 retur, non L. Brutus arcens eum reditu tyrannum, quē  
 ipse expulerat, in praelio concidisset: non cum Latinis de-  
 certans pater Decius, cum Hetruscis filius, etiam cum  
 Pyrrho nepos, se hostium telis obiecissent: non uno bello  
 pro patria cadentes Scipiones Hispania uidisset, Pau-  
 lum Aemiliū Cannæ, Venusia Marcellum, Latini Al-  
 binum, Lucani Gracchum. num quis horum miser ho-  
 die? ne tum quidem post spiritum extremum: nec enim  
 potest esse miser quisquam sensu perempto. at id ipsum  
 odiosum est, sine sensu esse. odiosum, si id esset carere.  
 cum uero perspicuum sit nihil posse in eo esse, qui ipse  
 nō sit: quid potest esse in eo odiosum, qui nec carere, nec  
 sentiat? quanquam hoc quidem nimis saepe, sed eo quod  
 in hoc inest omnis animi contractio ex metu mortis. qui  
 enim satis uiderit, id quod est luce clarius, animo, &  
 corpore consumpto, totoq; animante deletō, & factō  
 interitu uniuerso, illud animal, quod fuerit, factum  
 esse nihil; is plane perspiciet, inter Hippocentaurum,  
 qui nunquam fuerit, & Regem Agamemnonem nihil  
 interesse; nec pluri nunc facere M. Camillum hoc ciuile  
 bellum, quā illo uiuo ego fecerim Romam captam.  
 cur igitur & Camillus doleret, si hac post trecentos &  
 quinquaginta ferē annos euentura putaret: et ego do-



leam, si ad decem milia annorum gentem aliquam ur-  
 bem nostram potituram putem? quia tanta charitas pa-  
 triæ est, ut eam non sensu nostro, sed salute ipsius me-  
 tiamur. itaque non deterret sapientem mors, quæ pro-  
 pter incertos casus quotidie imminet, propter breuita-  
 tem uitæ nunquam longe potest abesse, quo minus in om-  
 nino tempus Reip. suisq; consulat, & posteritatem ip-  
 sam, cuius sensum habiturus non sit, ad se putet perti-  
 nere. quare licet etiam mortalem esse animū indican-  
 tem, æterna moliri, non gloriæ cupiditate, quam sen-  
 surus non sit; sed uirtutis, quam necessario gloria, etiã  
 si tu id non agas, consequatur. natura uero se sic ha-  
 bet, ut quo modo initium nobis rerum omnium ortus  
 noster afferat, sic exitum mors. quæ ut nihil pertinet  
 ad nos ante ortum, sic nihil post mortem pertinebit. in  
 quo quid potest esse mali, cum mors nec ad uiuos perti-  
 neat, nec ad mortuos? alteri nulli sunt, alteros non at-  
 tingit. quam qui leuiorem faciunt, somni simillimam  
 uolunt esse. quasi uero quisquam ita nonaginta annos  
 uelit uiuere, ut, cum sexaginta confecerit, reliquos dor-  
 miat. ne si ues quidem id uelint, non modo ipse. Endy-  
 mion uero, si fabulas audire uolumus, nescio quando  
 in Latmo obdormiuit, qui est mons Caria, non dum opi-  
 nor experrectus. num igitur eum curare censes, cum  
 Luna labore, à qua consopitus putatur, ut eum dor-  
 mientem oscularetur? quid curet autem, qui ne sen-  
 tit quidem? habes somnum imaginem mortis; eamq;  
 quotidie induis: & dubitas, quin sensus in morte nul-  
 lus sit, cum in eius simulacro uideas esse nullum sen-  
 sum? pellantur ergo istæ ineptiæ penè aniles, ante tem-



pus mori miserum esse. quod tandem tempus? naturæ  
ne? at ea quidem dedit usuram vitæ, tanquam pecu-  
niæ, nulla præstituta die. quid est igitur quod querare,  
si repetit cū uult? ea enim condicione acceperas. ijdē,  
si puer paruus occidit, æquo animo ferendum putant:  
si uero in cunis, ne querendum quidem. atqui ab hoc  
acerbius exegit natura, quod dederat. non dum gusta-  
uerat, inquit, vitæ suauitatem: hic autem iam spes-  
rabat magna, quibus frui cœperat. at id quidem ipsum  
in cæteris rebus melius putatur, aliquam partem, quàm  
nullam attingere: cur in uita secus? quanquā nō ma-  
le ait Callimachus multo sæpius lacrymasse Priamum,  
quàm Troilum. eorum autem, qui exacta etate mo-  
riuntur, fortuna laudatur: cur? nam, reor, non il-  
lis, si uita longior daretur, posset esse incundior: nihil  
est enim profecto homini prudentiæ dulcius; quam, ut  
cætera auferat, affert certe senectus. quæ uero etas lon-  
ga est? aut quid omnino homini longum? non ne mo-  
do pueros, modo adolescentes in cursu à tergo insequēs  
nec opinantes affecuta est senectus? sed quia ultra ni-  
hil habemus, hoc longum dicimus. omnia ista, perinde  
ut cuique data sunt, pro rata parte aut, longa, aut  
breuia dicuntur. apud Hypanin flumini, qui ab Euro-  
pæ parte in pontum influit, Aristoteles ait bestiolas  
quasdam nasci, quæ unum diem uiuant. ex his igi-  
tur hora octaua quæ mortua est, prouecta etate mor-  
tua est; quæ uero occidente sole, decrepita; eo magis,  
si etiam solstitiali die. confer nostram longissimam  
etatem cum æternitate: in eadem propemodum bre-  
uitate, qua illæ bestiola, reperiemur. contemnamus

igitur  
metu  
bore  
rum  
te pon  
simis e  
Challa  
quibus  
expect  
mur, at  
illud it  
qua cu  
Erat T  
mus, cu  
emoritu  
ran mort  
poculo e  
propino  
tererrin  
poculan  
tu, cum  
ueret; e  
guratu  
mi aqu  
indican  
pauis  
quo ty  
tio, que  
» multu  
» mihi e



igitur omnes ineptias: quod enim leuius huic leuitati no-  
 men imponā? totamq; uim bene uiuendi in animi ro-  
 bore, ac magnitudine, & in omnium rerum humana-  
 rum contempione, ac despicientia, & in omni uirtu-  
 te ponamus. nam nunc quidem cogitationibus mollis-  
 simis effoeminamur, ut, si ante mors aduentet, quā-  
 Chaldeorum promissa cōsecuti sumus, spoliati magnis  
 quibusdam bonis, illusi, destitutiq; uideamur. quod si  
 expectando, & desiderando pendemus animis, crucia-  
 mur, angimur: proh dii immortales, quā optabiliter  
 illud iter ineundum esse debet, quo confecto, nulla reli-  
 qua cura, nulla sollicitudo futura sit? quā me dele-  
 stat Theramenes, quāq; elato animo est? etsi. n. fle-  
 mus, cum legimus: tamen non miserabiliter uir clarus  
 emoritur. qui cū coniectus in carcerē triginta iussu ty-  
 rannorum uenenum ut sitiens obbibisset, reliquum sic ē  
 poculo eiecit, ut id resonaret. quo sonitu reddito, ridēs,  
 propino, inquit, hoc pulchro Critiæ, qui in eum fuerat  
 teterrimus. Græci enim in cōuiujs solent nominare, cui  
 poculum tradituri sint. lusit uir egregius extremo spiri-  
 tu, cum iam præcordijs conceptam mortem contineret:  
 uereq; ei, qui uenenum præbuerat, mortem est eam au-  
 guratus, quæ breui cōsecuta est. quis hanc animi maxi-  
 mi æquitatem in ipsa morte laudaret, si mortem malū  
 iudicaret? uadit in eundem carcerē, atque in eundem  
 paucis post annis scyphū Socrates, eodem scelere iudicū,  
 quo tyrannorum Theramenes. quæ est igitur eius ora-  
 tio, qua facit eum Plato usum apud iudices iam morte  
 mulctatum? Magna me, inquit, spes tenet iudices bene  
 mihi euenire, quod mittar ad mortem. necesse est enim,



T V S C. Q V A E S T.

» sit alterū de duobus, ut aut sensus omnino mors omnes  
 » auferat, aut in alium quēdam locum ex his locis morte  
 » migretur. quamobrem, siue sensus extinguitur, morsq;  
 » ei somno similis est, qui non nunquam, etiam sine uisis  
 » somniorū, placatissimam quietem affert: dii boni, quid  
 » lucri est emori? aut quā multi dies reperiri possunt,  
 » qui tali nocti anteponantur, cui similis futura est per-  
 » petuitas omnis consequentis temporis? quis me beatior?  
 » si uera sunt quæ dicuntur, migrationem esse mortem  
 » in eas oras, quas, qui è uita exceſſerunt, incolunt: id  
 » multo iam beatius est, te, cum ab ijs, qui se iudicū nu-  
 » mero haberi uolunt, euaseris, ad eos uenire, qui uere ius-  
 » dices appellantur, Minoem, Rhadamanthum, Aeacum,  
 » Triptolemum, conuenireq; eos, qui iuste & cum fide ui-  
 » xerint. hæc peregrinatio mediocris uobis uideri potest?  
 » ut uero colloqui cum Orpheo, Musæo, Homero, Hesiodo  
 » liceat, quanti tandem æſtimatis? equidem sæpe mori, si  
 » fieri posset, uellem, ut ea, quæ dico, mihi liceret inueni-  
 » re. quanta delectatione autem afficerer, cum Palame-  
 » dem, cum Aiace, cum alios iudicio iniquorum cir-  
 » cunuentos conuenirem? tentarem etiam summi Regis,  
 » qui maximas copias duxit ad Troiam, & Vlyxis, Sisy-  
 » phiq; prudentiam: nec ob eam rem, cum hæc exqui-  
 » rerem, sicut hic faciebam, capite damnarer. ne uos  
 » quidem iudices, ij, qui me absoluiſtis, mortem timueri-  
 » tis: nec enim cuiquam bono mali quidquā euenire po-  
 » test nec uiuo, nec mortuo: nec unquā eius res à dijs im-  
 » mortalibus negligentur. nec mihi ipsi hoc accidit for-  
 » tuito. nec uero ijs, à quibus accusatus sum, aut à qui-  
 » bus condemnatus, habeo quod succenseam, nisi quod mi

» hi m  
 » hil a  
 » abire  
 » tem /  
 » scire e  
 » mium  
 » hoc in  
 » queng  
 » te. sed  
 » nos du  
 » sit à na  
 » malum  
 » ra mor  
 » nullus q  
 » praſtar  
 » ro, cum  
 » proditu  
 » ad eam  
 » hilari, a  
 » ne leges  
 » gratiam  
 » mutuati  
 » Sparta  
 » mo fue  
 » merabi  
 » pes non  
 » eum lo  
 » tur? p  
 » runt.  
 » Dic ho



- » hi nocere se crediderunt. & hoc quidem hoc modo: ni-  
 » hil autem melius aestimo. sed tempus est, inquit, iam hinc  
 » abire me, ut moriar; uos, ut uitam agatis. utrum au-  
 » tem sit melius, dii immortales sciunt: hominem quidem  
 » scire arbitror neminem. Nam ego haud paulo hunc ani-  
 mum malim, quam eorum omnium fortunas, qui de  
 hoc iudicauerunt. etsi, quod praeter deos negat scire  
 quenquam, id scit ipse, utrum melius sit: nam dixit an-  
 te. sed suum illud, nihil ut affirmet, tenet ad extremum.  
 nos autem teneamus, ut nihil censeamus esse malum, quod  
 sit a natura datum omnibus; intelligamusque, si mors  
 malum sit, esse sempiternum malum: nam uitae mise-  
 rae mors finis esse uidetur: mors si est misera, finis esse  
 nullus potest. sed quid ego Socratem, aut Theramenem,  
 praestantibus uiros uirtutis, & sapientiae gloria, comemo-  
 ro, cum Lacedaemonius quidam, cuius ne nomen quidem  
 proditum est, mortem tantopere contempserit, ut, cum  
 ad eam duceretur damnatus ab Ephoris, & esset uultu  
 hilari, atque lato, dixissetque ei quidam inimicus, contemnis  
 ne leges Lycurgi? responderit, ego uero illi maximam  
 gratiam habeo, qui me ea poena mulctauerit, quam sine  
 mutatione, & sine uersura possem dissoluere. o uirum  
 Sparta dignum: ut mihi quidem, qui tam magno ani-  
 mo fuerit, innocens damnatus esse uideatur. tales innu-  
 merabiles nostra ciuitas tulit. sed quid duces & princi-  
 pes nominem, cum legiones scribat Cato saepe alacres in  
 eum locum profectas, unde redituras se non arbitraren-  
 tur? pari animo Lacedaemonij in Thermopylis occide-  
 runt. in quos Symonides,  
 » Dic hospes Sparta, nos te hic uidisse iacentes,



22 Dum sanctis patriæ legibus obsequimur .  
 Quid ille dux Leonidas dicit ? pergite animo forti Lace-  
 dæmonij : hodie apud inferos fortasse cœnabimus . fuit  
 hæc gens fortis , dum Lycurgi leges uigebant . è quibus  
 unus , cum Perses hostis in colloquio dixisset glorians , so-  
 lem præ iaculorum multitudine & sagittarum non ui-  
 debitis : in umbra igitur , inquit , pugnabimus . uiros cō-  
 memoro . qualis tandem Lacæna ? quæ cum filium in  
 prælium misisset , et interfectum audisset , iccirco , inquit ,  
 genueram , ut esset qui pro patria mortem non dubi-  
 taret occumbere . esto : fortes , & duri Spartiate : ma-  
 gnā habet uim Reip . disciplina . quid ? Cyrenæum  
 Theodorum , philosophum non ignobilem , non ne mira-  
 mur ? cui cū Lysimachus Rex crucem minaretur , istis  
 quæso , inquit , ista horribilia minitare purpuratis tuis :  
 Theodori quidem nihil interest , humi ne , an sublime  
 putrescat . cuius hoc dicto admoneor , ut aliquid etiam  
 de humatione , & sepultura dicendum existimem : rem  
 non difficilem , ijs præsertim cognitis , quæ de nihil sen-  
 tiendo paulo ante dicta sunt . de qua Socrates quidem  
 quid senserit , apparet in eo libro , in quo moritur : de  
 quo iam tam multa diximus . cum enim de immorta-  
 litate animorum disputauisset , & iam moriendi tem-  
 pus urgeret , rogatus à Critone quemadmodum sepe-  
 22 liri uellet , Multam uero , inquit , operam amici frustra  
 22 consumpsi : Critoni enim nostro non persuasi , me hinc  
 22 auolaturum , neque quidquam mei relicturum . ue-  
 22 runtamen Crito , si me assequi potueris , aut sicubi nas-  
 22 tus eris ; ut tibi uidebitur , sepelito . sed , mihi crede ,  
 22 nemo me uestrum , cū hinc excessero , cōsequetur . Præ-

clare

clare  
 vit de  
 & id  
 se ius  
 min  
 gam,  
 igitur  
 clare A  
 rentib  
 accidit  
 inferos  
 un ten  
 ciderit  
 est, uel e  
 sum. se  
 ad curru  
 tire cred  
 tur. at i  
 22 Vidi, u  
 22 Curru  
 quem H  
 Aetius,  
 22 Immo  
 nō igit  
 Floris.  
 non sin  
 22 Mater,  
 22 Neque  
 hæc cu  
 moestit



clare id quidē, qui & amico permiserit, & se ostende-  
rit de hoc toto genere nihil laborare. durior Diogenes,  
& id quidem sentiens, sed, ut Cynicus, asperius, proijci  
se iussit inhumatū. tum amici, uolucris ne & feris?  
minime uero, inquit: sed bacillum propè me, quo abi-  
gam, ponitote. quī poteris, illi? non enim senties. quid  
igitur mihi ferarū laniatus oberit nihil sentienti? præ-  
clare Anaxagoras: qui cū Lampfaci moreretur, quæ-  
rentibus amicis uellet ne Clazomenas in patriā, si quid  
accidisset, afferri, nihil necesse est, inquit: undiq; .n. ad  
infernōs tantūdem uiæ est. totaq; de ratione humationis  
unū tenendum est; ad corpus illam pertinere, siue oc-  
ciderit animus, siue uigeat. in corpore autem perspicuū  
est, uel extincto animo, uel elapso, nullum residere sen-  
sum. sed plena errorum sunt omnia. trahit Heclorem  
ad currum religatum Achilles: lacerari eum, & sen-  
tire credo putat. ergo hic ulciscitur, ut quidem sibi uide-  
tur. at illa sicut acerbissimam rem moeret.

- ” Vidi, uidere quod me passa ægerrime,  
” Curru Heclorem quadrijugo raptarier .  
quem Heclorem? aut quādiu ille erit Hector? melius  
Aetius, & aliquando sapiens Achilles.  
” Immo .n. uero corpus Priamo reddidi, Hectorē abstuli.  
nō igitur Heclores traxisti, sed corpus quod fuerat He-  
ctoris. ecce alius exoritur è terra, quī matrem dormire  
non sinat .  
” Mater, te appello, quæ curam somno suspensam leuas,  
” Neque te mei miseret: surge, & sepeli natum.  
hæc cum pressis & flebilibus modis, quī totis theatris  
mœstitiam inferant, concinuntur, difficile est non eos

dd



qui inhumati sunt, miseros iudicare :

» = prius quam fera,

» uolucresq;:-

metuit, ne laceratis membris minus bene utatur: ne cō-  
bustis, non extimescit.

» Heu reliquias semiaffi Regis denudatis ossibus

» Per terram sanie delibutam fœde diuexarier.

non intelligo, quid metuat, cum tam bonos septenarios  
fundat ad tibiam. tenendum est igitur, nihil curādum  
esse post mortem, cū multi inimicos etiam mortuos pu-  
niantur. execratur luculentis sanē uersibus apud En-  
nium Thyestes, primum ut naufragio pereat Atreus.  
durū hoc sanē: talis enim interitus non est sine graui  
sensu: illa inania,

» Ipse summis saxis fixus asperis,

» Euisceratus latere pendens, saxa spargens tabo,

» Sanie, & sanguine atro.

nō ipsa saxa magis sensu omni uocabunt, quā ille la-  
tere pendens, cui se hic cruciatum censet optare. quā  
essent dura, si sentiret? nulla sine sensu. illud ue-  
ro perquam inane:

» Neque sepulcrū quo recipiat habeat portū corporis,

» Vbi remissa humana uita corpus requiescat à malis.

Vides, quanto hæc in errore uersentur. portū esse cor-  
poris, & requiescere in sepulcro putat mortuum. ma-  
gna culpa Pelopi, qui nō erudierit filium, nec docuerit  
quatenus esset quidque curādum. sed quid singulorum  
opinionēs animaduertam, nationū uarios errores per-  
spicere cum liceat? condiunt Aegyptij mortuos, & eos  
domi seruant: Persæ etiam cæra circumlitos cōdiunt.



ut quāmaxime permaneant diuturna corpora. magorum mos est non humare corpora suorum, nisi à feris sint antea laniata. in Hyrcania plebs publicos alit canes: optimates domesticos. nobile autem genus canū illud scimus esse. sed pro sua quisque facultate parat, à quibus lanietur: eamq; optimā illi esse censent sepultura. permulta alia colligit Chrysippus, ut est in omni historia curiosus. sed ita tetra sunt quaedā, ut ea fugiat, & reformidet oratio. totus igitur hic locus est cōtēendus in nobis, nō negligēdus in nostris, ita tamē, ut mortuorū corpora nihil sentire sentiamus. quantū autem consuetudini, famēq; dandū sit, id curent uiui, sed ita, ut intelligant nihil ad mortuos pertinere. sed profecto mors tū aequissimo animo appetitur, cum suis se laudibus uita occidens consolari potest. nemo parum diu uixit, qui uirtutis perfectæ perfecto functus est munere. multa mihi ipsi ad mortem tempestiua fuerūt: quæ uti nam potuissē obire: nihil enim iam acquirebatur: cumulata erant officia uitæ: cū fortuna bella restabāt. quare si ipsa ratio minus perficiet, ut mortem negligere possimus: at uita acta perficiat, ut satis superq; uixisse uideamur. quanq̃ enim sensus abierit, tamen summis, & proprijs bonis & laudis, & gloriæ, quamuis nō sentiant, mortui nō carent. etsi enim nihil in se habeat gloria, cur expetatur: tamen uirtutem tanquam umbra sequitur. uerum multitudinis iudicium de bonis, siquādo est, magis laudandum est, quā illi ob eam rem beati. non possum autem dicere, quoquo modo hoc accipiat, Lycurgū, Solonem legū & publicæ disciplinæ carere gloria, Themistoclem, Epaminondam

dd ij



T V S C. Q V A E S T.

bellicæ uirtutis: ante enim Salaminā ipsam Neptunus  
obruet, quā Salaminij trophæi memoriam: priusq;  
Bœotia Leuētra tollentur, q̄ pugna Leuētrica gloria.  
multo etiā tardius fama deferet Curium, Fabricium,  
Calatinum, duos Scipiones, duos Africanos, Maxi-  
mum, Marcellum, Paulū, Catonem, Lælium, innumera-  
biles alios. quorum similitudinem aliquam qui arripue-  
rit, non eam fama populari, sed uera bonorum laude  
metiēs, fidēti animo, si ita res feret, gradietur ad mor-  
tem: in qua aut summum bonum, aut nullum malum  
esse cognouimus: secundis uero suis rebus uolet etiam  
mori: nō enim tam cumulus bonorum iucundus esse  
potest, quā molesta decessio. hanc sententiam signi-  
ficare uidetur Laconis illa uox, qui, cum Rhodius Dia-  
goras, Olympionices nobilis, uno die duos suos filios ui-  
ctores Olympiæ uidisset, accessit ad senem, & gratula-  
tus, morere Dyagora, inquit: nō enim in cœlum ascen-  
surus es. magna hæc, & nimium fortasse Græci putāt,  
uel tum potius putabant, isq; , qui hoc Dyagoræ dixit,  
permagnum existimans tres Olympionicas una ex do-  
mo prodire, cunctari illum diutius in uita fortunæ ob-  
iectum, inutile putabat ipsi. ego autem tibi quidē quod  
satis esset, paucis uerbis, ut mihi uidebar, responderam:  
concesseras enim, nullo in malo mortuos esse: sed ob  
eam causam contendi, ut plura dicerem, quod in desi-  
derio, & luctu hæc est consolatio maxima: nostrum  
enim & nostra causa susceptum dolorem modice ferre  
debemus, ne & nosmet ipsos amare uideamur. illa  
suspicio intolerabili dolore cruciat, si opinamur eos,  
quibus orbatī sumus, esse cum aliquo sensu in ijs ma-



lis, quibus uulgo opinantur. hanc excutere opinionem  
 mihimet radicitus uolui, eoq; fui fortasse longior. A.  
 Tu longior? non mihi quidem. prior enim pars oratio-  
 nis tua faciebat, ut mori cuperem; posterior, ut mo-  
 do non nollem, modo non laborarem: omni autem ra-  
 tione illud certe perfectum est, ut mortem nō ducerem  
 in malis. M. Num igitur etiam rhetorū epilogum desi-  
 deramus, an iam hanc artem planè relinquimus? A.  
 Tu uero istam ne reliqueris, quam semper ornaſti: &  
 quidem iure: illa enim te, si uere loqui uolumus, or-  
 nauerat. sed quinam est iste epilogus? aueo enim audi-  
 re, quidquid est. M. Deorum immortalium iudicia solēt  
 in scholis proferre de morte, nec uero ea fingere ipsi, sed  
 Herodoto auctore, alijsq; pluribus. Primum Argiæ sa-  
 cerdotis Cleobis & Biton filij prædicantur. nota fabula  
 est. cum enim illam ad solenne, & statum sacrificium  
 curru uehī ius esset satis longe ab oppido ad fanum, mo-  
 rarenturq; iumenta: tunc inuenes ij, quos modo nomi-  
 nauī, ueste posita corpora oleo perunxerunt, ad iugum  
 accesserunt. ita sacerdos aduecta in fanum, cum cur-  
 rus esset ductus à filijs, precata à dea dicitur, ut illis præ-  
 mium daret pro pietate, quod maximum homini dari  
 posset à deo: post epulatos cum matre adolescentes, som-  
 no se dedisse, mane inuentos esse mortuos. Simili pre-  
 catione Trophonius & Agamedes uſi dicuntur: qui, cum  
 Apollini Delphis templū exadificassent, uenerātes de-  
 um petierunt mercedem non paruam quidem operis, et  
 laboris sui, nil cerū, sed quod esset optimum homini.  
 quibus Apollo se id daturum ostendit post eius diei die-  
 tertiū: qui ut illuxit, mortui sunt reperi. indicauisse de

dd iij



um dicunt, & eum quidem deum, cui reliqui dii concessissent, ut præter cæteros diuinaret, mortem esse optimum homini. fertur etiam de Sileno fabella quædã: qui cū à Mida captus esset, hoc ei muneris pro sua missione dedisse scribitur; docuisse Regem, nō nasci homini longe optimum esse; proximum autem, quamprimum mori. quæ est sententia in Cresphonte usus Euripides.

- » Nam nos decebat cœtus celebrantes domum,
- » Lugere, ubi esset aliquis in lucem editus,
- » Humanæ uitæ uaria reputantes mala:
- » At, qui labores morte finisset graues,
- » Omnes amicos laude, & lætitia exequi.

simile quiddam est in consolatione Crantoris: ait enim Terinæum quendã Elisium, cum grauitè filij mortem mœreret, uenisse in Psycomantiū, quærentem quæ fuisset tantæ calamitatis causa: huic in tabellis treis huiusmodi uersiculos datos:

- » Ignaris homines in uita mentibus errant.
- » Euthymus potitur fatorum munere læto.
- » Sic fuit utilius finire ipsiq; tibiq;.

His & talibus auctõribus usi, confirmant causam, rebus à dijs immortalibus indicatam. Alcidas quidã rhetor antiquus in primis nobilis scripsit etiam laudationem mortis, quæ constat ex enumeratione malorum humanorū. cui rationes eæ, quæ exquisitiùs à philosophis colliguntur, defuerunt, ubertas orationis non defuit. claræ uero mortes pro patria appetitæ, non solum gloriosæ rhetoribus, sed etiam beatæ uideri solent. repetunt ab Erichtheo: cuius etiã filia cupide mortem ex-



petiuerunt pro uita ciuium: Codrum, qui se in medios  
 immisit hosteius famulari ueste, ne posset agnosci, si esset  
 ornatus regio: quoddam oraculum erat datum, si Rex inter=  
 fectus esset, uidelicet Athenas fore. Menecheus uero non  
 praetermittitur: qui oraculo edito largitus est patriae  
 suum sanguinem. Iphigenia Aulide duci se immolandam iu=  
 bet, ut hostium sanguis eliciatur suo. ueniunt inde ad  
 propiora. Harmodius in ore, & Aristogiton: Lacedae=  
 monius Leonidas, Thebanus Epaminondas uigent. no=  
 stros non norunt: quos enumerare magnus est: ita sunt  
 multi: quibus uidemus optabiles fuisse mortes cum glo=  
 ria. quae cum ita sint, magna tamen eloquentia est uten=  
 dum, atque ita uelut superiore loco concionandum, ut  
 homines mortem uel optare incipiant, uel certe timere  
 desistant. nam si supremus ille dies non extinctionem, sed  
 commutationem affert loci: quid optabilius? sin autem  
 perimit, ac delet omnino: quid melius, quam in medijs  
 uitae laboribus obdormiscere, & ita coniuuentem somno  
 consopiri sempiterno? quod si fiat, melior Ennii, quam  
 Solonis oratio: hic enim noster,

» Nemo me lacrymis decoret (inquit) nec funera fletu

» Faxit. at uero sapiens ille,

» Mors mea ne careat lacrymis: linguamus amicis

» Mœrorem, ut celebrent funera cum gemitu.

nos uero, si quid tale acciderit, ut à deo denunciatum  
 uideatur ut exeamus è uita, lati & agentes gratias  
 pareamus, emittiq; nos è custodia, & leuari uinculis  
 arbitremur, ut aut in aeternam, & planè in nostram  
 domum remigremus, aut omni sensu, molestiaq; ca=  
 reamus: sin autem nihil denunciabitur, eo tamen si=

dd iij



TVSC. QVAEST.

mus animo, ut horribilem illum diem alijs, nobis fau-  
stum putemus; nihilq; in malis ducamus, quod sit uel à  
dijs immortalibus, uel à natura parente omnium consti-  
tutum: non enim temere, nec fortuito sati, & creati  
sumus; sed profecto fuit quaedam uis, quæ generi con-  
suleret humano; nec id gigneret, aut aleret, quod, cum  
exanclauisset omnes labores, tū incideret in mortis ma-  
lum sempiternum: portum potius paratum nobis, &  
perfugium putemus. quod utinam uelis passis peruehi li-  
ceat. sin resstantibus uentis reijciemur, tamen eodē pau-  
lo tardius referamur necesse est. quod autē omnibus ne-  
cesse est, id ne miserum esse uni potest? habes epilogum,  
ne quid prætermisum, aut relictum putes. A. Ego ue-  
ro. & quidem fecit etiam iste me epilogus firmiorem.  
M. Optime, inquam. sed nunc quidem ualitudini tri-  
buamus aliquid: cras autem, & quot dies erimus in  
Tusculano, agamus hæc, & ea potissimū, quæ leuatio-  
nem habeant ægritudinum, formidinum, cupiditatū:  
qui omni è philosophia est fructus uberrimus.



M. TVLLII CICERONIS TV SCVLA  
 NARVM QVAESTIONVM  
 LIBER SECVNDVS,  
 DE TOLERANDO  
 DOLORE.

N

Eoptolemus quidem apud En-  
 niū philosophari sibi ait necesse  
 esse, sed paucis : nam omnino  
 haud placere . ego autē Brute  
 necesse quidē mihi esse arbitror  
 philosophari : nā quid possum,  
 praesertim nihil agēs, agere me-  
 lius ? sed nō paucis, ut ille : difficile est enim in philoso-  
 phia pauca esse ei nota, cui non sint aut pleraque, aut  
 omnia : nā nec pauca nisi ē multis eligi possunt ; nec  
 qui pauca percepit, nō idē reliqua eodē studio perseque-  
 tur. sed in uita tamē occupata, atque, ut Neoptolemi tū  
 erat, militari pauca ipsa multū saepe profunt, & ferūt  
 fructus, si nō tātos, quāti ex uniuersa philosophia perci-  
 pi possunt ; tamen eos, quibus aliqua ex parte interdū  
 aut cupiditate, aut aegritudine, aut metu liberemur : ue-  
 lut ex ea disputatione, quae mihi nuper habita est in  
 Tusculano, magna uidebatur mortis effecta cōtēptio :  
 quae nō minimū ualet ad animū metu liberandū : nam  
 qui id, quod uitari non potest, metuit, is uiuere animo  
 quieto nullo modo potest : sed qui, nō modo quia necesse  
 est mori, uerū etiā quia nihil habet mors quod sit horrē



## TVSC. QVAEST.

dum, mortem non timet, magnum is sibi praesidium ad beatam uitam comparat. quanquam non sumus ignari, multos studiose contra esse dicturos. quod uitare nullo modo potuimus: nisi nihil omnino scriberemus. etenim si orationes, quas nos multitudinis iudicio probari uolebamus (popularis est enim illa facultas, & effectus eloquentiae est audientium approbatio) sed si reperiatur non nulli, qui nihil laudarent, nisi quod se imitari posse confiderent; quemque sperandi sibi, eundem & bene dicendi finem proponerent; & cum obruerentur copia sententiarum atque uerborum, ieiunitatem & famem se malle, quam ubertatem, & copiam dicerent, unde erat exortum genus Atticorum, ipsi ipsis, qui id sequi se profitebantur, ignotum, qui iam conticuere penè ab ipso foro irrisi: quid futurum putamus, cum adiutore populo, quo utebamur antea, nunc minime nos uti posse uideamus? est enim philosophia paucis contenta iudicibus, multitudinem consulto ipsa fugiens, eique ipsi & sustenta, & inuisa: ut uel, si quis uniuersam uelit uituperare, secundo id populo facere possit; uel, si in eam, quam nos maxime sequimur, conetur inuadere, magna habere possit auxilia reliquorum philosophorum disciplinis. nos autem uniuersae philosophiae uituperatoribus respondimus in Hortensio. pro Academia autem quae dicebatur, satis accurate in Academicis quatuor libris explicata arbitramur. sed tamen tantum abest ut scribi contra nos nolumus, ut id etiam maxime optemus: in ipsa enim Graecia philosophia tanto in honore nunquam fuisset, nisi doctissimorum contentione diffensionibusque uiguisset. quamobrem hortor omnes, qui facere id pos-

sum  
Gra  
liqu  
que  
ora  
mum  
fene  
tur  
temp  
qui  
qui  
ell,  
eti  
tie  
ultra  
& re  
para  
nost  
bus  
titud  
multi  
eti  
eos,  
bica  
soph  
philo  
tini  
qui  
si il  
bus



sunt, ut huius quoque generis laudem iam languenti  
Græciæ eripiant, & perferat in hanc urbem, sicut re-  
liquas omnes, quæ quidem erant expetendæ, studio at-  
que industria sua maiores nostri transfulerunt. atque  
oratorum quidē laus ita ducta ab humili uenit ad sum-  
mum, ut iam, quod natura fert in omnibus ferè rebus,  
senescat, breuiq; tempore ad nihilum uentura uidea-  
tur. philosophia nascatur latinis quidem literis ex his  
temporibus; eamq; nos adiuuemus; nosq; ipsos redar-  
gui, refelliq; patiamur. quod ij ferunt animo iniquo,  
qui certis quibusdam, destinatisq; sententijs quasi addi-  
cti, & consecrati sunt, eaq; necessitate constricti, ut,  
etiam quæ non probare soleant, ea cogantur constan-  
tiæ causa defendere. nos, qui sequimur probabilia, nec  
ultra id, quod uerisimile occurrerit, progredi possumus,  
& refellere sine pertinacia, & refelli sine iracundia  
parati sumus. quod si hæc studia traducta erunt ad  
nostros, ne bibliothecis quidem græcis egebimus, in qui-  
bus multitudo infinita librorum propter eorum est mul-  
titudinem, qui scripserunt: eadem enim dicuntur à  
multis: ex quo libris omnia referferunt. quod accidet  
etiam nostris, si ad hæc studia plures confluxerint. sed  
eos, si possumus, excitemus, qui liberaliter eruditi, adhi-  
bita etiam differendi elegantia, ratione & uia philo-  
sophantur. est enim quoddam genus eorum, qui se  
philosophos appellari uolunt, quorum dicuntur esse la-  
tini sanè multi libri: quos non contemno equidem,  
quippe quos nunquā legerim: sed quia profitentur ip-  
si illi, qui eos scribunt, se neque distincte, neque distri-  
bute, neque eleganter, neque ornate scribere, lectio-



## TVSC. QVAEST.

nem sine ulla delectatione negligo: quid enim dicant,  
 & quid sentiant ij, qui sunt ab ea disciplina, nemo me  
 diocriter quidem doctus ignorat. quãobrem, quoniam,  
 quemadmodum dicant, ipsi non laborant; cur legendi  
 sint, nisi ipsi inter se, qui idem sentiunt, non intelligo.  
 nã ut Platonem, reliquosq; Socraticos, & deinceps eos,  
 qui ab his profecti sunt, legunt omnes, etiam qui illa  
 aut non approbant, aut non studiosissime consecratur;  
 Epicurum autem, & Metrodorũ non fere prater suos  
 quisquam in manus sumit: sic hos Latinos ij soli legũt,  
 qui illa recte dici putat. nobis autem uidetur, quidquid  
 literis mandetur, id commendari omnium eruditorum  
 lectione decere. nec, si ipsi minus consequi possumus, ic-  
 circo minus id ita faciendũ esse sentimus. itaque mihi  
 semper Peripateticorum, Academiãq; consuetudo, de  
 omnibus rebus in contrarias partes differendi, non ob  
 eam causam solum placuit, quodd aliter non posset,  
 quid in quaque re uerisimile esset, inueniri, sed etiam  
 quodd esset ea maxima dicendi exercitatio. qua prin-  
 ceptus est Aristoteles, deinde eum qui secuti sunt. no-  
 stra autem memoria Philo, quem nos frequenter audi-  
 uimus, instituit alio tempore rhetorum praecepta trade-  
 re, alio philosophorum. ad quam nos consuetudinem à  
 familiaribus nostris adducti, in Tusculano, quod da-  
 tum est temporis nobis, in eo consumpsimus. itaque  
 cum ante meridiem dictioni operam dedissemus, sicut  
 pridie feceramus; post meridiem in Academiam de-  
 scendimus. in qua disputationem habitam non quasi  
 narrantes exponimus, sed eisdem ferẽ uerbis, ut actũ,  
 disputatumq; est. est igitur ambulanti bus ad hũc mo-



dum sermo ille nobis institutus, & à tali quodam in-  
ductus exordio. A. Dici non potest, quàm sim hester-  
na disputatione tua delectatus, uel potius adiutus: etsi  
enim mihi conscius sum, nunquam ne nimis cupidum  
fuisse uitæ; tamen obijciebatur interdum animo metus  
quidam, & dolor, cogitanti fore aliquando finem hu-  
ius lucis, & amissionem omnium uitæ commodorum.  
hoc genere molestiæ sic, mihi crede, sum liberatus, ut ni-  
hil minus curandum putem. M. Minime mirum id  
quidem: nã efficit hoc philosophia: medetur animis:  
inanes sollicitudines detrahit: cupiditatibus liberat: pel-  
lit timores. sed hæc eius uis nõ idem potest apud omnes:  
tum ualet multũ, cũ est idoneam complexa naturam:  
fortes enim non modo fortuna adiuvat, ut est in uete-  
re prouerbio, sed multo magis ratio, quæ quibusdã quasi  
præceptis confirmat uim fortitudinis. te natura excel-  
sum quendam uidelicet, & aliũ, & humana despicien-  
tem genuit: itaque facile in animo forti contra mortẽ  
habita insedit oratio. sed hæc eadem num censes apud  
eos ipsos ualere, nisi admodum paucos, à quibus inuen-  
ta, disputata, conscripta sunt? quotus enim quisque phi-  
losophorũ inuenitur, qui sit ita moratus, ita animo, ac  
uita constitutus, ut ratio postulat; qui disciplinam suã  
non ostentationem scientiæ, sed legem uitæ putet; qui  
obtemperet ipse sibi, & decretis suis pareat? uidere li-  
cet alios tanta leuitate, & iactatione, ijs ut fuerit non  
didicisse melius; alios pecuniæ cupidos, gloriæ non nul-  
los; multos libidinum seruos: ut cũ eorum uita mira-  
biliter pugnet oratio. quod quidem mihi uidetur esse  
turpissimum. ut enim, si grammaticum se professus



TVSC. QVAEST.

quispiam, barbare loquatur; aut si absurde canat is, qui se haberi uelit musicum, hoc turpior sit, quod in eo ipso peccet, cuius proficetur scientiam: sic philosophus in ratione uitae peccans, hoc turpior est, quod in officio, cuius magister esse uult, labitur; artemque uitae professus, delinquit in uitae. A. Non ne uerendum igitur, si est ita, ut dicis, ne philosophiam falsa gloria exornes? quod est enim maius argumentum, nihil eam prodesse, quam quosdam perfectos philosophos turpiter uiuere? M. Nul lum uero id quidem argumentum est. nam ut agri non omnes frugiferi sunt, qui coluntur; falsumque illud, ac improbe,

- » Et si in segetem sunt deterio rem data
  - » Fruges, tamen ipse suapte natura enitent:
- sic animi non omnes culti fructum ferunt. atque ut in eodem simili uerfer, ut ager, quamuis fertilis, sine cultura fructuosus esse non potest, sic sine doctrina animus. ita est utraque res una sine altera debilis. cultura autem animi philosophia est: quae extrahit uitia radicitus, et preparat animos ad satus accipiendos; eaque mandata his, et ut ita dicam, serit, quae adulta fructus uberrimos ferant. agamus igitur, ut coepimus. dic, si uis, de quo disputari uelis. A. Dolorem existimo maximum malorum omnium. M. Etiam ne maius, quam dedecus? A. Non audeo id dicere quidem, et me pudet tam cito de sententia esse deiectum. M. Magis esset pudendum, si in sententia permaneres: quid enim minus est dignum, quam tibi quidquam peius uideri dedecore, flagitio, turpitudine? quae ut effugias, quis est non modo non recusandus, sed ultro appetendus, subeundus, excipiendus do



lor? A. Ita prorsus existimo. quare ne sit sanè summum malum dolor: malum est certe. M. Vides ne igitur, quantum, breuiter admonitus, de doloris terrore deieceris? A. Video planè: sed plus desidero. M. Experiari equidem: sed magna res est, animoq; mihi opus est non repugnante. A. Habebis id quidem: ut enim heri feci, sic nunc rationem, quod ea me cūque ducet, sequar. M. Primum igitur de imbecillitate multorum, & de uarijs disciplinis philosophorum loquar. quorum princeps & auctoritate, et antiquitate Socraticus Aristippus non dubitauit summū malum dolorem dicere. dehinc ad hanc enervatā, muliebremq; sententiam satis docilem se Epicurus præbuit. hunc post Rhodius Hieronymus dolore uacare summum bonum dixit: tantū in dolore duxit mali. ceteri, præter Zenonem, Aristonem, Pyrrhonem, idem ferè, quod modo tu: malum illud quidem, sed alia peiora. ergo id, quod natura ipsa, & quædam generosa uirtus statim respuit, ne dolorem summum malum diceret, oppositoq; dedecore sententia depelleret, in eo magistra uitæ tot secula permanet philosophia. quod huic officium, quæ laus, quod decus erit tanti, quod adipisci cum dolore corporis uelit, qui dolorem summum malum sibi esse persuaferit? quam porro quis ignominiam, quam turpitudinem non pertulerit, ut effugiat dolorem, si id summum malum esse decreuerit? quis autem non miser non modo tunc, cum premetur summis doloribus, si in his est summum malum; sed etiam cum sciet id sibi posse euenire? & quis est, cui non possit? ita fit, ut omnino nemo possit esse beatus. Metrodorus quidem eū perfecte pu-



T V S C. Q V A E S T.

rat beatum, cui corpus bene constitutum sit, & exploratum ita semper fore. quis autem est iste, cui id exploratum possit esse? Epicurus uero ea dicit, ut mihi quidem risus captare uideatur. affirmat enim quodam loco, si uratur sapiens, si crucietur: expectas fortasse, dum discat, patietur, perferet, non succubet: magna mehercule laus, & eo ipso, per quem iuravi, Hercule digna: sed Epicuro homini aspero et duro non est hoc satis: in Phalaridis tauro si erit, dicet, quod suave est hoc, quam hoc non curo. suave etiam? an parum est, si non amarum? at id quidem illi ipsi, qui dolorem malum esse negant, non solent dicere, cuiquam suave esse cruciari: asperum, difficile, odiosum, contra naturam dicunt, nec tamen malum. hic, qui solum hoc malum dicit, & malorum omnium extremum, sapientem censeat id suave dicturum. ego a te non postulo, ut dolorem eisdem uerbis afficias, quibus Epicurus uoluptatem, homo, ut scis, uoluptarius. ille dixerit sane idem in Phalaridis tauro, quod si esset in lectulo. ego tantam uim non tribuo sapienti contra dolorem: si fortis in perferendo, officio satis est: ut lateatur etiam, non postulo: tristis enim res est sine dubio, aspera, amara, inimica naturae, ad patiendum, tolerandumque difficilis. aspice Philoctetam: cui concedendum est gementi: ipsum enim Hercule uiderat in Oeta magnitudine dolorum eiulatem. nihil igitur hunc uirum sagittae, quas ab Hercule acceperat, tum consolabantur: Cum e uiperino morsu uenae uiscerum Veneno imbuta tetros cruciatus claret. itaque exclamat auxilium expetens, mori cupiens.

» Heu quis falsis fluctibus mandet  
» Me ex sublimi uertice saxi.

Iam

» Iam  
» Vis  
» diff  
» gno  
» Her  
» imm  
» apu  
» ra fa  
» sisset  
» O m  
» Que  
» Nec  
» Nec  
» Quan  
» Hac m  
» Que l  
» Vrgem  
» Iam de  
» Sic cor  
» Ipse illi  
» Hos mor  
» Moles g  
» Centas  
» Non C  
» Non fa  
» Quas  
» Sed fa  
» O ma  
» Ne me  
» Huc a



- „ Iam iam absumor : conficit animam  
 „ Vis uulneris , ulceris æstus.  
 difficile dictu uidetur , eum non in malo esse, & ma-  
 gno quidem , qui ita clamare cogatur . Sed uideamus  
 Herculem ipsum ; qui tum dolore frangebatur , cum  
 immortalitatem ipsa morte quærebat . quas hic uoces  
 apud Sophoclem in Trachinijs edit ? cui cum Deianira  
 sanguine centauri tinctam tunicam induisset, inhæ-  
 sissetq; ea uisceribus, ait ille , **οα ττο**  
 „ O' multa dictu grauiā , perpeßu aspera ,  
 „ Quæ corpore exanclato, atque animo pertuli .  
 „ Nec mihi Iunonis terror implacabilis,  
 „ Nec tantum inuexit tristis Eurystheus mali ,  
 „ Quantum una uecors Oenei partu edita .  
 „ Hæc me irretiuit ueste furiali inscium ,  
 „ Quæ lateri inherens morsu lacerat uiscera ,  
 „ Vrgensq; grauius pulmonum haurit spiritus :  
 „ Iam decolorem sanguinem omnem exorbuit :  
 „ Sic corpus clade horribili absumptum extabuit .  
 „ Ipse illigatus peste interimor textili .  
 „ Hos non hostilis dextra, non terra edita  
 „ Moles gigantum , non biformato impetu  
 „ Centaurus ictus corpori infixit meo ,  
 „ Non Graia uis , non barbara ulla immanitas,  
 „ Non sæua terris gens relegata ultimis ;  
 „ Quas peragrans, undique omnē hinc feritatem expuli:  
 „ Sed fœminea uir, fœminea interimor manu .  
 „ O' nate , uere hoc nomen usurpa patri ,  
 „ Ne me occidentem matris superet charitas .  
 „ Huc arripe ad me manibus abstractam pijs.

e e



T V S C. Q V A E S T.

» Iam cernam , me ne , an illam potiore putes .  
 » Perge , aude nate , illacryma patris pestibus :  
 » Miserere . gentes nostras flebunt miseras .  
 » Heu uirginalem me ore ploratum edere ,  
 » Quem uidit nemo ulli ingemiscens malo .  
 » Sic foeminata uirtus afflicta occidit .  
 » Accede nate , assiste , miserandum aspice  
 » Euisceratum corpus lacerati patris .  
 » Videte cuncti : inq; coelestem sator  
 » Iace obsecro in me uim coruscant fulminis .  
 » Nunc nunc dolorem anxiferi torquent uertices :  
 » Nunc serpit ardor . dante uictrices manus ,  
 » O' pectora , d terga , d lacertorum thori ,  
 » Vestro ne pressu quondam Nemeus leo  
 » Frendens efflauit grauiter extremum halitum ?  
 » Hæc dextra Lernam terram mactata excetra  
 » Placauit : hæc bicorpore afflixit manum :  
 » Erimanthiam hæc uastificam abiecit beluam :  
 » Hæc d Tartarea tenebrica abstractam plaga  
 » Tricipitem eduxit Hydra generatum canem :  
 » Hæc interemit tortu multiplicabili  
 » Draconem , auriferam obrutu obseruantem arborem .  
 » Multa alia uictrix nostra lustrauit manus ,  
 » Nec quisquam è nostris spolia cepit laudibus .  
 possumus ne nos contemnere dolorem , cum ipsum Her-  
 culem tam intoleranter dolere uideamus ? Veniat Aeschi-  
 lus non poeta solum , sed etiam Pythagoreus : sic enim  
 accepimus . quo modo fert apud eum Prometheus dolo-  
 rem , quem excipit ob furtum Lemnium , Vnde ignis  
 lucet mortalibus , clam diuisus ? eum Prometheus doctus

dep  
 igit  
 Tit  
 Gen  
 Vir  
 No  
 Sar  
 Ioni  
 Hos  
 Perr  
 Tran  
 lam  
 Trifi  
 Ioni  
 Tum  
 Clam  
 Pim  
 Cam  
 Tum  
 Sic  
 Qui  
 Nat  
 Arc  
 Sic  
 Am  
 Sed  
 Atq  
 Lu  
 Ex  
 Gu



clepsisse dolo penasq; Ioui fato expendisse supremo. has  
igitur poenas pendens, affixus ad Caucasum hæc dicit :

- ,, Titanum soboles socia nostri sanguinis  
 ,, Generata cœlo, aspiciite religatum asperis  
 ,, Vincitumq; saxis, nauem ut horrisono freto  
 ,, Noctem pauentes timidi adnectunt nauitæ.  
 ,, Saturnius me sic infixit Iupiter,  
 ,, Iouisq; numen Mulcibri adsciuit manus.  
 ,, Hos ille cuneos fabrica crudeli inserens,  
 ,, Perrupit artus: qua miser solertia  
 ,, Transuerberatus, castrum hoc furiarum incolo.  
 ,, Iam tertio me quoque funesto die,  
 ,, Tristi aduolatu, aduncis lacerans unguibus  
 ,, Iouis satelles pastu dilaniat fero.  
 ,, Tum iecore opimo farta, & satiata affatim  
 ,, Clangorem fundit uastum, & sublime aduolans  
 ,, Pinnata cauda nostrum adulat sanguinem.  
 ,, Cum uero adefum inflatu renouatum est iecur,  
 ,, Tum rursus tetros auida se ad pastus refert.  
 ,, Sic hunc custodem mœsti cruciatus alo:  
 ,, Qui me perenni uiuum fœdat miseria.  
 ,, Nanque, ut uidetis, uinclis constrictus Iouis,  
 ,, Arcere nequeo diram uolucrum à pectore.  
 ,, Sic me ipse uiduus pestes excipio anxias,  
 ,, Amore mortis terminum inquirens mali.  
 ,, Sed longe à leto numine appellor Iouis.  
 ,, Atque hæc uetusta seclis glomerata horridis,  
 ,, Lucifica clades nostro infixæ est corpori:  
 ,, Ex quo liquatæ solis ardore excidunt  
 ,, Gutte, quæ saxa assidue instillant Caucaasi.

ee ij



uix igitur posse uidemur ita affectum non miserum dicere: & si hunc miserum, certe dolorem malum. A. Tu quidem adhuc meam causam agis. sed hoc mox uidero. interea unde isti uersus? non enim agnosco. M. Dicam hercule: etenim recte requiris. uides ne abundare me otio? A. Quid tum? M. Fuiſti ſæpe credo, cum Athenis eſſes, in ſcholis philoſophorum. A. Vero, ac libenter quidem. M. Animaduertebas igitur, etſi tum nemo erat admodum copioſus, ueruntamen uerſus ab his admuſcari orationi. A. Ac multos quidem à Dionyſio Stoico. M. Probe dicis. ſed iſtæ quaſi dictata nullo deſectu, nulla elegantia. Philo & proprium numerum, et electa poemata, et loco adiungebat. itaque poſtquã adamaui hanc quaſi ſenilem declamationẽ, ſtudioſe equidem uitor noſtris poetis: ſed ſicubi illi defecerunt, uerti ipſe multa de græcis, ne quo ornamento in hoc genere diſputationis careret latina oratio. ſed uides ne, poetæ quid mali afferat? lamentantes inducunt fortiſſimos uiros: molliunt animos noſtros: ita ſunt deinde dulces, ut nõ legatur modo, ſed etiam ediscatur. ſic ad malã domeſticã diſciplinam, uitamq; umbratilem, et delicatam cum acceſſerunt etiam poetæ, neruos omnes uirtutis elidunt. reſte igitur à Platone educuntur ex ea ciuitate, quã finxit ille, cum mores optimos, & optimum Reip. ſtatũ exquisceret. at uero nos, docti ſcilicet à Græcia, hæc et à pueritia legimus, et didicimus, hanc eruditionem liberalem, et doctrinam putamus. ſed quid poetis irascimur? uirtutis magiſtri philoſophi inuenti ſunt, qui ſummum malum dolorem dicerent. at tu adoleſcens, cum id tibi paulo ante dixiſſes uideri, rogatus à me, etiam ne maius quã



dedecus, uerbo de sententia desisti. roga hoc idem Epicurum: maius dicet esse malum mediocre dolorem, quam maximum dedecus: in ipso enim dedecore mali nihil esse, nisi sequantur dolores. quis igitur Epicurum sequitur dolor, cum hoc ipsum dicit, summum malum esse dolorem, quo dedecus maius a philosopho nullum expecto? quare satis mihi dedisti, cum respondisti, maius tibi uideri malum dedecus, quam dolorem: hoc ipsum enim si tenebis, intelliges quam sit obsistendum dolori. nec tam querendum est, dolor malum ne sit; quam firmandus animus ad dolorem ferendum. concludunt rationibus Stoici, cur non sit malum: quasi de uerbo, non de re laboretur. quid me decipis Zeno? nam cum id, quod mihi horribile uidetur, tu omnino malum esse negas, capior, & scire cupio quo modo id, quod ego miserimum existimem, ne malum quidem sit. nihil est, inquit, nisi quod turpe, & uitiosum est. A. Ad ineptias redis: illud enim, quod me angebat, non eximis. scio dolorem non esse nequitiam. desine id me docere: hoc doce, doleam, nec ne doleam, nihil interesse. M. Numquam quidquam, inquit, ad beate quidem uiuendum, quod est in una uirtute positum, sed tamen est reiiciendum. cur? asperum est, contra naturam, difficile perpassu, triste, durum. hæc copia uerborum est; quod omnes uno uerbo malum appellamus, id tot modis posse dicere. definis tu mihi, non tollis dolorem, cum dicis asperum, contra naturam, uix quod ferri, tolerarique possit: nec mentiris: sed re succumbere non oportebat, uerbis gloriantem, dum nihil bonum nisi quod honestum, nihil malum nisi quod turpe. optare hoc quidem

ee iij



est, non docere. illud & melius, & uerius; omnia, quæ natura aspernatur, in malis esse; quæ asciscit, in bonis. hoc posito, & uerborum concertatione sublata, tantum tamen excellet illud, quod recte amplexantur isti, quod honestum, quod rectum, quod decorum appellamus, quod idem interdum uirtutis nomine amplectimur; ut omnia præterea, quæ bona corporis, & fortuna putantur, perexigua, & minuta uideantur, nec malum quidem ullum, nec, si unum in locum collata omnia sunt, cum turpitudinis malo comparanda. quare, si, ut initio concessisti, turpitudine peius est, quam dolor: nihil est planè dolor. nam dum tibi turpe, nec dignum uiro uidebitur gemere, eiulare, lamentari, frangi, debilitari, dolere, tum dignitas, tum decus aderit, tuque in ea intueberis, te continebis: cedit profecto uirtuti dolor, & animi inductione languescet: aut enim nulla uirtus est, aut contemnendus est omnis dolor. prudentiam ne uis esse, sine qua ne intelligi quidem ulla uirtus potest? quid ergo? ea patietur ne te quidquam facere nihil proficientem, & laborantem? an temperantia sinet te immoderate facere quidquam? an coli iustitia poterit ab homine propter uim doloris enunciante commissa, prudente conscios, multa officia relinquentem? quid, fortitudini, comitibusque eius, magnitudini animi, grauitati, patientiæ, rerum humanarum despicientiæ quo modo respondebis? afflicti ne, & iacens, & lamentabili uoce deplorans, audies, o uirum fortem? te uero ita affectum ne uirum quidem dixerit quisquam. amittenda igitur fortitudo est, aut sepeliendus dolor. ecquid scis igitur, si quid de Corinthiis tuis amiseris, posse ha-



bere te reliquam supelleſilem ſaluam; uirtutem autem ſi unam amiſeris, etſi amitti non poteſt uirtus, ſed ſi unam confeſſus fueris te non habere, nullam te eſſe habiturum? num igitur fortem uirum, num magno animo, num patientem, num grauem, num humana contemnentem poteſ dicere aut Philoctetam illum, (quàm te enim malo dicere: ſed ille certe non fortis) qui iacet in lectulo humido, qui

» Eiulatu, queſtu, gemitu, fremitibus

» Reſonando, multum flebiles uoces refert.

non ego dolorem, dolorem eſſe nego: cur enim fortitudo deſideraretur? ſed eum opprimi dico patientia. ſi modo eſt aliqua patientia: ſi nulla eſt, quid exornamus philoſophiam? aut quid eius nomine glorioſi ſumus? pungit dolor, uel fodiat ſanè. ſi nudus es, da ingulum: ſi rectus Vulcanijs armis, id eſt fortitudine, reſiſte: hæc enim te, niſi ita facies, cuſtos dignitatis relinquet, & deferet. Cretum quidem leges, quas ſiue Iuppiter, ſiue Minos ſanxit de Iouis quidem ſententia, ut poætæ ferunt; itemq; Lycurgi, laboribus erudiunt iuuentutem, uenando, currendo, eſuriendo, ſuiendo, algèdo, aſtuado. Spartæ uero pueri ad aram ſic uerberibus accipiuntur, ut multus è uisceribus ſanguis exeat, non nunquã etiã, ut, cum ibi eſſem, audiebam, ad necem: quorum non modo nemo exclamauit unquam, ſed ne ingemuit quidẽ. quid ergo? hoc pueri poſſunt, uiri nõ poterunt? & quod mos ualet, ratio non ualebit? intereſt aliud inter laborem, & dolorem. ſunt finitiſſima omnino, ſed tamen differunt aliquid. labor eſt functio quædã uel animi uel corporis grauioris operis, et muneris: dolor autẽ motus aſper

ee iij



in corpore à sensibus alienus . hæc duo Græci illi, quorū copiosior est lingua, quā nostra, uno nomine appellant . itaque industrios homines, illi studiosos, uel potius amantes doloris appellant : nos commodius laboriosos : aliud est enim laborare, aliud dolere . ò uerborum inops interdū, quibus abū dare te semper putas, Græcia . aliud, inquam, est dolere, aliud laborare . cum uarices secabantur C. Mario, dolebat : cum æstu magno ducebat agmen, laborabat . est inter hæc quædam tamen similitudo : consuetudo enim laborum perpeffionem dolorum efficiet faciliorem . itaque illi, qui Græciæ formam Rerū publicarum dederunt, corpora iuuenum firmari labore uoluerunt . quod spartiata etiam in foeminas transfulerunt : quæ cæteris in urbibus mollissimo cultu parietum umbris occuluntur . illi autem uoluerunt nihil horum simile esse apud Lacenas uirgines : quibus magis palæstra, Eurotas, sol, puluis, labor, militia in studio est, quā fertilitas barbara . ergo his laboriosis exercitationibus & dolor intercurrit nonnunquam . impelluntur, feruntur, abijciuntur, cadunt : & ipse labor quasi callum quoddam obducit dolori . militiam uero nostram dico, non spartiatarum, quorum procedit ad modum, ad tibiā, nec adhibetur ulla sine anapæstis pedibus hortatio . nostri exercitus primum unde nomen habeant, uides : de inde qui labor, quantus agminis : ferre plus dimidiati mensis cibaria : ferre, si quid ad usum uelint : ferre ual lum . nam scutum, gladium, galeam in onere nostri milites non plus numerant, quā humeros, lacertos, manus : arma enim membra militis esse dicunt . quæ quidem ita geruntur apte, ut, si usus foret, abieclis oneri-



bus, expeditis armis, ut membris pugnare possint. quid exercitatio legionum? quid ille cursus, clamor, quanti laboris est? ex hoc ille animus in praelijs paratus ad uulnera. adduc pari animo inexercitatum militem: mulier uidebitur. cur? tantum interest inter nouum & ueterem exercitum, quantum experti sumus. aetas tyronum plerunque melior: sed ferre laborem, contemnere uulnus, consuetudo docet. quin etiam uidemus ex acie efferri saepe saucios, & quidem rudem illum, et inexercitatum, quamuis leui ictu, ploratus turpissimos edere. at uero ille exercitatus, & uetus, ob eamque rem fortior, medicum modo requirens a quo obligetur,

» O Patrocles, inquit, ad uos adueniens auxilium & uestras manus peto,

» Priusquam oppeto mala pestem madata hostili manu:

» Neque sanguis ullo potis est pacto profluens consistere,

» Si qua sapientia magis uestra deuitari mors potest.

» Nanque Aesculapij liberorum saucij opplent porticus:

» Non potest accedi. =

Certe Euripylus hic quidem est. hominem exercitatum. ubi tantum luctus continuatus? uide, quam non flebiliter respondeat; rationem etiam afferat, cur aequo animo sibi ferendum sit.

» Qui alteri exitium parat,

» Eum scire oportet sibi paratam pestem ut participet parem.

abducet Patrocles credo, ut collocet in cubili, ut uulnus obliget, si quidem homo esset. sed nihil uidi minus: quarerit enim, quid actum sit.

» Eloquere, res Argium praelio ut se sustinet.



TVSC. QVAEST.

non potest effari tantum dictis, quantum factis suppetit laboris. Quiesce igitur, & uulnus alliga, etiā si Euripylus posset, non posset Aesopus.

=Vbi fortuna Hectoris

Nostram aciem inclinatam: =

& cetera explicat in dolore: sic est enim intemperans militaris in forti uiro gloria. ergo hęc ueteranus miles facere poterit, doctus uir, sapiensq; non poterit? ille uero melius, ac non paulo quidem. sed de consuetudine adhuc exercitationis loquor, non dum de ratione, & sapientia. aniculæ saepe in ediam biduum, aut triduum ferunt. subduc cibum unum diem athletæ: Iouem Olympium eum ipsum, cui se exercebit, implorabit: ferre non posse clamabit. consuetudinis magna uis est. perno Etant uenatores in niue: in montibus uri se patiuntur. inde pugiles cestibus contusi, ne ingemiscunt quidem. sed quid hos, quibus Olympiorum uictoria Consulatus ille antiquus uidetur? gladiatores, aut perditii homines, aut barbari quas plagas perferunt? quo modo illi, qui bene instituti sunt, accipere plagam malunt, quā turpiter uitare? quā saepe apparet nihil eos malle, quā uel domino satisfacere, uel populo? mitunt etiam uulneribus confecti ad dominos, qui quærant quid uelint: si satisfactum ijs sit, se uelle decumbere. quis mediocris gladiator ingemuit? quis uultum mutauit unquam? quis non modo stetit, uerum etiam decubuit turpiter? quis cum decubuisset, ferrum recipere iussus, collum contraxit? tantum exercitatio, meditatio, consuetudo ualet. ergo hoc poterit

>> Samnis spurcus homo, uita illa dignus, locoq;



uir natus ad gloriam ullam partem animi tam mollem  
habebit, quam non meditatione & ratione corroboret?  
crudele gladiatorum spectaculum, & inhumanum non  
nullis uideri solet: & haud scio an ita sit, ut nunc sit.  
cum uero fontes ferro depugnabant, auribus fortasse  
multa, oculis quidem nulla poterat esse fortior contra  
dolorem, & mortem disciplina. de exercitatione, &  
consuetudine, & commentatione dixi. age sis, nunc de  
ratione uideamus: nisi quid uis ad hac. A. Ego ne ut  
te interpellem? ne hoc quidem uellem: ita me ad creden-  
dum tua ducit oratio. M. Sit ne igitur malum dolor,  
nec ne, Stoici uiderint, qui contortulis quibusdam, ac  
minutis conclusiunculis, nec ad sensus permanentibus,  
effici uolunt non esse malum dolorem. ego illud, quid-  
quid sit, tantum esse, quantum uideatur, non puto:  
falsaq; eius uisione, & specie moueri homines dico ue-  
hementius, doloremq; eius omnem esse tolerabilem.  
unde igitur ordiar? an eadem breuiter attingam,  
quae modo dixi, quo facilius oratio progredi possit  
longius? Inter omnes igitur hoc constat, nec doctos ho-  
mines solum, sed etiam indoctos; uirorum esse for-  
tium, & magnanimorum, & patientium, & huma-  
na uincantium, toleranter dolorem pati. nec uero quis-  
quam fuit, qui eum, qui ita pateretur, non laudan-  
dum putaret. quod ergo & postulatur a fortibus,  
& laudatur, cum fit; id aut extimescere ueniens, aut  
non ferre praesens, non ne turpe est? atqui uide, ne, cum  
omnes rectae animi affectiones uirtutes appellentur, non  
sit hoc proprium nomen omnium, sed ab ea una, quae  
ceteris excellat, omnes nominatae sint: appellata est



T V S C. Q V A E S T.

enim à viro uirtus: uiri autem propria maxime est fortitudo: cuius munera duo maxima sunt, mortis, dolorisq; contemptio. utendum est igitur his, si uirtutis cōpotes, uel potius si uiri uolumus esse, quoniam à uiris uirtus nomen est mutuata. quæres fortasse, quo modo: & recte: talem enim medicinā philosophia proficitur. uenit Epicurus, homo minime malus, uel potius uir optimus: tantum monet, quantum intelligit: negligē, inquit, dolorem. quis hoc dicit? idem, qui dolorem summum malum. uix satis constanter. audiamus. si summus dolor est, inquit, breuem esse necesse est. A. Itera dum eadem ista mihi: non enim intelligo, quid summū dicas esse, quid breue. M. Summum, quo nihil sit superius: breue, quo nihil breuius. contemno magnitudinem doloris, à qua me breuitas temporis uindicabit ante penē, quā uenerit. sed si est tantus dolor, quantus Philoctetæ; bene planē magnus mihi quidem uidetur, sed tamen non summus: nihil enim dolet, nisi pes: possunt oculi: potest caput, latera, pulmones: possunt omnia. longe igitur abest à summo dolore. ergo, inquit, dolor diuturnus habet lætitiæ plus, quā molestiæ. nunc ego non possum tantum hominem nihil sapere dicere, sed nos ab eo derideri puto. ego summum dolorem (summum autem dico, etiam si decem atomis est maior alius) non continuo dico esse breuem: multosq; possum bonos uiros nominare, qui cōplures annos doloribus podagræ crucientur maximis. sed homo cautus nunq̄ terminat nec magnitudinis, nec diuturnitatis modum, ut sciam quid summū dicat in dolore, quid breue in tempore. omittamus igitur hūc nihil prorsus dicens



tem ; cogamusq; confiteri nō esse ab eo doloris remedia  
quærenda, qui dolorem malorum omnium maximum  
dixerit. quamuis idem forficulum se in torminibus, &  
in stranguria sua præbeat. aliunde igitur est quæren-  
da medicina, & maxime quidem, si, quid maxime cō-  
sentaneum sit, querimus, ab ijs, quibus, quod honestum  
sit, summum bonum ; quod turpe, summum uidetur  
malum. his tu præsentibus gemere, & te iactare non  
audebis profecto. loquetur enim eorum uoce uirtus ip-  
sa tecum. tu ne, cum pueros Lacedæmone, adolescentes  
Olympiæ, barbaros in arena uideris excipientes gra-  
uissimas plagas, & ferentes silentio ; si te forte dolor  
aliquis peruellerit, exclamabis ut mulier? non constan-  
ter, & sedate feres? ferri non potest : natura non pa-  
titur. audio. pueri ferūt gloria ducti, ferunt pudore  
alii, multi metu: et tamen ueremur, ut hoc, quod à tam  
multis, & quod tot locis perferatur, natura pa-  
tiatur? illa uero non modo patitur, uerum etiā postu-  
lat: nihil. n. habet præstantius; nihil, quod magis ex-  
petat, quàm honestatem, quàm laudem, quàm dignita-  
tem, quàm decus. hisce ego pluribus nominibus unam  
rem declarari uolo, sed utor, ut quammaxime signifi-  
cem, pluribus. uolo autem dicere illud homini longe op-  
timum esse, quod ipsum sit optandum per se, à uirtute  
profectum, uel in ipsa uirtute situm, sua sponte lauda-  
bile: quod quidem citius dixerim solum, quàm sum-  
mum bonum. atque ut hæc de honesto, sic de turpi  
contraria. nihil tam tetrum, nihil tam aspernan-  
dum, nihil homine indignius. quod si tibi persuasum  
est; principio enim dixisti plus in dedecore mali tibi ui-



deri, quàm in dolore: reliquum est, ut tute tibi imperes. quanquam hoc nescio quo modo dicatur, quasi duo simus, ut alter imperet, alter pareat: non in scite tamen dicitur: est enim animus in partes distributus duas, quarum altera rationis est particeps, altera expers. cum igitur præcipitur, ut nobismet ipsis imperemus, hoc præcipitur, ut ratio coerceat temeritatem. est in animis omnium ferè natura molle quiddam, demissum, humile, enervatum quodam modo, & languidum. si nihil esset aliud, nihil esset homine deformius: sed præsto est domina omnium, & regina ratio, quæ connixa per se, & progressa longius, fit perfecta uirtus. hæc ut imperet illi parti animi, quæ obedire debet, id uidendum est uiro. quonam modo, inquires? uelut seruo dominus, uelut imperator militi, uelut parens filio. si turpissime se illa pars animi geret, quam dixi esse mollem; si se lamentis muliebriter, lacrymisq; dedet, uinciatur, & constringatur amicorum, propinquorumq; custodijs: sæpe enim uidemus fractos pudore, qui ratione nulla uincerentur. ergo hos quidem, ut famulos, uinclis, ac custodia arceamus. qui autem erunt firmiores, nec tamen robustissimi, hos admonitu simili oportebit, ut bonos milites, reuocatos dignitatem tueri. non nimis in Niptris ille sapientissimus Græciæ saucius lamentatur, uel modice potius: Pedetentim (inquit) ite, & sedato nisu, ne successu arripiat maior dolor.

Pacuius hoc melius, quàm Sophocles. apud illū enim perquam flebiliter Vlyxes lamentatur in uulnere: tamen huic leuiter gementi illi ipsi, qui ferunt saucium, personæ grauitatem intuentes non dubitarunt dicere,



- » =Tu quoque Vlyxes,  
 » Quancquam grauitèr cernimus iclum,  
 » Nimis es penè animo molli, qui  
 » Consuetus in armis æuū agere.

intelligit poeta prudens ferendi doloris consuetudinem  
 esse non contemnendam magistrā. atque ille non  
 immoderate magno in dolore,

- » Retinete, tenete, opprimite, ulcus  
 » Nudate. heu miserum me, excrucior.  
 incipit labi: deinde illico desinit.

- » Operite, abscedite, iam iam  
 » Dimittite: nam attactu & quassu  
 » Sæuū amplificatis dolorem.

Vides ne, ut obmutuerit non sedatus corporis, sed casti-  
 gatus animi dolor? itaque in extremis Niptris alios  
 quoque obiurgat, idq; moriens,

- » Conqueri fortunam aduersam, non lamentari decet.  
 » Id uiri est officium. fletus muliebri ingenio additus.

huius animi pars illa mollior rationi sic paruit, ut seu-  
 ro imperatori miles prudēs. in quo uiro erit perfecta sa-  
 pietia (quē adhuc nos quidē uidemus neminē: sed philo-  
 sophorū sentētijs, qualis futurus sit, si modo aliquando  
 fuerit, exponitur) is igitur, siue ea ratio, quæ erit in eo  
 perfecta, atq; absoluta, sic illi parti imperabit inferiori,  
 ut iustus parēs probis filijs: nutu, quod uolet, cōficiet, nul-  
 lo labore, nulla molestia: eriget ipse se, suscitabit, instruet,  
 armabit, ut, tanq̃ hosti, sic obsistat dolori. quæ sunt ista  
 arma? contentio, confirmatio, sermoq; intimus, cum ipse  
 secū, caue turpe quidq̃, languidū, nō uirile. obuersentur  
 species honestæ animo: Zeno proponatur Eleates; qui  
 perpeffus est omnia potius, q̃ conscios delendæ tyrann-



nidis indicaret. de Anaxarcho Democritio cogitetur;  
 qui cum in manu Cyprij Nicocreontis Regis incidisset,  
 nullum genus supplicij deprecatus est, neque recusauit.  
 Calanus Indus, indoctus, ac barbarus, in radicibus  
 Caucaſi natus, ſua uoluntate uiuus combuſtus eſt.  
 nos, ſi pes condoluit, ſi dens, ſed fac totum dolere cor-  
 pus, ferre non poſſumus: opinio eſt. n. quædam effæ-  
 minata, ac leuis, nec in dolore magis, quàm eadem  
 in uoluptate; qua cum liqueſcimus, fluimusq; mollitia,  
 apud aculeum ſine clamore ferre non poſſumus. at ue-  
 ro C. Marius ruſticanus uir, ſed planè uir, cum ſecare-  
 tur, ut ſupra dixi, principio uetuit ſe alligari: nec  
 quiſquam ante Marium ſolutus dicitur eſſe ſectus. cur  
 ergo poſtea alij? ualuit auctoritas. uides ne igitur opi-  
 nionis eſſe, non naturæ malum? & tamen fuiſſe acré  
 morſum doloris, idem Marius oſtendit: crus enim al-  
 terum nō præbuit. ita & tulit dolorem ut uir, et, ut ho-  
 mo, maiorem ferre ſine cauſa neceſſaria noluit. totum  
 igitur in eo eſt, ut tibi imperes. oſtendi autem, quod  
 eſſet imperandi genus. atque hæc cogitatio, quid patien-  
 tia, quid fortitudine, quid magnitudine animi dignum  
 ſit, non ſolum animum comprimit, ſed ipſum etiam do-  
 lorem neſcio quo pacto mitiorem facit. ut enim ſit in  
 prælio, ut ignauus miles, ac timidus, ſimul ac uiderit  
 hoſtem, abiectio ſcuti fugiat, quantum poſſit, ob eamq;  
 cauſam pereat non nunquam, etiam integro corpore;  
 cum ei, qui ſteterit, nihil tale euenerit: ſic qui doloris  
 ſpeciem ferre non poſſunt, abijciunt ſe, atque ita affli-  
 cti, & exanimati iacent; qui autem reſliterunt, diſce-  
 dunt ſæpiſſime ſuperiores: ſunt enim quædam animi  
 ſimilitudines



similitudines cum corpore . ut onera contentis corporibus facilius feruntur , remissis opprimunt : simillime animus intentione sua depellit pressum omnem ponderum ; remissione autem sic urgetur , ut se nequeat extollere . Et si uerum querimus , in omnibus officiis persequendis animi est adhibenda contentio . ea est sola officij tanquam custodia . sed hoc quidem in dolore maxime est providendum , ne quid abiecte , ne quid timide , ne quid ignaue , ne quid seruiliter , muliebriter ue faciamus , in primisq; refutetur , ac reijciatur Philocteteus ille clamor . ingemiscere non nunquam uiro concessum est , idq; raro : eiulatus ne mulieri quidem . Et hic nimirum est fletus , quem duodecim tabulae in funeribus adhiberi uetuerunt . nec uero unquam ne ingemiscit quidem uir fortis , ac sapiens , nisi forte ut se intendat ad firmitatem , ut in stadio cursores exclamant quidam maxime possunt . faciunt idem , cum exercentur , athletae . pugiles uero , etiam cum feriunt aduersarium , in iactandis cestibus ingemiscunt : non quod doleant , animo ue succumbant ; sed quia in profundenda uoce omne corpus intenditur , uenitq; plaga uehementior . quid ? qui uolunt exclamare maius , num satis habent latera , fauces , linguam intendere , e quibus elici uocem , Et fundi uidemus ? toto corpore , atque omnibus ungulis , ut dicitur , contentioni uocis afferuiunt . genu mehercule M. Antonium uidi , cum contentente ipse pro se lege Varia diceret , terram tangere . ut enim balistae lapidum , Et reliqua tormenta telorum eo grauiores emissiones habent , quo sunt contenta , atque ad ducta uehemetius : sic uox , sic cursus , sic plaga hoc gra

ff



T V S C. Q V A E S T.

uīor, quo est missa contentius. cuius contentiōis cum tanta uis sit; si gemitus in dolore ad confirmādum animum ualebit, utemur: sin erit ille gemitus lamentabilis, si imbecillus, si abiectus, si flebilis; ei qui se dederit, uix eum uirum dixerim. qui quidem gemitus si leuationis aliquid afferret, tamen uideremus quid esset fortis, & animosi uiri. cum uero nihil imminuat doloris, cur frustra turpes esse uolumus? quid est enim fletu muliebri uiro turpius? atque hoc praeceptum, quod de dolore datur, patet latius: omnibus enim rebus, non solum dolori, simili contentione animi resistendum est. ira exardescit: libido concitatur. in eandem arcem confugiendum est: eadem sunt arma sumenda. sed quoniam de dolore loquimur, illa omittamus. ad ferendum igitur dolorem placide, & sedate, plurimum proficit toto pectore, ut dicitur, cogitare, quā id honestum sit. sumus enim natura, ut ante dixi, (dicendum est enim sapius) studiosissimi, appetentissimiq; honestatis. cuius si quasi lumen aliquod aspexerimus, nihil est, quod, ut eo potiamur, non parati simus & ferre, & perpeti. ex hoc cursu, atque impetu animorum ad ueram laudem, atque honestatem illa pericula adeuntur in praelijs. non sentiunt uiri fortes in acie uulnera, uel sentiunt, sed mori malunt, quā tantillum modo de dignitatis gradu dimoueri. fulgentes gladios hostium uidebant Decij, cum in aciem eorum irruebant. his leuabat omnem uulnerum metum nobilitas mortis, et gloria. num tum ingemuisse Epaminondam putas, cū una cum sanguine uitam effluere sentiret? imperantem enim patriam Lacedaemonijs relinquebat, quam acceperat ser



uientem . hæc sunt solatia , hæc fomenta summorum  
dolorum . dices , quid in pace ? quid domi ? quid in le-  
tulo ? ad philosophos me reuocas , qui in aciem non sæ-  
pe prodeunt . è quibus homo sanè leuis Heracleotes Dio-  
nysius , cum à Zenone fortis esse didicisset , à dolore  
deuictus est . nam cum ex renibus laboraret , ipso in  
eiulatu clamitabat , falsa esse illa , quæ antea de do-  
lore ipse sensisset . quem cum Cleanthes condiscipulus  
rogaret , quamnam ratio eum de sententia deduxisset ;  
respondit , quia , cum tantum operæ philosophiæ  
dedissem , dolorem tamen ferre non possem , satis es-  
set argumenti , malum esse dolorem . plurimos au-  
tem annos in philosophia consumpsi , nec ferre pos-  
sum : malum est igitur dolor . tum Cleanthem , cum  
pede terram percussisset , uersum ex Epigonis ferunt  
dixisse ,

» Audis ne hæc Amphiaræ sub terram abdite ?

Zenonem significabat : à quo illum degenerare dolebat .  
at non noster Possidonius : quem & sæpe ipse uidi , et id  
dicam quod solebat narrare Pompeius : se , cum Rhodū  
uenisset decedens ex Syria , audire uoluisse Possidoniū :  
sed cum audiisset eum grauius esse ægrum , quod ue-  
hementer eius artus laborarent , uoluisse tamen nobilissi-  
mum philosophum uisere : quem ut uidisset , & saluta-  
uisset , honorificisq; uerbis prosecutus esset , molesteq; se di-  
xisset ferre , quod eum non posset audire ; at ille , tu ue-  
ro , inquit , potes ; nec committam , ut dolor corporis effi-  
ciat , ut frustra tantus uir ad me uenerit . itaque narra-  
bat eum grauius , & copiose de hoc ipso , nihil esse bo-  
num , nisi quod honestū esset , cubātem disputasse : cumq;

ff ij



## TVSC. QVAEST.

quasi faces ei doloris admoherentur, saepe dixisse, nihil agis dolor, quamuis sis molestus; nunquam te esse confitebor malum. omninoq; omnes clari, & nobilitati labores cōtemnendo fiunt etiam tolerabiles. uidemus ne, apud quos eorum ludorum, qui gymnici nominantur, magnus honos sit, nullum ab ijs, qui in id certamen descendant, deuitari dolorem? apud quos autem uenandi, et equitandi laus uiget, qui hanc petessunt, nullum fugiunt dolorem. quid de nostris ambitionibus, quid de cupiditate honorum loquar? quæ flamma est, per quam non cucurrerint ij, qui hæc olim punctis singulis colligebant? itaque semper Africanus Socraticum Xenophontem in manibus habebat. cuius in primis laudabat illud quod diceret, eosdem labores non esse æque graues imperatori, & militi, quod ipse honos laborem leuiorem faceret imperatorum. sed tamen hoc euenit, ut in uulgus insipientium opinio ualeat honestatis, cum ipsam uidere non possint. itaque fama & multitudinis iudicio mouentur, ut id honestum putent, quod à plerisque laudetur. te autem, si in oculis sis multitudinis, tamen eius iudicio stare nolim, nec, quod illa putet, idem te putare pulcherrimum. tuo tibi iudicio est utendum. tibi si re-  
 Ele probanti placebis, tum non modo tu te uiceris, quod paulo ante præcipiebam; sed omnes, & omnia. hoc igitur tibi propone, amplitudinem, & quasi quandam exaggerationem quamaltissimā animi, quæ maxima eminet contemnendis, & despicendis doloribus, unam esse omnium rem pulcherrimam, eoq; pulchriorem, si uacet populo, neque plausum captans



se tantum ipsa deleat. quin etiam mihi quidem laudabiliora videntur omnia, quæ sine uenditione, & sine populo teste fiunt: non quo fugiendus sit (omnia enim benefacta in luce se collocari uolunt) sed tamen nullū theatrum uirtuti conscientia maius est. atque in primis meditemur illud, ut hæc patientia dolorum, quam sæpe iam animi intentione dixi esse firmandam, in omni genere se æquabilem præbeat: sæpe enim multi, qui aut propter uictoriæ cupiditatem, aut propter gloriæ, aut etiam ut ius suum, & libertatem tenerent, uulnera exceperunt fortiter, & tulerunt, iidem ommissa contentione dolorem morbi ferre non possunt: neque enim illū, quem facile tulerant, ratione aut sapientia tulerāt, sed studio potius, & gloria. itaque barbari quidam, & immanes ferro decertare acerrime possunt, ægotare uiriliter non queunt. Græci autem homines non satis animosi, prudentes, ut est captus hominum, satis hostem aspicere non possunt, sed iidem morbos tolerāter, atque humane ferunt. at Cimbri, & Celtiberi in prælio exultant, lamentantur in morbo: nihil enim potest esse æquabile, quod nō à certa ratione proficiscatur. sed cum uideas, eos, qui aut studio, aut opinione ducantur, in eo persequendo, atque adipiscendo, dolore non frangi: debes existimare aut non esse malum dolorem, aut, etiam si, quidquid asperum, alienumq; à natura sit, id appellari placeat malū, tantulum tamen esse, ut à uirtute ita obruatur, ut nusquam appareat. quæ meditare quæso dies, & noctes: latius enim manabit hæc ratio, & aliquanto maiorem locum, quàm de uno dolore, occupabit: nam si omnia fugiendæ turpitudinis, adia-

ff ij



T V S C. Q V A E S T.

piscendæq; honestatis causa faciemus, non modo stimu-  
los doloris, sed etiam fulmina fortunæ cōtemnamus li-  
cebit, præsertim cum paratum sit illud ex hesterna di-  
sputatione perfugiū: ut enim si cui nauiganti, quæ præ-  
dones insequantur, deus quis dixerit, eijce te de nauī,  
præsto est qui excipiat, uel delphinus, ut Arionem Me-  
thymnæum; uel equi Pelopis illi Neptunij, qui per un-  
das currus suspensos rapuisse dicuntur, excipient te, et,  
quod uelis, perferent, omnem omittat timorem: sic ur-  
gentibus asperis & odiosis doloribus, si tanti non sint,  
ut ferendi sint; quod sit confugiendum, uides. Hæc fe-  
rè hoc tempore putauī esse dicenda. sed tu fortasse in  
sententia permanes. A. Minime uero: meq; biduo dua-  
rum rerum, quas maxime timebam, spero liberatum  
metu. M. Cras ergo ad clepsydram: sic enim duximus.  
sed tibi hoc uideo non posse deberi. A. ita prorsus. &  
illud quidem ante meridiem, hoc eodē tempore. M. Sic  
faciemus, tuisq; optimis studijs obsequemur.



M. TVLLII CICERONIS TV SCVLA-  
 NARVM QVAESTIONVM  
 LIBER TERTIVS, DE  
 AEGRITVDINE  
 LENIENDA.

*Q*uidnam esse Brute causæ putem, cur,  
 cum constemus ex animo, et corpore,  
 corporis curandi tuendiq; causa quæsi-  
 ta sit ars eius, atque utilitas, deorum  
 immortalium inuentioni consecrata;  
 animi autem medicina nec tam desiderata sit ante quā  
 inuēta, nec tam culta posteaquam cognita est, nec tam  
 multis grata, & probata, pluribus etiam suspecta &  
 inuisa? an quidd corporis grauitatem, & dolorem ani-  
 mo iudicamus, animi morbum corpore non sentimus?  
 ita fit, ut animus de se ipse tum iudicet, cum id ipsum,  
 quo iudicat, ægrotet. quodd si tales nos natura genuisset,  
 ut eam ipsam intueri, & perspicere, eademq; optima  
 duce cursum uitæ conficere possemus: haud erat sanè,  
 quod quisquam rationem ac doctrinam requireret.  
 nunc paruulos nobis dedit igniculos, quos celeriter  
 malis moribus, opinionibusq; deprauatis sic restingui-  
 mus, ut nusquam naturæ lumen appareat: sunt enim  
 ingenijs nostris semina innata uirtutum: quæ si ado-  
 lescere liceret, ipsa nos ad beatam uitam natura per-  
 duceret. nunc autem, simul atque editi in lucem, &  
 suscepti sumus, in omni continuo prauitate, & in sum-

ff iij



ma opinionum peruersitate uersamur: ut penè cum la-  
 cte nutricis errorem suxisse uideamur. cum uero parè-  
 tibus redditi, idest magistris traditi sumus, tum ita ua-  
 rijs imbuimur erroribus, ut uanitati ueritas, & opinio-  
 ni confirmata natura ipsa cedat. accedunt etiā poe-  
 tae: qui cum magnam speciem doctrinae, sapientiaq; prae-  
 tulerunt, audiuntur, leguntur, ediscuntur, & inhæ-  
 rescunt penitus in mentibus. cum uero accedit eodem,  
 quasi maximus quidam magister, populus, atque om-  
 nis undique ad uitia consentiens multitudo, tū planè  
 inficimur opinionum prauitate, à naturaq; ipsa descisci-  
 mus: ut nobis optimam naturam inuidisse uideantur,  
 qui nihil melius homini, nihil magis expetendum, nihil  
 præstantius honoribus, imperijs, populari gloria iudi-  
 cauerunt. ad quam fertur optimus quisque; ueramq;  
 illam honestatem expetens, quam unam natura maxi-  
 me inquit, in summa inanitate uersatur; confecta-  
 turq; nullam eminentem effigiem uirtutis, sed adūbra-  
 tam imaginem gloriae: est enim gloria, solida quædam  
 res, & expressa, non adumbrata. ea est consentiens laus  
 bonorum, incorrupta uox bene iudicantium de excellen-  
 te uirtute. ea uirtuti resonat tanquam imago gloriae.  
 quæ quia recte factorum plerunque comes est, non est  
 à bonis uiris repudianda. illa autem, quæ se eius imita-  
 tricem esse uult, temeraria, atque inconsiderata, &  
 plerunque peccatorum uitiorumq; laudatrix, fama po-  
 pularis, simulatione honestatis formam eius, pulchritu-  
 dinemq; corrumpit. qua cæcitate homines, cū quædam  
 præclara etiam cuperent, eaq; nescirent nec ubi, nec  
 qualia essent, funditus alij euerterunt suas ciuitates, alij



ipsi occiderunt . atque hi quidem optima petentes , non  
 tam uoluntate , quàm cursus errore falluntur . quid , qui  
 pecuniæ cupiditate , qui uoluptatum libidine feruntur ,  
 quorum ita perturbantur animi , ut non multum ab-  
 sint ab insania , quod insipientibus omnibus contingit :  
 his nulla ne est adhibenda curatio ? uerum quòd minus no-  
 ceant animi ægrotatione , quàm corporis ; an quòd cor-  
 pora curari possint , animorum nulla medicina sit ? at  
 & morbi perniciosiores , pluresq ; sunt animi , quàm cor-  
 poris : hi enim ipsi odiosi sunt , quòd ad animum perti-  
 nent , eumq ; sollicitant , animusq ; æger , ut ait Ennius ,  
 semper errat , neque pati , neque perpeti potest , cupere  
 nunquam desinit . quibus duobus morbis , ( ut omittam  
 alios ) ægritudine , & cupiditate , qui tandem possunt  
 in corpore esse grauiiores ? qui uero probari potest , ut si  
 bi mederi animus non possit , cum ipse medicinam cor-  
 poris animus inuenerit , cumq ; ad corporum sanationem  
 multum ipsa corpora , & natura ualeat , nec omnes , qui  
 se curari passi sunt , continuo etiã conualescant , ani-  
 mi autem , qui se sanari uoluerint , præceptisq ; sapien-  
 tium paruerint , sine ulla dubitatione sanentur ? est pro-  
 fecto animi medicina philosophia : cuius auxilium non ,  
 ut in corporis morbis , petendum est foris ; omnibusq ; opi-  
 bus , uiribusq ; , ut nosmet ipsi nobis mederi possimus , ela-  
 borandũ est . quanquam de uniuersa philosophia , quan-  
 toperè & expetenda , & colenda esset , satis , ut arbi-  
 tror , dictum est in Hortensio . de maximis autem re-  
 bus nihil ferè intermisimus postea nec disputare , nec scri-  
 bere . his autem libris exposita sunt ea , quæ à nobis cum  
 familiaribus nostris in Tusculano erant disputata . sed



T V S C. Q V A E S T.

quoniam duobus superioribus de morte, et de dolore dictum est: tertius dies disputationis hoc tertium volumen efficiet. ut enim in Academiam nostram descendimus, inclinatio iam in postmeridianum tempus die, poposci eorum aliquem, qui aderant, causa differendi. tum res acta sic est. A. Videtur mihi cadere in sapientem ægritudo. M. Num reliquæ quoque perturbationes animi, formidines, libidines, iracundiæ? hæc enim ferè sunt eiusmodi: quæ Græci πᾶν appellant, ego poteram morbos, & id uerbum esset è uerbo, sed in consuetudinem nostram non caderet. nam misereri, inuidere, gestire, letari, hæc omnia morbos Græci appellant, motus animi rationi non obtemperantes: nos autem hos eosdem motus concitati animi recte, ut opinor, perturbationes dixerimus, morbos autem non satis usitate: nisi quid aliud tibi uidetur. A. Mihi uero isto modo. M. Hæcine igitur cadere in sapientem putas? A. Prorsus existimo. M. Næ ista gloriosa sapientia non magno æstimanda est, siquidem non multum differt ab insania. A. Quid? tibi omnis ne animi commotio uidetur insania? M. Non mihi quidem soli: sed id, quod admirari sæpe soleo, maioribus quoque nostris hoc ita uisum intelligo multis seculis ante Socratem: à quo hæc omnis, quæ est de uita, & moribus, philosophia manauit. A. Quonam tandem modo? M. Quia nomen insaniæ significat mentis ægrotationem, et morbum, id est insanitatem, & ægritudinem animi, quàm appellarunt insaniam. omnes autem perturbationes animi, morbos philosophi appellant; negantque stultum quenquam his morbis uacare. qui autem in morbo sunt, sani non sunt:



Et omnium insipientium animi in morbo sunt, omnes insipientes igitur insaniunt: sanitatem enim animorū, positam in tranquillitate quadam, constantiaq; cēsebāt. his rebus mentem uacuam appellarunt insaniam, propterea quod in perturbato animo, sicut in corpore, sanitas esse non possit. nec minus illud acute, quod animi affectionem lumine mētis carentem nominauerūt amētiam, eandemq; dementiam. ex quo intelligendum est, eos, qui hęc rebus nomina posuerunt, sensisse hoc idem, quod à Socrate acceptum diligenter Stoici retinuerūt, omnes insipientes esse non sanos. qui enim animus est in aliquo morbo, (morbos autem hos perturbatos motus, ut modo dixi, philosophi appellant) non magis est sanus, q̄ id corpus, quod in morbo est. ita fit, ut sapientia sanitas sit animi, insipientia autem quasi insanitas quædam, quæ est insania, eademq; dementia. multoq; melius hęc notata sunt uerbis latinis, q̄ græcis. quod alijs quoque multis locis reperietur. sed id alias. nunc, quod instat. Totum igitur id, quod quærimus, quid et quale sit, uerbi uis ipsa declarat: eos enim sanos intelligi necesse est, quorum mens motu, quasi morbo, perturbata nullo sit. qui contra affecti sunt, hos insanos appellari necesse est. itaque nihil melius, q̄ quod est in consuetudine sermonis latini, cum exisse ē potestate dicimus eos, qui effrenati feruntur aut libidine, aut iracundia: quanquam ipsa iracūdia libidinis est pars: sic enim difinitur iracundia, ulciscendi libido. qui igitur exisse ex potestate dicuntur, iccirco dicuntur, quia non sunt in potestate mentis, cui regnum totius animi à natura tributum est. Græci autem μανία unde appellent,



non facile dixerim. eam tamen ipsam distinguimus nos melius, quàm illi. hanc enim insaniam, quæ iuncta stultitiæ patet latius, à furore disiungimus. Græci uolunt illi quidem, sed parū ualent uerbo: quem nos furorem, μελαγχολίαν illi uocāt: quasi uero atra bili solum mens, ac non sepe uel iracundia grauiore, uel timore, uel dolore moueatur. quo genere Athamātem, Alcmaëonem, Aiacem, Orestem furere dicimus. qui ita sit affectus, eum dominum esse rerum suarum uetāt duodecim tabulæ. itaque non est scriptum, si insanus, sed si furiosus esse incipit: stultitiam enim censuerunt, id est inconstantiam sanitate uacantem, posse tamen tueri mediocritatem officiorum, & uitæ cōmunem cultum, atque usitatum: furorem autem esse rati sunt mentis ad omnia cecitatem. quod cum maius esse uideatur, quàm insania; tamen eiusmodi est, ut furor in sapientem cadere possit, non possit insania. sed hæc alia quæstio est. nos ad propositū reuertamur. Cadere opinor in sapientem ægritudinē tibi dixisti uideri. A. Ego uero ita existimo. M. Humanum id quidem, quodd ita existimas: nō enim filice nati sumus: sed est naturale in animis tenerum quiddā, atque molle, quod ægritudine, quasi tempestate, quatiatur. nec absurde Crantor ille, qui in nostra Academia uel in primis fuit nobilis. Minime, inquit, assentior ijs, qui istam nescio quam indolentiam magnopere laudant: quæ nec potest ulla esse, nec debet. ne ægrotus sim, inquit: sed si fuerim, sensus adsit, siue secetur quid, siue auellatur à corpore. nam istuc nihil dolere, non sine magna mercede contingit, immanitatis in animo, stuporis in corpore. Sed uideamus, ne



hæc oratio sit hominum assentantium nostræ imbecillitati, & indulgentium mollitudini. nos autem audeamus non solum ramos amputare miseriarum, sed omnes radicum fibras euellere. tamen aliquid relinquetur fortasse: ita sunt stirpes altæ stultitiæ. sed relinquetur id solum, quod est necessarium. illud quidem sic habeto, nisi sanatus animus sit, quod sine philosophia fieri non potest, finem miseriarum nullum fore. quamobrè, quoniam coepimus, tradamus nos ei curandos. sanabimur, si uolemus. & progrediar quidem longius: non enim de ægritudine solum, quanquam id quidem primum; sed de omni animi, ut ego posui, perturbatio-  
ne, morbo, ut Græci uolunt, explicabo. & primo, si placet, Stoicorum more agamus; qui breuiter as-  
tringere solent argumenta: deinde nostro instituto uagabi-  
mur. Qui fortis est, idem est fidens: quoniam cōfidens mala consuetudine loquendi in uitio ponitur, ductum uerbum à confidendo, quod laudis est. qui autem est fi-  
dens, is profecto non extimescit: discrepat enim à ti-  
mendo, confidere. atque in quæ cadit ægritudo, in eun-  
dem timor: quarum enim rerum præsentia sumus in ægritudine, easdem impendentes, et uenientes timemus. ita fit, ut fortitudini ægritudo repugnet. uerisimile est igitur, in quem cadit ægritudo, in eundem cadere timorem, & infractionem quandam animi, & demissio-  
nem. in quemq; ea cadunt, in eundem cadit ut seruiat, ut uictum quandoque se esse fateatur. quæ qui recipit, recipiat idem necesse est timiditatem, & ignauiam. nō cadunt autem hæc in uirum fortem: igitur ne ægritu-  
do quidem. at nemo sapiens, nisi fortis: nō cadet ergo in



T V S C. Q V A E S T.

sapientem ægritudo. præterea necesse est, qui fortis sit, eundem esse magni animi; qui magni animi, inuictū; qui inuictus, eum humanas res despicere, atque infra se positas arbitrari. despicere autem nemo potest eas res, propter quas ægritudine affici potest. ex quo efficitur, fortem uirum ægritudine nunquam affici. omnes autem sapientes fortes: nō cadit igitur in sapientem ægritudo. & quemadmodum oculus conturbatus non est probe affectus ad suum munus fungendum; & reliquæ partes, totum uel corpus, à statu cum est motum, deest officio suo, & muneri: sic conturbatus animus nō est aptus ad exequendum munus suum. munus autem animi est, ratione bene uti; et sapientis animus ita semper affectus est, ut ratione optime utatur: nunquam est igitur perturbatus. at ægritudo perturbatio est animi: semper igitur ea sapiens uocabit. uerisimile etiam illud est, qui sit temperans, quem Græci σωφρονα appellant, eamque uirtutem σωφροσύνη uocant, quam soleo equidem tum temperantiam, tum moderationem appellare, non nunquam etiam modestiam. sed haud scio, an recte ea uirtus frugalitas appellari possit. quod angustius apud Græcos ualet: qui frugi homines χεῖρσι σίμους appellant, id est tantummodo utiles. at illud latius: est enim omnis abstinentia, omnis innocentia, quæ apud Græcos usitatum nomen nullum habet, sed habere potest ἀβλάβειαν: nam est innocentia affectio talis animi, quæ noceat nemini. reliquas etiam uirtutes frugalitas continet. quæ nisi tanta esset, & si ijs angustius, quibus plerique putant, teneretur, nunquam esset L. Pisonis cognomē tantopere laudatum. sed quia nec

qui  
uic  
didi  
male  
eo tr  
galit  
tutur  
reliq  
cesse  
appet  
dini  
trario  
fruge  
(et si  
temu  
ne :  
si ma  
stana  
turb  
fune  
non i  
apud  
" Cor  
" Cum  
num  
num  
gidu  
men  
per  
at i



qui propter metum praesidium reliquit, quod est ignavia; nec qui propter auaritiā clam depositū non reddidit, quod est iniustitiā; nec qui propter temeritatē male rem gessit, quod est stultitiā; frugi appellari solet; eo tres uirtutes, fortitudinem, iustitiā, prudentiam, frugalitas complexa est. etsi hoc quidem commune est uirtutum: omnes enim inter se nexae, & coniugatae sunt. reliqua igitur, et quarta uirtus ut sit ipsa frugalitas, necesse est: eius enim uidetur esse proprium motus animi appetentis regere, et sedare; semperq; aduersantem libidini, moderatam in omni reservare constantiā. cui contrarium uitium nequitia dicitur. frugalitas, ut opinor, à fruge: qua nihil melius è terra oritur. nequitia ab eo (etsi hoc erit fortasse durius: sed tentemus, et luisse putemur, si nil sit) ab eo, quod nequidquā est in tali homine: ex quo idem nihili dicitur. qui sit frugi igitur, uel, si mauis, moderatus, et temperans, eum necesse est esse constantem; qui autem constans, quietum; qui quietus, perturbatione omni uacuum; ergo etiam ægritudine. & sunt illa sapientis: aberit igitur à sapiente ægritudo. itaq; non inscite Heracleotes Dionysius ad ea disputat, quæ apud Homerū Achilles queritur, hoc, ut opinor, modo,

” Corq; meum penitus turgescit tristibus iris,

” Cum decore, atque omni me orbatum laude recordor. num manus affecta recte est, cum in tumore est? aut num aliquod quoppiam membrum tumidum, ac turgidum non uitiose se habet? sic igitur inflatus, & tumens animus in uitio est. sapientis autem animus semper uacat uitio, nunquam turgescit, nunquam tumet. at iratus animus eiusmodi est: nunquam igitur sapiens



T V S C . Q V A E S T .

irascitur : nam si irascitur, etiam concupiscit : proprium est enim irati, cupere, à quo læsus uideatur, ei quāmaximum dolorem inurere . qui autem id concupierit, eū necesse est, si id cōsecutus sit, magnopere letari . ex quo fit, ut alieno malo gaudeat . quod quoniam non cadit in sapientem, ne ut irascatur quidem cadit . si autem caderet in sapientem ægritudo, caderet etiam iracūdia . qua quoniam uacat, ægritudine etiam uacabit . etenim si sapiens in ægritudinem incidere posset, posset etiam in misericordiā, posset in inuidentiā : nō dixi in inuidiā, quæ tum est, cum inuidetur : ab inuidendo autē inuidentiā recte dici potest, ut effugiamus ambiguum nomen inuidiæ : quod uerbum ductum est à nimis intue do fortunam alterius, ut est in Menalippo,

» Florem quisnam liberum inuidit meum ?

male latine uidetur . sed præclare Aëtius : ut enim uidere, sic inuidere florem rectius, quā florī dicitur . nos consuetudine prohibemur : poeta ius suum tenuit, & dixit audacius . Cadit igitur in eundem, & misereri & inuidere . nam qui dolet rebus alicuius aduersis, idem alicuius etiam secundis dolet : ut Theophrastus interitum deplorans Callisthenis sodalis sui, rebus Alexandri prosperis angitur : itaque dicit Callisthenē incidisse in hominem summa potentia, summaq; fortuna, sed ignarum quemadmodum rebus secundis uti conueniret, atqui quemadmodum misericordia ægritudo est ex alterius rebus aduersis, sic inuidētia ægritudo est ex alterius rebus secundis . in quem igitur cadit misereri, in eundem etiam inuidere . non cadit autem inuidere in sapientē : ergo ne misereri quidē . quod si hoc

agre



ægre ferre sapiens soleret, miserevi etiam soleret. abest  
 ergo à sapiente ægritudo. hæc sic dicuntur à Stoicis,  
 concludunturq; contortius. sed laus aliquanto dicen-  
 da sunt, & diffusius. sententijs tamen utendū est eorū  
 potissimum, qui maxime forti, & ut ita dicam, uirili  
 utuntur ratione, atque sententia. nam Peripatetici fa-  
 miliares nostri, quibus nihil est uberius, nihil eruditius,  
 nihil grauius, mediocritatem uel perturbationum, uel  
 morborum animi mihi non sanè probant: omne enim  
 malum, etiam mediocre, magnum est: nos autem id  
 agimus, ut id in sapiente nullum sit omnino. nam ut  
 corpus, etiam si mediocriter ægrum est, sanum nō est:  
 sic, si in animo est ista mediocritas, caret sanitate. ita-  
 que præclare nostri, ut alia multa, molestiam, sollicitu-  
 dinem, angorem propter similitudinem corporum æ-  
 grorum ægritudinem nominauerunt. hoc propemo-  
 dum uerbo Græci omnem animi perturbationem ap-  
 pellant: uocant enim πᾶσις, id est morbum, qui-  
 cunque est motus in animo turbidus. nos melius: æ-  
 gris enim corporibus simillima est animi ægritudo. at  
 nō similis ægrotationis est libido, non immoderata leti-  
 tia, quæ est uoluptas animi elata, & gestiens. ipse etiam  
 metus non est morbi admodum similis, quanquam æ-  
 gritudini est finitimus: sed proprie, ut ægrotatio in cor-  
 pore, sic ægritudo in animo nomen habet non seiunctū  
 à dolore. doloris igitur huius origo nobis explicanda est,  
 id est causa efficiens ægritudinem in animo, tãquã æ-  
 grotationē in corpore. nā ut medici, causa morbi inuen-  
 ta, curationem esse inuentam putāt: sic nos, causa æ-  
 gritudinis reperta, medendi facultatem reperiemus.



T V S C. Q V A E S T.

est igitur causa omnis in opinione, nec uero ægritudinis  
solum, sed etiam reliquarum omnium perturbationū :  
quæ sunt genere quatuor, partibus plures. nam cum  
omnis perturbatio sit animi motus uel rationis expers,  
uel rationem aspernās, uel rationi nō obediens; isq; mo-  
tus aut boni, aut mali opinione citetur: bifariam qua-  
tuor perturbationes æqualiter distributæ sunt. nā duæ  
sunt ex opinione boni: quarū altera, uoluptas gestiens,  
id est præter modū elata lætitia opinione præsentis ma-  
gni alicuius boni; altera uel cupiditas recte, uel libido  
dici potest: quæ est immoderata appetitio opinati ma-  
gni boni rationi non obtemperans. ergo hæc duo gene-  
ra, uoluptas gestiens, & libido, bonorum opinione tur-  
bantur: ut duo reliqua, metus & ægritudo, malorū.  
nam & metus opinio magni mali impendentis: & æ-  
gritudo est opinio magni mali præsentis: & quidem  
recens opinio talis mali, ut in eo rectum uideatur esse  
angi: id autem est, ut is, qui doleat, oportere opinetur  
se dolere. his autem perturbationibus, quas in uita ho-  
minum stultitia quasi quasdam immitit furas, atque  
incitat, omnibus uiribus, atque opibus repugnandum  
est, si uolumus hoc, quod datum est uitæ, tranquille,  
placideq; traducere. sed cæteras aliās: nunc ægritudi-  
nem, si possumus, depellamus: id enim sit propositum:  
quando quidem eam tu uideri tibi in sapientem cade-  
re dixisti. quod ego nullo modo existimo: tetra enim  
res est, misera, detestabilis, omni contentione uelis, ut ita  
dicam, remisq; fugienda. qualis enim tibi ille uidetur  
Tantalo prognatus, Pelope natus, qui quondam a  
socero Oenomao Rege Hippodamiam raptis nactus



nuptijs. Iouis iste quidem pronepos. tam ne ergo abie-  
ctus, tamq; fractus?

» Nolite (inquit) hospites adire ad me ilico istic,

» Ne contagio mea bonis, umbra ne obsit :

» Tanta uis sceleris in corpore hæret.

Tu te Thyesta damnabis, orbabisq; luce propter uim  
sceleris alieni? quid? illum filium solis non ne patris  
ipsius luce indignum putas?

» Refugere oculi: corpus macie extabuit:

» Lacrymæ peredere humore exanguis genas:

» Situ nidoris barba pedore horrida,

» Atque intonsa infuscat pectus illuuiæ scabrum.

hæc mala ò stultissime Aæta ipse tibi addidisti. nō in-  
erant in ijs, quæ tibi casus inuexerat, & quidē inuete-  
rato malo, cū tumor animi resedisset. est autē ægritu-  
do, ut docebo, in opinione mali recentis. sed mœres ui-  
delicet regni desiderio, nō filia: illā enim oderas, et iure  
fortasse; regno nō æquo animo carebas. est autē impu-  
dens luctus mœrore se conficientis, quod imperare non  
liceat liberis. Dionysius quidem tyrānus Syracusis ex-  
pulsus Corinthi pueros docebat, usque ed imperio carere  
nō poterat. Tarquinio uero quid impudentius, qui bel-  
lum gereret cum ijs, qui eius non tulerant superbiam?  
is cum restitui in regnum nec Veientium, nec Latino-  
rum armis potuisset, Cumas se contulisse dicitur, inq;  
ea urbe senio, & ægritudine esse confectus. hoc tu igitur  
censes sapiētī accidere posse, ut ægritudine opprima-  
tur, id est miseria? nam cū omnis perturbatio miseria  
est, tū carnificina est ægritudo. habet ardorem libido, le-  
uitatem latitia gestiens, humilitatem metus: sed ægritu-



āo maiora quēdam, tabem, cruciatū, afflictionem, j-  
ditatem : lacerat, exest animum, planeq; conficit. hāc  
nisi exuimus sic, ut abijciamus ; miseria carere nō pos-  
sumus. at hoc quidem perspicuum est, tū ægritudinem  
existere, cum quid ita uisum sit, ut magnum quoddam  
malum adesse, & urgere uideatur. Epicuro autem pla-  
cet opinionem mali ægritudinē esse natura, ut quicūq;  
intueatur in aliquod maius malū, si id sibi accidisse opi-  
netur, sit cōtinuo in ægritudine. Cyrenaici non omni  
malo ægritudinē effici censent, sed insperato, nec opi-  
nato malo. est id quidem nō mediocre ad ægritudinem  
augendam: uidentur enim omnia repentina grauiora.  
ex hoc & illa iure laudantur :

- » Ego, cū genui, tum moriturū sciui, & ei rei sustuli.
  - » Præterea ad Troiā cū misi ad defendendā Græciā,
  - » Scibā me in mortiferū bellū, non in epulas mittere.
- hæc igitur præmeditatio futurorum malorum lenit eo-  
rum aduentū, quæ uenientia longe ante uideris. itaque  
apud Euripidem à Theseo dicta laudatur : licet enim,  
ut sæpe facimus, in latinum illa conuertere.
- » Nam, qui hæc audita à docto meminissē uiro,
  - » Futuras mecum commentabar miseras :
  - » Aut mortem acerbam, aut exilij mœstam fugam,
  - » Aut semper aliquam molem meditabar mali :
  - » Ut, si qua inuecta diritas casu foret,
  - » Ne me imparatum cura laceraret repens.
- quod autem Theseus à docto uiro se audisse dicit, id de  
se ipso loquitur Euripides : fuerat enim auditor Ana-  
xagoræ : quem ferunt nunciata morte filij dixisse,  
sciebam me genuisse mortalem. quæ uox declarat ijs



esse hæc acerba, à quibus non fuerint cogitata. ergo id quidē nō est dubiū, quin omnia, quæ mala putantur, sint improuisa grauiora. itaq; quanq̃ nō hæc una res efficit maximā ægritudinē: tamē, quoniā multū potest prouisio animi, et præparatio ad minuendū dolorē, sint semper omnia homini humana meditata. et nimirū hæc est illa præstās, et diuina sapiētia; perceptas penitus, et per tractatas humanas res habere; nihil admirari, cū acciderit; nihil, antequā euenierit, nō euenire posse arbitrari.

- » Quamobrem omnes, cum secunda res sunt maxime, tum maxime
- » Meditari, secum oportet, quo pacto aduersam erumnā ferant:
- » Pericla, damna, exilia peregre rediens semper cogitet,
- » Aut filij peccatū, aut uxoris mortem, aut morbū filia:
- » Communia esse hæc, fieri posse: ut ne quid animo sit nouum:
- » Quidquid præter spem eueniat, omne id deputare esse in lucro.

ergo hoc Terentius à philosophia sumptum cum tam commode dixerit, nos, è quorum fontibus id haustum est, non et dicemus hoc melius, et constantiū sentiemus? hic est enim ille uultus semper idem, quem dicitur Xantippe prædicare solita in uiro suo fuisse Socrate; eodem uultu semper se uidisse exeuntem illum domo, et reuertentem. nec uero ea frons erat, quæ M. Crassi illius ueteris, quem semel ait in omni uita risisse Lucilius; sed tranquilla, et serena: sic enim accepimus. iure autem erat semper idem uultus, cum mentis, à qua is fingitur, nulla



## TVSC. QVAEST.

fieret mutatio . quare accipio equidē à Cyrenaicis hæc  
 arma contra casus , & euentus , quibus eorum adue=  
 nientes impetus diuturna præmeditatione frangatur :  
 simulq; iudico , malum illud opinionis esse , non natu=  
 ra : si enim in re essent , cur fierent prouisa leuiores ?  
 sed est, iisdem de rebus quod dici possit subtilius , si prius  
 Epicuri sententiam uiderimus ; qui censet necesse esse  
 omnes in ægritudine esse , qui se in malis esse arbitren=  
 tur , siue illa ante prouisa , & expectata sunt , siue in=  
 ueterauerint : nam neque uetustate minui mala , nec  
 fieri præmeditata leuiores ; stultamq; etiā esse medita=  
 tionē futuri mali , aut fortasse ne futuri quidē : satis es=  
 se odiosum malū omne , cū uenisset : qui autē semper co=  
 gitauisset , accidere posse aliquid aduersi , ei fieri illud  
 sempiternum malum : si uero ne futurum quidem sit ,  
 frustra suscipi miseriam uoluntariam : ita semper an=  
 gi , aut accipiendo , aut cogitando malo . leuationem  
 autem ægritudinis in duabus rebus ponit , auocatione  
 à cogitanda molestia , & reuocatione ad contemplan=  
 das uoluptates : parere enim censet animū rationi pos=  
 se , et , quod illa ducat , sequi . uetat igitur ratio intueri  
 molestias : abstrahit ab acerbis cogitationibus hebetem  
 aciem ad miseras contemplandas : à quibus cum ce=  
 cinerit receptui , impellit rursus , & incitat ad consti=  
 ciendas , totaq; mente contrectandas uarias uolupta=  
 tes . quibus ille & præteritarum memoria , & spe  
 consequentium sapientis uitam refertam putat . Hæc  
 nostro more nos diximus , Epicurei dicunt suo . sed ,  
 quæ dicant , uideamus quo modo negligamus . Prin=  
 cipio male reprehendunt præmeditationem rerum fu=



turarum : nihil est enim, quod tam obtundat, eleuetq;  
 ægritudinem, quàm perpetua in omni uita cogitatio,  
 nihil esse quod accidere non possit; quàm meditatio cõ  
 ditionis humanæ, quàm uita lex, cõmentatioq; paren=  
 di : quæ non hoc affert, ut semper mœreamus, sed ut  
 nunquam : neque enim quærerem naturam, qui uitæ  
 uarietatem, qui imbecillitatem generis humani cogitat,  
 mœret cum hæc cogitat, sed tum uel maxime sapientiæ  
 fungitur munere : utrūque enim cõsequitur, ut & cõ=  
 siderandis rebus humanis proprio philosophiæ fruatur  
 officio, & aduersis casibus triplici cõsolatione sanetur :  
 primum, quod posse accidere diu cogitauerit; quæ co=  
 gitatio una maxime molestias omnes extenuat, & di=  
 luit : deinde, quod humana ferenda intelligit : postremo,  
 quod uidet nullū malū esse nisi culpam ; culpā autem  
 nullam esse, cum id, quod ab homine nō potuerit præ=  
 stari, euenerit . nam reuocatio illa quam affert, cum  
 à contuendis nos malis auocat, nulla est : non est enim  
 in nostra potestate, fodicantibus ijs rebus, quas malas  
 esse opinemur, dissimulatio, uel obliuio . lacerant, ue=  
 xant, stimulos admouent, ignes adhibent, respira=  
 re non sinunt : & tu obliuisci iubet ; quod contra na=  
 turam est : quod à natura datum est ; auxilium extor=  
 ques inueterati doloris ? est enim tarda illa quidem  
 medicina, sed tamen magna, quam affert longin=  
 quitas, & dies . iubet me bona cogitare, obliuisci ma=  
 lorum . diceret aliquid, & magno quidem philoso=  
 pho dignum, si ea bona sentiret esse, quæ essent ho=  
 mine dignissima . Pythagoras mihi sic diceret, aut  
 Socrates, aut Plato : quid iaces ? aut quid mœres ?



TVSC. QVAEST.

aut cur succumbis, cedisq; fortuna? quæ ut peruellere te  
forsitan potuerit, & pun gere, non potuerit certe uires  
frangere. magna uis est in uirtutibus. eas excita, si for  
te dormiunt. iam tibi aderit princeps fortitudo; quæ te  
animo tanto esse coget, ut omnia, quæ possint homini  
euenire, contemnas, & pro nihilo putes. aderit tempe  
rantia; quæ est eadem moderatio, à me quidem paulo  
ante appellata frugalitas, quæ te turpiter, & nequiter  
facere nihil patiatur. quid est autem nequius, aut tur  
pius effœminato uiro? ne iniustitia quidem sinet ista fa  
cere: cui minimū esse uidetur in hac causa loci. quæ ta  
men ita dicet, dupliciter esse te iniustum; cum & alie  
num appetas, qui mortalis natus, conditionem postules  
immortalium; & gra uiter feras te, quod utendum  
acceperis, reddidisse. prudentiæ uero quid respon  
debis dicenti uirtute se esse contentam, quo modo ad be  
ne uiuendum, sic & ad beate? quæ si extrinsecus religa  
ta pendeat, & non oriatur ex se, & rursus ad se re  
uertatur, & omnia sua complexa nihil quærat aliun  
de; non intelligo, cur aut uerbis tam uehementer ornā  
da, aut re tantopere expetenda uideatur. ad hæc bona  
me si renocas Epicure, pareo, sequor, utor te ipso du  
ce, obliuiscor etiam malorum, ut iubes; eoq; facilius,  
qudd ea ne in malis quidem ponenda censeo. sed tradu  
cis cogitationes meas ad uoluptates: quas? corporis cre  
do, aut quæ propter corpus uel recordatione, uel spe  
cogitentur. nunquid est aliud? recte ne interpretor  
sententiam tuam? solent enim isti negare nos intellige  
re, quid dicat Epicurus. hoc dicit, & hoc ille Græcus  
lus me audiēte Athenis senex Zeno, istorū acutissimus,





contendere, & magna uoce dicere solebat: eū esse beatum, qui presentibus uoluptatibus frueretur, confideretq; se fruiturum aut in omni, aut in magna parte uitæ, dolore non interueniente; aut, si interueniret, si summus foret, futurum breuem; si produclior, plus habiturum iucundi, quā mali: hæc cogitantem fore beatum, præsertim si & ante perceptis bonis contentus esset, nec deos extimesceret. Habes formam Epicuri uitæ beatæ, uerbis Zenonis expressam, nihil ut possit negari. quid ergo? huius ne uitæ propositio, & cogitatio aut Thyestem leuare poterit, aut Aetam, de quo paulo ante dixi, aut Thelamonem pulsum patria exulantē atque egentem? in quo hæc admiratio fiebat:

» Hiccine est Thelamō ille, modo quem gloria ad cœlum exulit,

» Quem spectabant, cuius ob os Graij ora obuertebant sua.

quod si qui, ut ait idem, simul animus cum re concidit, a grauib; illis antiquis philosophis petenda medicina est, non ab his uoluptarijs. quam enim isti bonorū copiam dicunt? fac sanè summum bonum esse non dolere. quanquam id non uocatur uoluptas. sed non necesse est nunc omnia. id ne est, quod traducti luctum leuemus? sit sanè summum malum dolere: in eo igitur qui non est, si malo careat, continuo ne fruitur summo bono? quid tergiversamur Epicure, nec fatemur eam nos dicere uoluptatem, quam tu idem, cum os perfricuisi, soles dicere? sunt hæc tua uerba, nec ne? in eo quidem libro, qui continet omnem disciplinam tuam (fungar enim iam interpretis munere, ne



TVSC. QV AEST.

» quis me putet fingere ) dicis hæc . Nec equidem habeo  
 » quod intelligam bonū illud detrahens eas uoluptates ,  
 » quæ sapore percipiuntur ; detrahens eas etiam , quæ au-  
 » ditu, & cantibus ; detrahens eas etiam , quæ ex fora-  
 » mis percipiuntur oculis, suaves motiones, siue quæ aliæ  
 » uoluptates in toto homine gignuntur quolibet è sensu.  
 » Nec uero ita dici potest , mentis lætitiā solam esse in  
 » bonis : lætātem enim mentem ita noui spē eorum o-  
 » mniū, quæ supra dixi fore, ut natura ijs potiēns dolore  
 » careat. atque hæc quidem his uerbis, quiuis ut intelligat  
 » quam uoluptatem norit Epicurus. deinde paulo infra.  
 » Sæpe quæsiui (inquit) ex ijs, qui appellantur sapientes,  
 » quid haberent, quod in bonis relinquerent, si illa detra-  
 » xissent, nisi si uellent uoces inanes fundere: nihil ab his  
 » potui cognoscere : qui si uirtutes ebullire uolent, &  
 » sapientias, nihil aliud dicent, nisi eam uiam, qua effi-  
 » ciantur eæ uoluptates, quas supra dixi . Quæ sequun-  
 » tur, in eadem sententia sunt : totusq; liber , qui est de  
 » summo bono , refertus & sententijs , & uerbis talib-  
 » us est. ad hancine igitur uitam Telamonem illum re-  
 » uocabis, ut leues ægritudinem? & si quem tuorum af-  
 » flictum mœrore uideris, huic acipenserem potius, quā  
 » aliquem Socraticum libellum dabis ? ἀλλῶν hortabere  
 » ut audiat uoces potius, quā Platonis ? expones, quæ  
 » spectet florida, & uaria ? fasciculum ad nares admo-  
 » uebis ? incendes odores ? & sertis redimiri iubebis, &  
 » rosa ? si uero aliquid etiam, tum planè luctum omnem  
 » absterferis ? hæc Epicuro confitenda sunt, aut ea, quæ  
 » modo expressa ad uerbum dixi, tollenda de libro, uel to-  
 » tus liber potius abiiciendus: est enim cōfertus uolupta-



tibus. querendum igitur, quemadmodū agitudine pri-  
uemus eum, qui ita dicat :

- » =Pol mihi fortuna magis nunc defit, quā genus :
- » Nāque regnū suppetebat mihi: ut scias quāto è loco,
- » Quātis opibus, quibus de rebus lapsa fortuna occidat.  
quid? huic calix mulsi impingendus est, ut plorare de-  
sinat, aut aliquid eiusmodi? ecce tibi ex altera parte ab  
eodem poeta :
- » Ex opibus summis opis egens Hector tuæ.  
huic subuenire debemus : quærit enim auxilium.
- » Quid petam præsidii, aut exequar? quo ne nunc auxi-  
lio, aut fuga
- » Freta sim? arce, et urbe orba sū: quò accedā? quò applicē?
- » Cui nec aræ patriæ domi stant; fractæ, & disiectæ  
iacent :
- » Fana flamma deflagrata : tostii alti stant parietes
- » Deformati, atque abiecte crista.  
scis, quæ sequantur : & illud in primis,
- » O pater, d patria, d Priami domus,
- » Septum altisono cardine templum :
- » Vidi ego te, astante ope barbarica,
- » Teclis calatis, laqueatis,
- » Auro, ebore instructam regifice.  
d poetam egregium: quanquam ab his cantoribus Eu-  
phorionis contemnitur. sentit omnia repentina, & ino-  
pinata esse grauiora. exaggeratis igitur Regis opibus,  
quæ uidebantur sempiternæ fore, quid adiungit?
- » Hæc omnia uidi inflammari,
- » Priamo ui uitam euitari,
- » Iouis aram sanguine turpari.



## TVSC. QVAEST.

præclarum carmen : est enim & rebus, & uerbis, &  
 modis lugubre. eripiamus huic ægritudinem : quo mo-  
 do ? collocemus in culcitra plumea : psalteriam adduca-  
 mus : cedrum incendamus : demus scutellam dulcicu-  
 læ potionis : aliquid provideamus & cibi . hæc tãdem  
 bona sunt , quibus ægritudines grauissimæ detrahan-  
 tur ? tu enim paulo ante ne intelligere te quidẽ alia bo-  
 na dicebas . renocari igitur oportere à moerore ad cogi-  
 tationem bonorum , conueniret mihi cum Epicuro , si ,  
 quid esset bonum , conueniret . dicit aliquis : quid ? er-  
 go tu Epicurum existimas ista uoluisse , aut libidinosas  
 eius fuisse sententias ? ego uero minime : uideo enim ab  
 eo dici multa seuerè , multa præclare . itaque , ut sæpe di-  
 xi , de acumine eius agitur , non de moribus . quamuis  
 spernat uoluptates eas , quas modo laudauit : ego tamẽ  
 meminero , quod uideatur ei summum bonum : non  
 enim uerbo solum posuit uoluptatem , sed explanauit  
 quid diceret : saporem inquit , & corporum comple-  
 xum , & ludos , atque cantus , & formas eas , quibus  
 oculi iucunde moueantur . num fingo ? num mentior ?  
 cupio refelli : quid enim laboro , nisi ut ueritas in omni  
 quæstione explicetur ? at idem ait nõ crescere uolupta-  
 tem dolore detractò , summamq; uoluptatem nihil dolo-  
 re . paucis uerbis tria magna peccata : unum , quodd se-  
 cum ipse pugnat : modo enim , ne suspicari quidem se  
 quidd bonum , nisi sensus quasi titillarentur uoluptate :  
 nunc autem , summam uoluptatem esse dolore carere .  
 potest ne magis secum ipse pugnare ? alterum est pecca-  
 tum , quodd , cum in natura tria sint , unũ gaudere , alte-  
 rum dolere , tertium nec gaudere , nec dolere , hic putat



primū, & tertium idem esse, nec distinguit à non do-  
lendo uoluptatem. tertium peccatū cōmune cum quī-  
busdam, quod, cum uirtus maxime expetatur, eiusq;  
adipiscendæ causa philosophia quæsitā sit, ille à uirtute  
summum bonum separauit. at laudat, & saepe, uirtu-  
tem. & quidem C. Gracchus, cū largitiones maximas  
fecisset, & effudisset ærariū, uerbis tamen defendebat  
ærarium. quid uerba audiam, cum facta uideam? Pi-  
so ille Frugi semper contra legem frumentariam dixe-  
rat. is lege lata consularis ad frumentum accipiendum  
uenerat. animaduertit Gracchus in concione Pisonem  
stantem. quærit audiente populo R. quī sibi constet, cū  
ea lege frumentū petat, quam dissuaserat? nolim, in-  
quit, mea bona Gracche tibi uiritim diuidere liceat: sed  
si facias, partem petam. parū ne declarauit uir grauis,  
& sapiens, lege Sempronia patrimonium publicū dissi-  
pari? lege orationes Gracchi: patronū ærarij esse di-  
ces. negat Epicurus iucunde posse uiuī, nisi cū uirtute ui-  
uatur: negat ullā in sapientem uim esse fortunæ: te-  
nuem uictum antefert copioso: negat ullū esse tempus,  
quo sapiens nō beatus sit. omnia philosopho digna, sed  
cum uoluptate pugnancia. nō istam dicit uoluptatem.  
dicat quamlibet: nempe eā dicit, in qua uirtutis nulla  
pars insit. age, si uoluptatē nō intelligimus, ne dolorem  
quidem? nego igitur eius esse, qui dolore summū ma-  
lum metiatur, mentionem facere uirtutis. & cōquerū-  
tur quidam Epicurei uiri optimi (nam nullū genus est  
minus malitiosum) me studiose dicere contra Epicurū.  
ita credo, de honore, aut de dignitate cōtendimus. mihi  
summum in animo bonū uidetur, illi autem in corpo-



T V S C. Q V A E S T.

re : mihi in uirtute, illi in uoluptate. & illi pugnāt; et quidem uicinorū fidem implorant; multi autem sunt, qui statim cōuolent: ego sum is, qui dicam me non laborare, actū habiturū quod egerint. quid enim? de bello Punico agitur? de quo ipso cū aliud M. Catoni, aliud L. Lentulo uideretur, nulla inter eos concertatio unquā fuit. hi nimis iracunde agunt, præsertim cum ab his nō sanè animose defendatur sententia, pro qua nō in senatu, nō in concione, non apud exercitiū, neque apud Censores dicere audeant. sed cū istis alijs, et eo quidem animo, nullū ut certamen institutam, uerum dicentibus facile cedam. tantū admonebo: si maxime uerū sit, ad corpus omnia referre sapientē; siue, ut honestius dicā, nihil facere, nisi quod expediat; siue omnia referre ad utilitatem suā; quoniam hæc plausibilia nō sunt, ut in sinu gaudeant, gloriose loquī desināt. Cyrenaicorū restat sententia: qui tū ægritudinem censent existere, si nec opinato quid euenerit. est id quidem magnū, ut supra dixi: etiā Chrysippo ita uideri scio, quod prouisum ante nō sit, id fieri uehementius. sed nō sunt in hoc omnia: quāquā hostiū repens aduentus magis aliquanto cōturbat, q̄ expectatus: & maris subita tēpestas, q̄ ante prouisa, terret nauigātes uehementius: et eiusmodi sunt pleraque. sed cū diligenter nec opinatorū naturā consideres, nihil aliud reperias, nisi omnia subita uideri maiora, & quidem ob duas causas: primū, quodd, quanta sint quæ accidunt, considerādi spatium nō datur: deinde cum uideretur præcaueri potuisse, si prouisum esset, quasi culpa contractū malum ægritudinem acriorem facit. quod ita esse dies declarat: quæ procedens ita mi-



tigat, ut iisdē malis manētibus nō modo leniatur ægritudo, sed in plerisque tollatur. Carthaginienses multū Romæ seruierūt, Macedones rege Perse capto. uidi etiā in Pelopōneso, cū essem adolescēs, quosdā Corinthios. hi poterāt omnes eadē illa de Andromacha deplorare,

» Hæc omnia uidi. —

sed & iam decantauerūt fortasse: eo enim erāt uultu, oratione, omni reliquo motu, & statu, ut eos Argiuos, aut Sicyonios diceret: magisq; me mouerāt Corinthi subito aspecta parietina, q̄ ipsos Corinthios, quorum animis diuturna cogitatio callū uetustatis obduxerat. legimus librū Clitomachi, quem ille euersa Carthagine misit cōsolandi causa ad captiuos ciues suos. in eo est disputatio scripta Carneadis: quam se ait in cōmentariū retulisse. cū ita positum esset, uideri fore in ægritudine sapientem patria capta: quæ Carneades cōtra dixerit, scripta sunt. tāta igitur calamitatis præsenti adhibetur a philosopho medicina, quāta inueteratæ ne desideratur quidem. nec si aliquot annis post idem ille liber captiuis missus esset, uulneribus mederetur, sed cicatricibus: sensim enim & pedetentim progrediens extenuatur dolor: non quo ipsa res immutari soleat, aut possit: sed id, quod ratio debuerat, usus docet, minora esse ea, quæ sint uisa maiora. quid ergo opus est, dicet aliquis, ratione, aut omnino consolatione ulla, qua solemus uti, cum leuare dolorem mœrentium uolumus? hæc enim ferè tum habemus in promptu, nihil oportere inopinatum uideri. atqui tolerabilius feret incommodum, qui cognouerit, necesse esse hominī tale aliquid accidere. hæc enim oratio de ipsa summa mali nihil de-



trahit : tantū modo affert, nihil euenisse, quā nō opī-  
nādū fuisset. neque tamen genus id orationis in conso-  
lando non ualet : sed id haud sciam an plurimum .  
ergo ista nec opinata non habent tantam uim , ut æ-  
gritudo ex his omnis oriatur : feriūt enim fortasse gra-  
uius, nō id efficiunt, ut ea, quæ accidāt, maiora uidean-  
tur. quia recentia sunt, uidentur, non quia repentina .  
duplex est igitur ratio ueri reperiendi, nō in ijs solum,  
quæ mala, sed in ijs etiā, quæ bona uidentur. nā aut de  
ipsius rei natura, qualis, & quāta sit, quærimus, ut de  
paupertate nō nūquā ; cuius onus disputādo leuamus,  
docentes, q̄ parua, & q̄ pauca sint, quæ natura desi-  
deret: aut à disputādi subtilitate orationem ad exem-  
pla traducimus. hic Socrates cōmemoratur, hic Dioge-  
nes, hic Cæcilianum illud,

- » Sape est etiam sub palliolo sordido sapientia .  
cum enim paupertatis una eademq; sit uis, quidnā di-  
ci potest quāobrem C. Fabritio tolerabilis ea fuerit, alijs  
negēt se ferre posse ? huic igitur alteri generi similis est  
ea ratio consolandi, quæ docet humana esse, quæ accide-  
rint. non enim id solū continet ea disputatio, ut cogni-  
tionem afferat generis humani ; sed significat tolerabi-  
lia esse, quæ & tulerint, & ferāt ceteri. de paupertate  
agitur : multi patientes pauperes cōmemoratur. de cō-  
temnendo honore : multi inhonorati proferuntur, &  
quidem propter id ipsum beatiores : eorumq; , qui pri-  
uatū otīū negotijs publicis antetulerunt, nominatim ui-  
ta laudatur : nec siletur illud potentissimi Regis Ana-  
pæstū, qui laudat senem, & fortunatū esse dicit, quodd  
inglorius sit atque ignobilis ad supremum diem peruen-  
turus .



turus. similiter cōmemorandis exemplis, orbitates quoque liberorum prädicantur; eorumq; qui grauius fuerunt, luctus, aliorum exemplis leniuntur. sic perpeffio ceterorum facit, ut ea, quæ acciderint, multo minora, quàm quanta sint existimata, uideantur. ita fit senfim cogitantibus, ut, quantum sit ementita opinio, appareat. atque hoc idem & Telamon ille declarat,

» =ego cum genui, moriturum sciui:

& Theseus,

» Futuras mecum commentabar miseras:

& Anaxagoras, sciebam me genuisse mortalem: hi enim omnes diu cogitantes de rebus humanis, intelligebant eas nequaquam pro opinione uulgi esse extimescendas. et mihi quidem uidetur idem ferè accidere ijs, qui ante meditatur, quod ijs, quibus medetur dies: nisi quoddam ratio quædam sanat illos, hos ipsa natura, intellectu eo, quod remedium illud continet, malum, quod opinatum sit esse maximum, nequaquam esse tantum, ut uitã beatam possit euertere. hoc igitur efficitur, ut ex illo nec opinato plaga maior sit, nō, ut illi putant, ut, cum duobus pares casus euenerint, is modo ægritudine afficiatur, cui ille nec opinatus casus euenerit. itaque dicuntur non nulli in mœrore, cum de hac cōmuni omnium conditione audissent, ea lege nos esse natos, ut nemo in perpetuum esse posset expers mali, grauius etiam tulisse. quocirca Carneades, ut uideo nostrum scribere Antiochum, reprehendere Chrysippum solebat laudatẽ Euripideum carmen illud,

» Mortalis nemo est, quem non attingat dolor,

» Morbusq; . multi sunt humandi liberi,

h h



T V S C. Q V A E S T.

- » Rursum creandi : morsq; est finis omnibus ,
- » Quæ generi humano angorem nequidquam afferunt.
- » Reddenda est terræ terra : tum uita omnibus
- » Metenda , ut fruges . sic iubet necessitas .

negabat genus hoc orationis quidquam omnino ad leuandam ægritudinem pertinere : id enim ipsum dolendum esse dicebat, quod in tam crudelem necessitatē incidissemus . nam illā quidem orationem ex cōmemoratione alienorū malorū ad maleuolos cōsolandos esse ac cōmodatam . mihi uero lōge uidetur secus . nā et necessitas ferendæ conditionis humanæ quasi cū deo pugnare cohibet, admonetq; esse hominē ; quæ cogitatio magno pere luctum leuat : & enumeratio exemplorum nō, ut animum maleuolorum oblectet, affertur, sed ut ille, qui mœret , ferendū sibi id censeat, quod uideat multos moderate, et tranquille tulisse: omnibus enim modis fulciēdi sunt, qui ruūt , nec coherere possunt propter magnitudinem ægritudinis . ex quo ipsam ægritudinem λυπην Chrysippus, quasi λύσις, id est solutionē totius hominis, appellatam putat . quæ tota poterat euelli explicata, ut principio dixi, causa ægritudinis: est . n. nulla alia , nisi opinio, et iudiciū magni præsentis, atq; urgētis mali . itaque et dolor corporis, cuius est morsus acerrimus, perferatur spe proposita boni: et ætæ ætas honeste, ac splendide tātā affert cōsolationē, ut eos, qui ita uixerint, aut nō attingat ægritudo, aut perleuiter pungat animi dolor . sed ad hanc opinionem mali cū illa etiam opinio accersit, oportere, rectum esse, ad officium pertinere, ferre illud ægre, quod acciderit; tū denique efficitur illa grauis ægritudinis perturbatio . ex hac opinione sunt illa uaria



et detestabilia genera lugendi, pedores, muliebres lacerationes genarum, pectoris, foeminū, capitis percussiones.

hinc ille Agamemnon Homericus, & idem Accianus,

» Scindens dolore identidem intonsam comam.

in quo facit. in illud Bionis, perinde stultissimum Regem in luctu capillū sibi euellere, quasi caluitio mœror leuaretur. sed hæc omnia faciūt opinātes ita fieri oportere. itaque & Aeschines in Demosthenem inuehitur, quod is septimo die post filiae mortē hostias immolasset. at quā rhetorice? quā copiose? quas sententias colligit? quæ uerba contorquet? ut licere quiduis rhetori intelligas. quæ nemo probaret, nisi insitū illud in animis haberemus, omnes bonos interitu suorum quam grauiissime mœrere oportere. ex hoc euenit, ut in animi doloribus alij solitudines captent, ut ait Homerus de Bel lerophonte,

» Qui miser in campis mœrens errabat Aleis

» Ipse suum cor edens, hominum uestigia uitans.

et Niobe fingitur lapidea, propter aeternum credo in luctu silentium. Hecubam autem putant propter animi acerbiteratē quandam, et rabiem fingi in canem esse cōuersam. sunt autem alij, quos in luctu cū ipsa solitudine loqui sæpe delectat, ut illa apud Ennium nutrix.

» Cupido cepit miseram nunc me, proloqui

» Cœlo atque terræ Medæe miseras.

hæc omnia recta, uera, debita putantes, faciunt in dolore: maximeq; declaratur hoc quasi officij iudicio fieri, quod si qui forte, cum in luctu esse uellent, aliquid fecerunt humanius, aut si hilarius locuti sunt, renocant se rursus ad mœstitiam, peccatiq; se insimulant, quod

h h ij



TVSC. QVAEST.

dolere intermiserint . pueros uero matres , & magistrī  
castigare etiam solent , nec uerbis solum , sed etiam uer  
beribus , si quid in domestico luctu hilarius ab ijs factū  
est , aut dictum : plorare cogunt . quid ? ipsa remissio  
luctus cum est consecuta , intellectumq; est nihil profici  
mœrendo , non ne declarat fuisse totum illud uolunta  
rium ? quid ille Terentianus ipse se puniens , id est ἐαυ  
τὸν τιμωρούμενος ?

- » Decreui tantisper me minus iniuriæ
- » Chremes meo gnato facere , dum fiam miser .  
hic decernit , ut miser sit . num quis igitur quidquam  
decernit inuitus ?
- » Malo quidem me quouis dignum deputem .  
malo se dignum deputat , nisi miser sit . uides ergo opinio  
nis esse , nō naturæ malū . quid , quod res ipsa lugere prohi  
bet ? ut apud Homerū quotidianæ necesse , interitusq; mul  
torū sedationē mœrendi afferūt : apud quē ita dicitur ;
- » Nanque nimis multos , atque omni luce , cadentes
- » Cernimus : ut nemo possit mœrore uacare .
- » Quo magis est æquum tumultis mandare peremptos
- » Firmo animo , & luctum lacrymis finire diurnis .  
ergo in potestate est abicere dolorem , cum uelis , tempo  
ri seruientē . an est ullū tempus , quoniā quidē res in no  
stra potestate est , cui nō ponēda curæ ægritudinis causa  
seruiamus ? cōstabat , eos , qui cōcidētē uulneribus Cn . Pō  
peiū uidissent , cum in illo ipso acerbissimo , miserrimoq;  
spectaculo sibi timerent , quod se classe hostiū circumfu  
sos uiderent , nihil tū aliud egisse , nisi ut remigeshorta  
rentur , & ut salutem adipiscerentur fuga ; posteaquam  
Tyrum uenissent , tum afflictari , lamentariq; cœpisse .



t̃mor igitur ab ijs ægritudinem potuit repellere, ratio  
ac sapientia uera non poterit? quid est autem, quod  
plus ualeat ad ponendum dolorem, quàm cū est intelle-  
ctum nihil profici, & frustra esse susceptum? si igitur  
deponi potest, etiam non suscipi potest. uolūtate igitur,  
& iudicio suscipi ægritudinem cōfitendum est. idq; in-  
dicatur eorū patientia, qui cū multa sint sæpe perpeffi,  
facilius ferūt quidquid accidit, obduruisseq; sese contra  
fortunam arbitrantur: ut ille apud Euripidem;

- » Si mihi nunc tristis primum illuxisset dies,
- » Nec tam erumnoſo nauigauiſſem ſalo,
- » Eſſet dolendi cauſa, ut iniecto equulei
- » Freno repente tactu exagitantur nouo.
- » Sed iam ſubiectus miſerijs obtorpui.

defatigatio igitur miſeriarum ægritudines cum faciat  
leuioreſ; intelligi neceſſe eſt, nō re ipſam cauſam atque  
fontem eſſe mœroris. philoſophi ſummi, nec dū tamen  
ſapientiam conſecuti, non ne intelligūt in ſummo ſe ma-  
lo eſſe? ſunt enim inſipientes; neque inſipientia ullum  
maius malū eſt: neque tamen lugent. quid ita? quia  
huic generi malorū nō affingitur illa opinio, rectū eſſe,  
& æquum, & ad officiū pertinere, ægre ferre, quod  
ſapiens non ſis. quod idem affingimus huic ægritudini:  
in qua luctus ineſt: quæ omnium maxima eſt. itaque  
Ariſtoteles ueteres philoſophos accuſans, qui exiſtimauiſ-  
ſent philoſophiam ſuis ingenijs eſſe perfectam; ait eos  
aut ſtultiſſimos, aut glorioſiſſimos fuiſſe; ſed ſe uidere,  
quod paucis annis magna acceſſio facta eſſet, breui tē-  
pore philoſophiam planè abſolutam fore. Theophrastus  
autem moriens accuſaſſe naturā dicitur, quod ceruis, et

hh ij



cornicibus uitam diuturnam, quorum id nihil intere-  
 set; hominibus, quorum maxime interfuisset, tam exis-  
 guam uitam dedisset: quorum si aetas potuisset esse lon-  
 ginquior, futurum fuisse, ut omnibus perfectis arti-  
 bus, omni doctrina hominum uita erudiretur. quere-  
 batur igitur se tum, cum illa uidere coepisset, extingui.  
 quid? ex ceteris philosophis non ne optimus, & graui-  
 simus quisque confiteretur, multa se ignorare? et multa si-  
 bi etiam atque etiam esse discenda? neque tamen, cum se  
 in media stultitia, qua nihil est peius, haerere intelligant,  
 ægritudine premuntur: nulla enim admiscetur opinio  
 officiosi doloris. quid, qui non putant lugendum uiris?  
 qualis fuit Q. Maximus efferens filium consulare, C  
 qualis L. Paulus, duobus paucis diebus amissis filiis; qua- V  
 lis M. Cato, pratore designato, mortuo filio; quales re- ha  
 liqui, quos in consolatione collegimus. quid hos aliud nu  
 placuit, nisi quoddam luctum, & moerorem esse non pu- di  
 tabant uiri? ergo id, quod alij rectum opinantes ægritu- ut  
 dini se solent dedere, ij turpe putantes ægritudinem re- ca  
 pulerunt. ex quo intelligitur, non in natura, sed in ni  
 opinione esse ægritudinem. Contra dicuntur hæc. quis dei  
 tam demens, ut sua uoluntate moereat? natura affert lug  
 dolorem. cui quidem Crantor, inquiunt, uester ceden- da  
 dum putat: premit enim, atque instat, nec resisti potest. tis  
 itaque Oileus ille apud Sophocle, qui Telamone antea tos  
 de Aiakis morte consolatus esset, is cum audisset de suo, ple  
 fractus est. de cuius commutata mente sic dicitur, mo  
eos

- » Nec uero tanta præditus sapientia quo
- » Quisquam est, qui aliorum erumnam dictis alleuans, alte
- » Non idem, cum fortuna mutata impetum qua



Conuertat, clade ut subita frangatur sua,  
ut illa ad alios dicta & præcepta excidant.  
hæc cum disputant, hoc student efficere, naturæ obfisti  
nullo modo posse. ij tamen fatentur grauiores ægritu-  
dines suscipi, quàm natura cogat. quæ igitur amentia,  
ut nos quoque idē ab alijs requiramus? sed plures sunt  
causæ suscipiendi doloris. primum illa opinio mali, quo  
uiso atque persuaso ægritudo insequitur necessario.  
deinde etiam gratum se mortuis facere, si grauius eos  
lugeant, arbitrantur. accedit superstitio muliebris quæ-  
dam: existimant enim dijs immortalibus se facilius sa-  
tisfacturos, si eorum plaga perculsi, afflictos se & stra-  
tos esse fateantur. sed hæc inter se quàm repugnent,  
plerique non uident: laudant enim eos, qui æquo ani-  
mo moriatur: qui alterius mortem æquo animo ferant,  
eos putant uituperandos. quasi fieri ullo modo possit,  
quod in amatorio sermone dici solet, ut quisquam plus  
alterum diligat, quàm se. præclarum illud est, & si  
queris, rectum quoque, & uerum, ut eos, qui nobis cha-  
rissimi esse debeant, æque ac nosmet ipsos amemus: ut  
uero plus, fieri nullo pacto potest. ne optandum qui-  
dem est in amicitia, ut me ille plus, quàm se, ego illum  
plus, quàm me. perturbatio uitæ, si ita sit, at-  
que officiorum omnium consequatur. sed de hoc aliàs.  
nunc illud satis est, non attribuere ad amissionem ami-  
corum miseriam nostram, ne illos plus, quàm ipsi ue-  
lint, si sentiant, plus certe quàm nosmet ipsos diliga-  
mus. nam quod aiunt plerisque consolationibus nihil  
leuari, adiunguntq; consolatores ipsos confiteri se mi-  
seros, cum ad eos impetum suum fortuna conuer-  
te-

hh iij



rit, utrumque dissolvitur: sunt enim ista non natura vitia, sed culpæ. stultitiam autem accusare quamvis copiose licet. nam & qui non leuantur, ipsi alios ad miseriam inuitant: & qui suos casus aliter ferunt, atque ut alijs auctores ipsi fuerunt, non sunt vitiosiores, quam ferè plerique, qui auari auaros, gloriæ cupidos gloriosi reprehendunt: est enim proprium stultitiæ aliorum vitia cernere, obliuisci suorum. sed nimirum hoc maximum est experimentum, cum constet ægritudinem uetustate tolli, hanc uim non esse in die positam, sed in cogitatione diuturna. nam et si eadem res est, & idem est homo: qui potest quidquam de dolore mutari, si neque de eo, propter quod dolet, quidquam est mutatum, neque de eo, qui dolet? cogitatio igitur diuturna nihil esse in re mali, dolori medetur, non ipsa diuturnitas. hic mihi afferunt mediocritates, quæ si naturales sunt, quid opus est consolatione? natura enim ipsa terminabit modum. si opinabiles, opinio tota tollatur. satis dictum esse arbitror, ægritudinem esse opinionem mali præsentis; in qua opinione illud insit, ut ægritudinem suscipere oporteat. additur ad hanc diffinitionem à Zenone recte, ut illa opinio præsentis mali sit recens. hoc autem uerbum sic interpretatur, ut non tantum illud recens esse uelit, quod paulo ante acciderit; sed quàm diu in illo opinato malo uis quadam insit, & uigeat, & habeat quandam uiriditatem, tam diu appelletur recens: ut Arthemisia illa Mausoli Cariae Regis uxor, quæ nobile illud Halicarnasi fecit sepulcrum, quàm diu uixit, uixit in luctu, eodemq; etiam confecta contabuit. huic erat illa opinio quotidie recens: quæ



tum denique non appellabatur recens, cum uetustate exaruit. hæc igitur officia sunt consolantium, tollere ægritudinem funditus, aut sedare, aut detrahere quamplurimum, aut suppressere, nec pati manare longius, aut ad aliam traducere. Sunt, qui unum officium consolantis putent, malum illud omnino non esse, ut Cleanthi placet. sunt, qui non magnum malum, ut Peripatetici. sunt, qui abducunt à malis ad bona, ut Epicurus. sunt, qui satis putant ostendere, nihil inopinati accidisse, nihil mali. Chrysippus autem caput esse censet in consolando, detrahere illā opinionem mœrētī, si se officio fungi putet iusto, atque debito. sunt etiam, qui hæc omnia genera consolandi colligunt: alius enim alio modo mouetur; ut fere nos omnia in cōsolationem unam coniecimus: erat enim in tumore animus, & omnis in eo tentabatur curatio. sed sumendum tempus est non minus in animorum morbis, quàm in corporū: ut Prometheus ille Aeschyli: cui cum dictum esset,

- » Atqui Prometheu te hoc tenere existimo,
  - » Mederi posse rationem iracundiæ;
- respondet,
- » Si quidem qui tempestiuam medicinam admouens,
  - » Non ad grauescens uulnus illidat manus.

erit igitur in consolationibus prima medicina, docere aut nullum malum esse, aut admodum paruum: altera & de communi conditione uitæ, & proprie, si quid sit de ipsius, qui mœreat, disputandum: tertia, summam esse stultitiam frustra confici mœrore, cum intelligas nihil posse profici. nam Cleanthes quidem sapientem consolatur: qui consolatione non eget, nihil



T V S C. Q V A E S T.

enim esse malum, quod turpe non sit, si lugenti persuaseris, non tu illi luctum, sed stultitiam detraxeris. alienum autem tempus docendi. & tamen non satis mihi uidetur uidisse hoc Cleanthes, suscipi aliquando ægritudinem posse ex eo ipso, quod esse summum malum Cleanthes ipse fatetur. quid enim dicemus? cum Socrates Alcibiadi persuasisset, ut acceperimus, eum nihil hominis esse, nec quidquam inter Alcibiadem summo loco natum, & quemuis baiulum interesse; cum se Alcibiades afflictere, lacrymansq; Socrati supplex esset, ut sibi uirtutem traderet, turpitudinemq; depelleret: quid dicemus Cleanthe? num in illa re, quæ ægritudine Alcibiadem afficiebat, mali nihil fuisse? quid illa Lyconis, qualia sunt? qui ægritudinem extenuans, paruis ait eam rebus moueri, fortunæ, & corporis incommodis, non animi malis. quid ergo? illud, quod Alcibiades dolebat, non ex animi malis uitijq; constabat? Ad Epicuri consolationem satis est ante dictum. Ne illa quidem consolatio firmissima est; quanquam & usitata est, et sæpe prodest: Non tibi hoc soli. prodest hæc quidem, ut dixi, sed nec semper, nec omnibus: sunt enim, qui respiciant: sed refert, quo modo adhibeatur. ut enim tulerit quisque eorum, qui sapienter tulerunt; non quo quisque incommodo affectus sit, prædicandum est. Chrysippi ratio ad ueritatem firmissima est, ad tempus ægritudinis difficilis. magnum opus est probare moerenti, illum suo iudicio, & quod se ita putet oportere facere, moerere. nimirum igitur, ut in causis non semper utimur eodem statu, (sic enim appellamus controuersiarum genera) sed ad tempus, ad controuersie natu-



ram, ad personam accommodamus: sic in ægritudine lenienda, quamnam quisque curationē recipere possit, uidendum est. sed nescio quo pacto ab eo, quod erat a te propositum, aberrauit oratio. tu enim de sapiente quæsieras: cui aut malum uideri nullum potest, quod uacet turpitudine; aut ita paruum malum, ut id obruatur sapientia, uixq; appareat; qui nihil opinione affingat, assumatq; ad ægritudinem; nec id putet esse rectum, se q̄ maxime excruciaci, luctuq; confici; quo prauius nihil esse possit. edocuit tamen ratio, ut mihi quidem uidetur, cum hoc ipsum proprie non quæreretur hoc tempore, ne quidem ullum esse malum, nisi quod idem dici turpe posset; tamen ut uideremus, quidquid in ægritudine mali, id non naturale esse, sed uoluntario iudicio, & opinionis errore contractum. tractatum est autem à nobis id genus ægritudinis, quod unum est omnium maximum, ut eo sublato, reliquorum remedia nec magnopere quærenda arbitraremur. sunt enim certa, quæ de paupertate, certa, quæ de uita inhonorata, & ingloria dici soleant. separatim autem certæ scholæ sunt de exilio, de interitu patriæ, de seruitute, de debilitate, de cecitate, et de omni casu: in quo nomē poni solet calamitatis. hæc Græci in singulas scholas, et in singulos libros differtiunt: opus enim quærun, quanq̄ planè disputationis sunt, delectationis. & tamen ut medici toto corpore curando minimæ etiam parti, si condoluit, medentur: sic philosophia, cum uniuersam ægritudinem sustulit, tamen, si quis error aliunde extitit, si paupertas momordit, si ignominia pupugit, si quid tenebrarum offudit exilium, aut eorum, quæ modo dixi, si quid



T V S C. Q V A E S T.

exitit : et si singularum rerum sunt propriae consolations . de quibus audies tu quidem , cum uoles . sed ad eundem fontem reuertendum est , ægritudinem omnem procul abesse à sapiente , quod inanis sit , quod frustra suscipiatur , quod nō natura exoriatur , sed iudicio , sed opinione , sed quadā inuitatione ad dolendū , cū id decreuerimus ita fieri oportere . hoc detractō , quod totū est uolūtariū , ægritudo erit sublata illa mœrens , morsus tamen , & cōtractiuncula quædam animi relinquentur . hanc dicant sanè naturalem , dum ægritudinis nomen absit , graue , tetrum , funestum , quod cū sapientia esse , atque , ut ita dicā , habitare nullo modo possit . atqui stirpes sunt ægritudinis , q̄ multæ , q̄ amaræ , quæ ipso trūco euerso , omnes elidendæ sunt , et , si necesse erit , singulis disputationibus : superest enim nobis hoc , cuiusmodi est , ocium . sed ratio una omniū est ægritudinū , plura nomina : nā & inuidere ægritudinis est , & æmulari , et obrectare , & misereri , angi , lugere , mœrere , erumna affici , lamentari , sollicitari , dolere , in molestia esse , afflictiari , desperare . hæc omnia diffiniūt Stoici : eaq; uerba , quæ dixi , singularū rerū sunt , non , ut uidentur , easdem res significant , sed aliquid differunt : quod alio loco fortasse tractabimus . hæ sunt illæ fibræ stirpium , quas initio dixi , persequendæ , & omnes elidendæ , ne ulla unquam possit existere . magnum opus , & difficile . quis negat ? quid autem præclarum , nō idem arduū ? sed tamen id se effecturam philosophia profitetur : nos modo curationem eius recipiamus . Verum quidem hæc hætenus . cætera , quotiescunque uoletis , & hoc loco , & alijs parata nobis erunt .

M.

L

instituta, pro  
descrip  
progre  
excele  
uero h  
discipli  
locis sa  
sex lib  
sidera  
ea qua  
confer  
consp  
ras, q  
tus p  
Pyth



M. TVLLII CICERONIS TVSCV  
LANARVM QVAESTIONVM  
LIBER QVARTVS, DE RELI  
QVIS ANIMI PERTVR=  
BATIONIBVS.

C

Vm multis locis nostrorum homi=  
nū ingenia, uirtutesq; Brute soleo  
mirari, tum maxime ijs in studijs,  
quæ sero admodū expetita, in hāc  
ciuitatem è Græcia transfulerūt.

nam cū à primo urbis ortu, regijs  
institutis, partim etiā legibus auspicia, ceremoniæ, comi=  
tia, prouocationes, patrum cōsiliū, equitum, peditumq;  
descriptio, tota res militaris diuinitus esset cōstituta, tum  
progressio admirabilis, incredibilisq; cursus ad omnem  
excellentiā factus est, dominatu regio Rep. liberata. nec  
uero hic locus est, ut de moribus institutisq; maiorum, et  
disciplina, ac temperatione ciuitatis loquamur. alijs hæc  
locis satis accurate à nobis dicta sunt, maximeq; in ijs  
sex libris, quos de Rep. conscripsimus. hoc autem loco cō=  
siderāti mihi studia doctrinæ, multa sanè occurrūt, cur  
ea quoque accersita aliūde, neque solū expetita, sed etiā  
conseruata, & culta uideantur. erat enim illis penè in  
conspēctu præstanti sapientia, & nobilitate Pythago=  
ras, qui fuit in Italia temporibus ijsdem, quibus L. Bru=  
tus patriam liberauit præclarus auctor nobilitatis tuæ.  
Pythagoræ autem doctrina cum longe, lateq; flueret,



permanuisse mihi uidetur in hanc ciuitatem : idq; cū  
 coniectura probabile est, tum quibusdam etiam uesti-  
 gijs indicatur : quis est enim, qui putet, cum floreret  
 in Italia Græcia potentissimis, & maximis urbibus ea,  
 quæ magna dicta est, in hisq; primum ipsius Pythago-  
 ræ, deinde postea Pythagoreorum tantum nomen esset,  
 nostrorum hominum ad eorum doctissimas uoces aures  
 clausas fuisse? quin etiam arbitror, propter Pythagoreo-  
 rum admirationem Numam quoque Regem Pythago-  
 reum à posterioribus existimatum. nam cum Pythago-  
 ræ disciplinam, & instituta cognoscerent, Regiq; eius  
 æquitatem, & sapientiam à maioribus suis accepis-  
 sent, ætates autem & tempora ignorarent propter ue-  
 rustatem; eum, qui sapientia excelleret, Pythagoræ au-  
 ditorem fuisse crediderunt. & de coniectura quidem  
 hætenus. uestigia autem Pythagoreorum quanquam  
 multa colligi possunt, paucis tamen utemur, quoniam  
 non id agitur hoc tempore. nam cum carminibus so-  
 liti illi esse dicantur & præcepta quædam oculiuis  
 tradere, & mentes suas à cogitationum intentione can-  
 tu, fidibusq; ad tranquillitatem traducere; grauissi-  
 mus auctor in Originibus dixit Cato, morem apud ma-  
 iores hunc epularum fuisse, ut deinceps, qui accuba-  
 rent, canerent ad tibiam clarorum uiro-  
 rum laudes, atque uirtutes. ex quo perspicuum est, & cantus tū  
 fuisse rescriptos uocum sonis, & carmina. quanquam  
 id quidem etiam XII tabulæ declarant, condi iam tū  
 solitum esse carmen : quod ne liceret fieri ad alterius  
 iniuriam, leges sanxerunt. nec uero illud non erudi-  
 torum temporum argumentum est, quod et deorū pul-



uinaribus, & epulis magistratuum fides præcitant :  
quod proprium eius fuit, de qua loquor, disciplina.  
mihi quidem etiam Appij Cæci carmē, quod ualde Pa  
nætius laudat epistola quadam, quæ est ad Q. Tuber  
ronem, Pythagoreorum uidetur. multa sunt etiam in  
nostris institutis ducta ab illis : quæ prætereo, ne ea,  
quæ peperisse ipsi putamur, aliunde didicisse uideamur.  
sed ut ad propositum redeat oratio: quàm breui tempo  
re quot, & quanti poetæ, qui autem oratores extite  
runt? facile ut appareat nostros omnia cōsequi potuis  
se, simul ut uelle cœpissent. sed de cæteris studiis alio lo  
co & dicemus, si usus fuerit, & sæpe diximus. sapien  
tiæ studium uetus id quidem in nostris : sed tamē, ante  
Lælij ætatem, & Scipionis, non reperio quos appellare  
possim nominatim. quibus adolescentibus Stoicum Dio  
genem, & Academicum Carneadem uideo ad senatū  
ab Atheniensibus missos esse legatos. qui cū Reip. nul  
lam unquam partem attigissent, essentq; eorum alter  
Cyrenæus, alter Babylonius; nūquam profecto scholis  
essent excitati, neque ad illud munus electi, nisi in quib  
usdam principibus temporibus illis fuissent studia do  
ctrinæ. qui cum cætera literis mandarent, alij ius ci  
uile, alij orationes suas, alij monumenta maiorum;  
hanc amplissimam omnium artium bene uiuendi disci  
plinam uita magis, quàm literis persecuti sunt. itaque  
illius ueræ, elegantisq; philosophiæ, quæ ducta à So  
crate in Peripateticis adhuc permansit, & idem alio  
modo dicentibus Stoicis, cum Academici eorum contro  
uersias disceptarent; nulla ferè sunt, aut pauca admo  
dum latina monumenta, siue propter magnitudinē re



rum, occupationemq; omnium, siue etiam, quodd impe-  
 ritis ea probari posse non arbitrabantur: cum interim  
 illis silentibus C. Amasanius extitit dicens. cuius libris  
 editis, commota multitudo contulit se ad eandem potissi-  
 mum disciplinam, siue quodd erat cognitu perfacilis, si-  
 ue quodd inuitabatur illecebris blandis uoluptatis, siue  
 etiam, quia nihil prolatum erat melius, illud, quod erat,  
 tenebant. post Amasanium autem multi eiusdē amuli-  
 rationis multa cum scripsissent, Italiā totam occupaue-  
 runt: quodq; maximum argumentum est, non dici illa  
 subtiliter, quodd & facile ediscantur, & ab indoctis pro-  
 bentur; id illi firmamentum esse disciplinae putāt. sed  
 defendat quidem quod quisque sentit: sunt. n. iudicia  
 libera. nos institutum tenebimus: nullisq; unius discipli-  
 nae legibus astricti, quibus in philosophia necessario pa-  
 reamus, quid sit in quaq; re maxime probabile, semper  
 requiremus. quod cum saepe aliās, tum nuper in Tuscu-  
 lano studiose egimus: itaq; expositis tridui disputationis  
 bus, quartus dies hoc libro concluditur: ut enim in infe-  
 riorem ambulationem descendimus, quod idem fecera-  
 mus superioribus diebus, sic acta res est. M. Di-  
 cat, si quis uult, de qua re disputare uelit. A. Nō mihi  
 uidetur omni animi perturbatione posse sapiens uaca-  
 re. M. Aegritudine quidem hesternā disputatione ui-  
 debatur: nisi forte temporis causa assentiebare. A. Mi-  
 nime uero: nam mihi egregie probata est oratio tua.  
 M. Non igitur existimas cadere in sapientem aegritudi-  
 nem? A. Prorsus non arbitror. M. Atqui, si ista per-  
 turbare animum sapientis nō potest, nulla poterit. quid  
 enim? metus ne conturbet? at earum rerum est absen-  
 tium



rium metus, quarum præsentium est ægritudo. sublata  
 igitur ægritudine, sublatus est metus. restant duæ per-  
 turbationes, lætitia gestiens, & libido: quæ si non cadēt  
 in sapientem, semper mens erit tranquilla sapientis. A.  
 Sic prorsus intelligo. M. Vtrum igitur mauis ē statim  
 ne nos uela facere, an quasi ē portu egredientes paulu-  
 lum remigare? A. Quidnam est istuc? non enim intel-  
 ligo. M. Quia Chrysippus et Stoici, cum de animi per-  
 turbationibus disputant, magnam partem in his partiē-  
 dis, & definiendis occupati sunt: illa eorum perexigua  
 oratio est, qua medeātur animis, nec eos turbulētos esse  
 patiantur. Peripatetici autem ad placādos animos mul-  
 ta afferunt: spinas partiendi, & diffiniendi prætermi-  
 tunt. quærebam igitur, utrum panderem uela oratio-  
 nis statim, an eam ante paululum dialecticorum remis  
 propellerem. A. Isto modo uero: erit enim hoc totum,  
 quod quero, ex utroque perfectius. M. Est id quidem  
 rectius: sed post requires, si quid fuerit obscurius. A.  
 Faciam equidem. tu tamen, ut soles, dices ista ipsa ob-  
 scura planius, quā dicuntur à Græcis. M. Enitar  
 quidem: sed intento opus est animo, ne omnia dilaban-  
 tur, si unum aliquod effugerit. Quoniam, quæ Græci  
 πᾶσι uocant, nobis perturbationes appellari magis pla-  
 cet, quā morbos; in his explicādis ueterem illam equi-  
 dem Pythagoræ primū, deinde Platonis descriptionem  
 sequar: qui animum in duas partes diuidunt: alterā  
 rationis participem faciunt, alteram expertem. in par-  
 ticipe rationis ponunt tranquillitatem, id est placidam,  
 quietamq; constantiam: in illa altera motus turbidos  
 tum iræ, tum cupiditatis, contrarios, inimicosq; rationi.



T V S C. Q V A E S T.

fit igitur hic fons . utamur tamen in his perturbatio-  
nibus describendis Stoicorum diffinitionibus, et partiti-  
onibus : qui mihi uidentur in hac quaestione uersari acu-  
tissime . Est igitur Zenonis haec diffinitio, ut perturba-  
tio sit, quod  $\pi\acute{\alpha}\epsilon\theta$  ille dicit, auersa à recta ratione con-  
tra naturam animi cōmotio . quidam breuius, pertur-  
bationem esse appetitum uehementiorem dicunt: sed ue-  
hementiorem eum uolunt esse , qui longius discesserit à  
naturæ constantia . partes autem perturbationum uo-  
lunt ex duobus opinatis bonis nasci, & ex duobus opi-  
natis malis : ita esse quattuor . ex bonis libidinem, &  
letitiam ; ut sit letitia præsentiū bonorum, libido fu-  
tutorum : ex malis metum & ægritudinem nasci cen-  
sent , metum futuris , ægritudinem præsentiū : quæ  
enim uenientia metuuntur , eadem efficiunt ægritudi-  
nem instantia . letitia autem, & libido in bonorū opi-  
nitione uersantur , cum libido ad id , quod uidetur bo-  
num, illecta , & inflammata rapiatur, letitia, ut ade-  
pta iam aliquid concupitum, efferatur, & gestiat : na-  
tura enim omnes ea, quæ bona uidentur, sequuntur, fu-  
giuntq; contraria . quamobrem simul obiecta species cu-  
inspiciam est , quod bonum uideatur ; ad id adipiscen-  
dum impellit ipsa natura . id cum constanter pruden-  
terq; fit , eiusmodi appetitionem Stoici βούλησιν appella-  
lant, nos appellamus uoluntatem . eam illi putant in so-  
lo esse sapiente : quam sic diffiniunt . uoluntas est, quæ  
quid cum ratione desiderat : quæ autem aduersa ratio-  
ne incitata est uehementius , ea libido est, uel cupiditas  
effrenata , quæ in omnibus stultis inuenitur . itemq; ,  
cum ita mouemur , ut in bono simus aliquo , duplici-



ter id contingit . nam cū ratione animus mouetur placide, atque constanter, tum illud gaudium dicitur: cum autem & inaniter, & effuse animus exultat, tū illa lætitia gestiens, uel nimia dici potest: quam ita diffiniūt, sine ratione animi elationē . quo modoq; bona natura appetimus, sic à malis natura declinamus: quæ declinatio si cū ratione fiet, cautio appelletur, eaq; intelligatur in solo esse sapiente: quæ autem sine ratione, & cum exanimatione humili, atque fracta, nominetur metus. est igitur metus rationi aduersa cautio . præsentis autē mali sapientis affectio nulla est. stulti autem ægritudo est ea, qua afficiuntur in malis opinatis, animosq; demittunt, & contrahunt rationi non obtemperantes . itaque hæc prima definitio est, ut ægritudo sit animi aduersante ratione cōtractio. sic quatuor perturbationes sunt, tres constantiæ: quoniam ægritudini nulla constantia opponitur. sed omnes perturbationes iudicio censent fieri, et opinione. itaque eas diffiniunt pressius, ut intelligatur non modo quā uitiosæ, sed etiā quā in nostra sint potestate . est igitur ægritudo, opinio recens mali præsentis: in quo demitti contrahiq; animo rectum esse uideatur . Lætitia opinio recens boni præsentis, in quo efferri rectum esse uideatur. Metus opinio impendentis mali, quod intolerabile esse uideatur. Libido opinio uenturi boni, quod, sit ex usu, iam præsens esse, atq; adesse . sed quæ iudicia, quasq; opiniones perturbationum esse dixi, non in eis perturbationes solum positas esse dicunt, uerum illa etiam, quæ efficiuntur perturbationibus, ut ægritudo quasi morsum ali- quē doloris efficiat, metus recessum quēdam animi, et



TVSC. QVAEST.

fugam, letitia profusam hilaritatem, libido effrenatam appetentiā. opinionem autem, quam in omnes diffinitiones superiores inclusimus, uolūt esse imbecillam assensionem. sed in singulis perturbationibus partes eiusdem generis plures subiiciuntur. ut aegritudini inuidencia (ut edum est enim docendi causa uerbo minus usitato, quoniam inuidia non in eo, qui inuidet, solum dicitur, sed etiam in eo, cui inuidetur) æmulatio, obreftatio, misericordia, angor, luctus, moeror, erumna, dolor, lamentatio, sollicitudo, molestia, afflictatio, desperatio, & si qua sunt de genere eodem. sub Metum autem subiecta sunt pigritia, pudor, terror, timor, pauor, exanimatio, conturbatio, formido. Voluptati maleuolentia lætas malo alieno, delectatio, iactatio, & similia. Libidini ira, excandescencia, odium, inimicitia, discordia, indigentia, desiderium, & cetera eiusmodi. hæc autem diffiniunt hoc modo. Inuidenciam esse dicunt aegritudinem susceptam propter alterius res secundas, quæ nihil noceant inuidenti. nam si quis doleat eius rebus secundis, à quo ipse lædatur, non recte dicitur inuidere: ut si Hectori Agamemnon. qui autem, cui alterius commoda nihil noceant, tamen eum doleat his frui, is inuidet profecto. Aemulatio autem dupliciter illa quidem dicitur, ut & in laude, & in uitio nomen hoc sit. nam et imitatio uirtutis æmulatio dicitur; sed ea nihil hoc loco utimur; est enim laudis: et est æmulatio aegritudo, si eo, quod concupierit, alius potiatur, ipse careat. Obreftatio autem est ea, quam intelligi zelotypiam uolo, aegritudo ex eo, quod alter quoque potiatur eo, quod ille ipse concupierit. Misericordia est



agritudo ex miseria alterius iniuria laborantis : nemo enim parricida aut proditoris supplicio misericordia cō mouetur . Angor est agritudo premens . Luctus ægritudo ex eius, qui charus fuerit, interitu acerbo . Mœror agritudo flebilis . Erūna agritudo laboriosa . Dolor agritudo crucians . Lamentatio agritudo cū eulatu . Sollicitudo agritudo cum cogitatione . Molestia agritudo permanens . Afflictatio agritudo cū uexatione corporis . Desperatio agritudo sine ulla rerū expectatione meliorum . Quæ autem subiecta sunt sub metu, ea sic diffiniunt : Pigritiam metum cōsequentis laboris : Terrorem metum cōcutientem; ex quo fit, ut pudorem rubor, terrorem pallor, & tremor, & deniū crepitus consequatur : Timorem metum mali appropinquantis : Pauorem metū mentem loco mouentem; ex quo illud Ennii,

» Tum pauor sapientiam mihi omnem ex animo expectorat :

Exanimationem metum subsequenter, & quasi comitem pauoris: Cōturbationem metum excutientem cogitata : Formidinem metū permanentem . Voluptatis autem partes hoc modo describūt, ut Maleuolentia sit uoluptas ex malo alterius sine emolumento suo, Delectatio uoluptas suauitate auditus animū deliniēs . & qualis est hæc aurīū, tales sunt oculorū, et tactionū, & odoracionū, & saporū: quæ sunt omnes unius generis, ad perfundendum animum tanquam illiquefactæ uoluptates . Iactatio est uoluptas gestiens, & se efferēs insolentius . Quæ autē libidini subiecta sunt, ea sic definiūt, ut Ira sit libido puniēdi eius, qui uideatur læsisse

ii iij



T V S C. Q V A E S T.

iniuria. Excandescencia autē sit ira nascens, et modo existēs: quæ δύμπος græce dicitur: Odium ira inueterata: Inimicitia ira ulciscendi tēpus obseruans: Discordia ira acerbior, intimo odio, & corde concepta: Indigentia libido inexplebilis: Desiderium libido eius, qui non dum adsit, uidendi. distinguunt illud etiam, ut sit libido earum rerum, quæ dicuntur de quodam, aut quibusdam; quæ κατηγορήματα dialectici appellant: ut habere diuitias, capere honores. Indigentia libido rerū ipsarū est, ut honorum, ut pecuniæ. omnium autem perturbationū fontem esse dicunt intemperantiam: quæ est à tota mente, & à recta ratione defectio, sic auersa à præscriptione rationis, ut nullo modo appetitiones animi nec regi, nec contineri queant. quemadmodum igitur temperantia sedat appetitiones, & efficit, ut hæ rectæ rationi pareant; conseruatq; considerata iudicia mentis: sic huic inimica intemperantia omnem animi statum inflāmat, conturbat, incitat. itaque & ægritudines, & metus, & reliquæ perturbationes omnes gignuntur ex ea. quemadmodum cum sanguis corruptus est, aut pituita redundat, aut bilis, in corpore morbi, ægrotationesq; nascuntur: sic prauarum opinionum conturbatio, & ipsarum inter se repugnantia sanitate animi spoliāt, morbisq; perturbat. ex perturbationibus autem primum morbi conficiuntur; quæ uocant illi νοσήματα; eaq; quæ sunt eis morbis contraria; quæ habent ad res certas uitiosam offensionem, atque fastidium; deinde ægrotationes, quæ appellantur à Stoicis ἀρρώστια; hisq; item oppositæ contrariæ offensiones. hoc loco nimium operæ consumitur à Stoicis, ma-



xime a Crisippo, dum morbis corporum comparatur morborum animi similitudo. qua oratione minime necessaria prætermiſſa, ea, quæ rem continent, pertrahemus. intelligatur igitur, perturbationem, iam tantibus se opinionibus inconstanter & turbide, in motu esse semper. cum autem hic feruor, concitatioq; animi inueterauerit, & tanquam in uenis, medullisq; insederit; tunc existit & morbus, & agrotatio, & offensiones eæ, quæ sunt eis morbis, agrotationibusq; contrariæ. hæc, quæ dico, cogitatione quidem inter se differunt, re uero copulata sunt, eaq; oriuntur ex libidine, & læticia. nam cum est concupita pecunia, nec adhibita continuo ratio, quasi quædam Socratica medicina, quæ sanaret eam cupiditatem; permanat in uenas, & inheret in uisceribus illud malum, existitq; morbus, & agrotatio: quæ aueli inueterata non possunt: eiq; morbo nomen est auaritia. similiterq; ceteri morbi: ut gloriæ cupiditas, ut mulierositas, ut ita appellem eam, quæ græce φιλογυνεία dicitur, ceteriq; similiter morbi agrotationesq; nascuntur. quæ autem his sunt contraria, ea nasci putantur à metu, ut odium mulierum, quale in μισογυνεία est, ut in hominum uniuersum genus, quod accepimus de Timone, qui μισάνθρωπος appellatur; ut inhospitalitas est. quæ omnes agrotationes animi ex quodam metu nascuntur earum rerum, quas fugiunt, & oderunt. definiunt autem animi agrotationem, opinionem uehementem de re non expetenda, tanquam ualde expetenda sit, inherentem, & penitus insitam. quod autem nascitur ex offensione, ita definiunt, opinionem uehementem de re non fugienda, inheren-



tem, & penitus insitam, tanquam fugienda. hæc autem opinatio est, iudicare se scire, quod nesciat. Aegrotationi autem talia quædam subiecta sunt, auaritia, ambitio, mulierositas, pernicacia, ligurritio, uinolætia, cupedia, & si qua sunt similia. est autem auaritia opinatio uehemens de pecunia, quasi ualde expetenda sit, inherens & penitus insita. similiq; est eiusdem generis diffinitio reliquarum. Offensionum autem diffinitiones sunt eiusmodi, ut inhospitalitas sit opinio uehemens ualde fugiendum esse hospitem, eaq; inherens & penitus insita. si milititer definitur & mulierum odium, ut Hippolyti, & ut Timonis generis humani. Atq; ut ad ualitudinis, si similitudinem ueniam, eaq; collatione utamur aliquando, sed parcius quàm solent Stoici: ut sunt alij ad alios morbos procliuiores: itaque dicimus grauedinosos quosdam, quosdam torminosos, nō quia semper sint, sed quia sæpe sint alij ad metum, alij ad aliam perturbationem. ex quo in alijs anxietas, unde anxij, in alijs iracundia dicitur: quæ ab ira differt: estq; aliud iracundum esse, aliud iratum, ut differt anxietas ab angore: neque enim omnes anxij, qui anguntur aliquando; neque anxij, semper anguntur: ut inter ebrietatem & ebriositatem interest: aliudq; est esse amatorem, aliud amantem. atque hæc aliorum ad alios morbos procliuitas late patet: nam pertinent ad omnes perturbationes. in multis etiam uitij apparet: sed nomen res non habet. ergo inuidi, & maleuoli, liuidi, & timidi, & misericordes, quia procliuēs ad eas perturbationes, non quia semper feruntur. hæc igitur procliuitas ad suum quodque genus à similitudine



corporis agrotatio dicitur, dum ea intelligatur ad agrotandum proclivitas. sed hæc in bonis rebus, quod alij ad alia bona sunt aptiores, facilitas nominetur; in malis proclivitas, ut significet lapsionem; in neutris habeat superius nomen. quo modo autem in corpore morbus, agrotatio, & vitium, sic in animo. Morbum appellant totius corporis corruptionem: Aegrotationem morbum cum inbecillitate: Vitium, cum partes corporis inter se dissident. ex quo pravitas membrorum, distortio, deformitas. itaque illa duo, morbus, & agrotatio, ex totius valetudinis corporis conquassatione, & perturbatione gignuntur, vitium autem integra valetudine ipsum ex se cernitur. sed in animo tantum modo cogitatione possumus morbum ab agrotatione seiungere. vitiositas autem est habitus, aut affectio in tota vita inconstans, & à se ipsa dissident. ita fit, ut in altera corruptione opinionum morbus efficiatur, & agrotatio, in altera inconstantia, & repugnantia: non enim omne vitium partes habet dissidentes; ut eorum, qui non longe à sapientia absunt, affectio est illa quidem discrepans à se ipsa, dum est insipiens, sed non distorta, nec prava. morbi autem & agrotationes partes sunt vitiositatis: sed perturbationes sine ne eiusdem partes, questio est: vitia enim affectiones sunt manentes, perturbationes autem mouentes, ut non possint affectionum manentium partes esse. atque ut in malis attingit animi naturam corporis similitudo, sic & in bonis: sunt enim in corpore præcipua, pulchritudo, vires, valetudo, firmitas, uelocitas: sunt item in animo. corporis temperatio, cum ea congrua



## TVSC. QV AEST.

unt inter se, è quibus constamus: sanitas sic animi dicitur, cum eius iudicia, opinionesq; concordant. eaq; est animi uirtus: quam alij ipsam temperantiam dicunt esse, alij obtemperantem temperantiae praeceptis, & eam subsequenter, nec habentem ullam speciem suam, sed, siue hoc, siue illud sit, in solo esse sapiente. est autem quaedam animi sanitas, quae in insipientem etiam cadat, cum curationes medicorum perturbatio mentis aufertur. & ut corporis est quaedam apta figura membrorum, cum coloris quaedam suauitate; eaque dicitur pulchritudo: sic in animo opinionum, iudiciorumq; æquabilitas, & constantia, cum firmitate quaedam, et stabilitate uirtutem subsequens, aut uirtutis uim ipsam continens, pulchritudo uocatur. itemq; uiribus corporis, & neruis, et efficacitati similes, similibus quoque uerbis, animi uires nominantur. uelocitas autem corporis, celeritas appellatur: quae eadem ingenij etiam laus habetur, propter animi multarum rerum breui tempore percursionem. illud animorum corporumq; dissimile est, quod animi ualentes morbo tentari non possunt, corpora possunt. sed corporum offensiones sine culpa accidere possunt, animorum non item. quorum omnes morbi, & perturbationes ex aspernatione rationis eueniunt: itaque in hominibus solum existunt: nam bestiae simile quiddam faciunt, sed in perturbationes non incidunt. inter acutos autem, & hebetes interest, quod ingeniosi, ut æs Corinthium in eruginem, sic illi in morbum & incidunt tardius, & recreantur otius, hebetes non item. nec uero in omnem morbum, ac perturbationem animus ingeniosi cadit: non enim mul-



ra efferata, & immania: quædam autem humanitatis  
 quoque habent primam speciem, ut misericordia, ægri-  
 tudo, metus. agrotationes autem & morbi animorum  
 difficilius euelli posse putantur, quàm summa illa ui-  
 tia, quæ uirtutibus sunt contraria: morbis enim ma-  
 nentibus, uitia sublata esse non possunt, quia non tam  
 celeriter sanantur, quàm illa tolluntur. habes ea, quæ  
 de perturbationibus enucleate disputant Stoici: quæ lo-  
 gica appellant, quia differuntur subtilius. è quibus quo-  
 niam tanquam è scrupulosis cotibus enauigabit oratio,  
 reliquæ disputationis cursum teneamus: modo satis illa  
 dilucide dixerimus pro rerum obscuritate. A. Proxus sa-  
 tis: sed si qua diligentius erunt cognoscenda, quæremus  
 aliàs: nunc uela, quæ modo dicebas, expectamus, &  
 cursum. M. Quando & alijs locis de uirtute diximus,  
 & sepe dicendum erit (pleraq; enim quæstiones, quæ  
 ad uitam, moresq; pertinent, à uirtutis fonte ducun-  
 tur) quando igitur uirtus est affectio animi, constans,  
 conueniensq;, laudabiles efficiens eos, in quibus est, &  
 ipsa per se sua sponte, seperata etiam utilitate, laudabi-  
 lis: ex ea proficiuntur honestæ uoluntates, sententiæ,  
 actiones, omnisq; recta ratio: quanquam ipsa uirtus  
 breuissime recta ratio dici potest. huius igitur uirtutis  
 contraria est uitiositas: sic enim malo, quàm malitiam  
 appellare eam, quam Græci κακία appellant: nam ma-  
 litia certi cuiusdam uitij nomen est, uitiositas omnium.  
 ex qua cogitantur perturbationes: quæ sunt, ut pau-  
 lo ante diximus, turbidi animorum, concitatiq; motus,  
 auersi à ratione, & inimicissimi mentis, uitæq; tran-  
 quillæ: important enim ægritudines anxias, atque



T V S C. Q V A E S T .

acerbas, animosq; affligunt, & debilitant metu. ijdem inflammant appetitione nimia : quam tum cupiditatem, tum libidinem dicimus, impotentiam quandā animi à temperantia, & moderatione plurimum dissidentem. quæ si quando adepta est id, quod ei fuerit cōcupitum, tum fert alacritatem, ut nihil esse constet, quod agat ; ut ille, qui uoluptatem animi nimiam summum esse errorem arbitratur. eorum igitur malorum in una uirtute posita sanatio est. quid autem est non miseri-  
solum, sed foedius etiam, & deformius, quā ægritudine quis afflictus, debilitatusq; iacens? cui miseriæ proximus est is, qui appropinquās aliquod malum metuit, exanimatusq; pendet animi. quā uim significantes mali, poetæ impendere apud inferos saxum Tantalō faciunt, ob scelera, animiq; impotentiam, & superbiloquentiam. ea communis poena stultitiæ est : omnibus enim, quorum mens abhorret à ratione, semper aliquis alijs dolor, alijs terror impendet. atque ut hæc tabificæ mentis perturbationes sunt ; ægritudinem dico, & metum : sic hilariores illæ, cupiditas auide semper aliquid expetens, & inanis alacritas, id est lætitiæ gestiens, non multum differunt ab amentia. ex quo intelligitur, qualis ille sit, quem tum moderatum, aliàs modestum, & temperantem, aliàs cōstantem, continentemq; dicimus. non nunquam hæc eadem uocabula ad frugalitatis nomen, tanquam ad caput, referre uolumus. quod nisi eo nomine uirtutes continerentur, nunquam illud ita peruulgatum esset, ut iam prouerbij locum obtineret, hominem frugi omnia recte facere. quod idem cum Stoici de sapiente dicunt, nimis admira-



biliter, nimisq; magnifice dicere uidentur. ergo is, qui s-  
 quis est, qui moderatione, & constantia quietus animo  
 est, sibiq; ipse placatus, ut neque tabescat molestijs, neq;  
 frangatur timore, nec sitienter quid appetens ardeat  
 desiderio, nec alacritate furili gestiens deliquescat; is est  
 sapiens, quem quærimus; is est beatus, cui nihil huma-  
 narum rerum aut intolerabile ad demittendum animū,  
 aut nimis latabile ad efferendum uideri potest: quid  
 enim uideatur ei magnum in rebus humanis, cui æter-  
 nitas omnis, totiusq; mundi nota sit magnitudo? nam  
 quid aut in studijs humanis, aut in tam exigua uitæ  
 breuitate magnum sapienti uideri potest, qui semper  
 animo sic excubat, ut ei nihil improuisum accidere pos-  
 sit, nihil inopinatum, nihil omnino nouum? atque idem  
 ita acrem in omnes partes aciem intendit, ut semper ui-  
 deat sedem sibi, ac locum sine molestia, atque angore  
 uiuendi, ut quemcunque casum fortuna inuexerit, hūc  
 apte & quiete ferat. quod qui faciet, non ægritudi-  
 ne solum uacabit, sed etiam perturbationibus reliquis  
 omnibus. his autem uacuus animus perfecte atque ab-  
 solute beatos efficit: idemq; concitatus, & abstractus  
 ab integra, certa q; ratione, non constantiam solum  
 amittit, uerum etiam sanitatem. quocirca mollis &  
 eneruata putanda est Peripateticorum ratio, & ora-  
 tio, qui perturbari animos necesse esse dicunt, sed ad-  
 hibent modum quendam, quem ultra progredi non  
 oporteat. modum tu adhibes uitio? an uitium nullum  
 est, non parere rationi? an ratio parum præcipit, nec  
 bonum illud esse, quod aut cupias ardēter, aut adeptus  
 te efferas insolenter? nec porro malum, quo aut op-



T V S C. Q V A E S T.

pressus iaceas, aut, ne opprimare, mente uix constes?  
 eaq; omnia aut nimis tristia, aut nimis leta errore fieri?  
 qui si error stultis extenuetur die, ut cum res eadem maneat, aliter ferat inueterata, aliter recentia: sapientem ne attingat quidem omnino. etenim quis erit tandem modus iste? quæramus enim modum ægritudinis, in qua operæ plurimum ponitur. ægre tulisse P. Rutilium fratris repulsam Consulatus, scriptum apud Fānium est: sed tamen transisse modum uidetur, quippe qui ob eam causam à uita recesserit. moderatius igitur ferre debuit. quid, si, cum id ferret modice, mors liberorum accessisset? nata esset ægritudo noua, sed ea modica: magna tamen facta esset accessio. quid, si deinde dolores graues corporis, si bonorum amissio, si cæcitas, si exilium, si pro singulis malis ægritudines accederent? summa ea fieret, quæ non sustineretur. qui modum igitur uitio quærit, similiter facit, ut si posse putet eum, qui se è Leucade præcipitauerit, sustinere se, cum uelit: ut enim id non potest, sic animus perturbatus, & incitatus nec cohibere se potest, nec, quo loco uult, insistere omnino: quæq; crescētia perniciose sunt, eadem sunt uitiosa nascentia. ægritudo autem ceteraq; perturbationes amplificatae certe pestiferae sunt: igitur etiam susceptæ continuo in magna pestis parte uersantur: etenim ipsæ se impellunt, ubi semel à ratione discessum est; ipsaq; sibi imbecillitas indulget, in altumq; prouehitur imprudens, nec reperit locum consistendi. quamobrem nihil interest, utrum moderatas perturbationes approbent, an moderatam iniustitiam, moderatā ignauiam, moderatam intemperantiam. qui enim uitij mo



dum apponit, is partem suscipit uitiorum. quod cum ipsum per se odiosum est, tum eo molestius, quia sunt in lubrico, incitataq; semel in proclive labuntur, susline-riq; nullo modo possunt. Quid, quod iidem Peripatetici perturbationes istas, quas nos extirpandas putamus, nō modo naturales esse dicunt, sed etiam utiliter à natura datas? quorum est talis oratio. Primum multis uerbis iracundiam laudant: cōtem fortitudinis esse dicunt, multoq; & in hostem, et in improbum ciuem uehementiores iratorum impetus esse: leues autem ratiunculas eorum, qui ita cogitarent: praelium rectum est hoc fieri: conuenit dimicare pro legibus, pro libertate, pro patria. hæc nullam habent uim, nisi ira excanduit fortitudo. nec uero de bellatoribus solum disputant. imperia seueriora nulla esse putant sine aliqua acerbitate iracundiæ. oratorem denique nō modo accusantē, sed ne defendentem quidem probant sine aculeis iracundiæ. quæ etiam si non adsit, tamen uerbis atq; motu simulandam arbitrantur, ut auditoris iram oratoris incendat actio. uirū denique uideri negant, qui ira sci nesciat. eamq; quam lenitatem nos dicimus, uitioso lentitudinis nomine appellant. nec uero solum hanc libidinem laudant (est enim ira, ut modo diffiniui, ulciscendi libido) sed illud ipsum genus uel libidinis, uel cupiditatis ad summam utilitatem esse dicunt à natura datum: nihil enim quenquam, nisi quod libeat, præclare facere posse. noctu ambulabat in publico Themistocles, quod somnum capere non posset; quæ rentibusq; respondebat, Milciadis trophæis se è somno suscitari. cui non sunt auditæ Demosthenis uigi-



lie? qui dolere se aiebat, si quando opificum antelucana uictus esset industria. philosophiae denique ipsius principis nunquam in suis studiis tantos progressus sine flagranti cupiditate facere potuissent. ultimas terras lustrasse Pythagoram, Democritum, Platonem accepimus: ubi enim quid esset, quod disci posset, eò ueniendum iudicauerunt. num putamus hæc fieri sine summo cupiditatis ardore potuisse? ipsam ægritudinem, quam nos ut tetram, & immanem beluam fugiendam esse diximus, non sine magna utilitate à natura dicunt constitutam, ut homines castigationibus, reprehensionibus, ignominijs affici se in delicto dolerent: impunitas enim peccatorum data uidetur eis, qui & ignominiam, & infamiam ferunt sine dolore. morderi est melius conscientia. ex quo est illud è uita ductum ab Afranio. nam cum dissolutus filius, heu me miserum, dixisset; tum seuerus pater,

- » Dummodo doleat aliquid, doleat quod lubet.  
Reliquas quoque partes ægritudinis utiles esse dicunt, misericordiam ad opem ferendam, & calamitates hominum indignorum subleuandas: ipsum illud æmulari, obrectare, non esse inutile; cum aut se non idem uideat consecutum, quod alium; aut aliud idem, quod se: metum uero si quis sustulisset, omnem uitæ diligentiam sublatam fore, quæ summa esset in eis, qui leges, qui magistratus, qui paupertatem, qui ignominiam, qui mortem, qui dolorem timerent. hæc tamen ita disputant, ut rescanda esse fateantur, euelli penitus dicant nec posse, nec opus esse: ut in omnibus ferè rebus mediocritatem esse optimam existiment. quæ cū exponunt,



nunt, nihil ne tibi uidentur, an aliquid dicere? A. Mihi uero dicere aliquid: itaque expecto, quid ad ista. M. Reperiam fortasse: sed illud ante. uides ne, quanta fuerit apud Academicos uerecundia? plane enim dicunt quod ad rem pertineat. Peripateticis respondetur à Stoicis. digladiantur illi, per me licet: cui nihil est necesse, nisi ubi sit illud, quod uerissimum uideatur, inquirere. quid est igitur, quod occurrat in hac quaestione, è qua possit attingi aliquid uerisimile, quo longius mens humana progredi non potest? definitio perturbationis: qua recte Zenonem usum puto. ita enim definit, ut perturbatio sit aduersa ratione contra natura animi commotio; uel breuius, ut perturbatio sit appetitus uehementior: uehementior autem intelligatur is, qui procul absit à naturæ constantia. quid ad has definitiones possim dicere? atqui hæc pleraque sunt prudenter, acuteq; differentium. illa quidem ex rhetorum pompa, ardores animorum, cotesq; uirtutum. an uero uir fortis, nisi stomachari coeperit, non potest fortis esse? gladiatorum id quidem. quanquam in eis ipsis uidemus sæpe constantiam. colloquuntur, congregiuntur. aliquid postulant, ut magis placati, quam irati esse uideantur. sed in illo genere sit sanè Pacideianus aliquis hoc animo, ut narrat Lucilius.

- » Occidā illū equidem, & uincā, si id quaeritis, inquit.
- » Verum illud credo fore, in os prius accipiam ipse,
- » Quam gladiū in stomacho, sura, ac pulmonibus sisto.
- » Odi hominem: iratus pugno: nec longius quidquā
- » Vobis, quam dextræ gladium dū accommodet alter:
- » Vsque adeo studio, atque odio illius, efferor ira.

k k



at sine hac gladiatoria iracūdia uidemus progredien-  
tem apud Homerum Aiace[m] multa cū hilaritate, cum  
depugnaturus esset cum He[ct]ore. cuius, ut arma sum-  
psit, ingressio lætitiā attulit socijs, terrorem autem ho-  
stibus: ut ipsum He[ct]orem, quemadmodum est apud  
Homerum, toto pectore tremētem prouocasse ad pu-  
gnā[m] pœniteret. atque hi collocti inter se, priusquam  
manum consererent, leniter & quiete, nihil ne in ipsa  
quidem pugna iracunde, rabiose u[e] fecerunt. ego ne  
Torquatū[m] quidem illum, qui hoc cognomen inuenit,  
iratum existimo Gallo torquem detraxisse; nec Mar-  
cellum apud Clastidium ideo fortem fuisse, quia fuerit  
iratus. de Africano quidem, quia notior est nobis pro-  
pter recentem memoriā, uel iurare possum, non il-  
lum iracundia tum inflammātum fuisse, cum in acie  
M. Alienū Pelignū[m] scuto protexit, gladiumq[ue] hosti  
in pectus infixit. de L. Bruto fortasse dubitarim, an  
propter infinitū odium tyranni effrenatius in Arun-  
tem inuasērit: uideo enim utrunque comminus icū  
cecidisse contrario. quid igitur huc adhibetis iram?  
an fortitudo, nisi insanire cœperit, impetus suos  
non habet? quid? Hercule[m], quem in cœlum ista  
ipsa, quam uos iracundiam esse uultis, sustulit forti-  
tudo, iratum ne censes conflixisse cum Erymanthio  
apro; aut leone Nemeo? an etiam Theseus Mara-  
thonij tauri cornua comprehendit iratus? uide, ne  
fortitudo minime sit rabiosa, sitq[ue] iracundia tota leui-  
tatis. neque enim est illa fortitudo, quæ rationis expers  
est. contemnendæ sunt humanæ res: negligenda mors  
est: patibiles & dolores, & labores putandi. hæc cum



constituta sint iudicio, atque sententia, tum est robusta illa, & stabilis fortitudo. nisi forte quæ uehementer, acriter, animose fiunt, iracunde fieri suspicamur. mihi uero ne Scipio quidem ille Pontifex maximus, qui hoc Stoicorum uerum esse declarauit, nunquam iratum esse sapientem; iratus uidetur fuisse Ti. Graccho, tum, cum Consulem languentem reliquit, atque ipse priuatus, ut si Cōsul esset, qui Remp. saluā esse uellet, se sequi iussit. nescio, ecquid ipsi nos fortiter in Rep. fecerimus. si quid fecimus, certe irati non fecimus. an est quidquam similis insanie, quā ira? quā bene Ennius initium dixit insanie. color, uox, oculi, spiritus, impotentia dictorum, atque factorum quam partem habent sanitatis? quid Achille Homérico fœdus? quid Agamemnone in iurgio? nā Aiacem quidem ira ad furorem, mortemq; perduxit. non igitur desiderat fortitudo aduocata iracundiam. satis est instructa, armata, parata per sese. nam isto modo quidem licet dicere utilem uolentiam ad fortitudinem, utilem etiam dementiam, quod & insani, & ebrii multa faciunt saepe uehementius;

- » Semper Ajax fortis, fortissimus tamen in furore:
  - » Nā facinus fecit maximūcū, Danais inclinātibz,
  - » Sūmā rem perfecit manus, praliū cū restituit insaniēs.
- dicamus igitur utilem insaniam. tracta definitionem fortitudinis: intelliges eam stomacho non egere. fortitudo est igitur animi affectio legi summæ in perpetendis rebus obtemperans; uel cōseruatio stabilis iudicij in eis rebus, quæ formidolosæ uidentur, subeundis, & repellendis; uel scientia rerum formidosarum, con-



T V S C. Q V A E S T.

trariarumq; perferendarū, aut omnino negligendarū,  
conseruans earū rerum stabile iudiciū. uel breuius, ut  
Chrysippus. nam superiores definitiones erant Sphæri,  
hominis in primis bene definientis, ut putant Stoici:  
sunt enim omnino omnes ferè similes: sed declarant  
communes notiones alia magis alia. quo modo igitur  
Chrysippus? fortitudo est, inquit, scientia perferenda-  
rum rerum, uel affectio animi in patiēdo, ac perferen-  
do, summæ legi parens sine timore. quamuis licet in-  
sectemur istos, ut Carneades solebat: metuo, ne soli  
philosophi sint. quæ enim istarum definitionum non  
aperit notionem nostram, quam habemus omnes de  
fortitudine, rectam, atque inuolutam? qua aperta,  
quis est, qui aut bellatori, aut imperatori, aut ora-  
tori quærat aliquid, neq; eos existimet sine rabie quid-  
quam fortiter facere posse? quid? Stoici, qui omnes  
insipientes insanos esse dicunt, non ne ista colligunt?  
remoue perturbationes, maximeq; iracundiam: iam  
uidebuntur monstra dicere. nunc autem ita differunt,  
sic se dicere, omnes stultos insanire, ut male olere omne  
coenium. at non semper. commoue: senties. sic iras-  
cundus non semper iratus est. laceffe: iam uidebis  
furentem. quid? ista bellatrix iracundia, cum do-  
mum redijt, qualis est cum uxore? cum liberis? cum  
familia? an tum quoque est utilis? est igitur aliquid,  
quod conturbata mens melius possit facere, quàm  
constans? an quisquam potest sine perturbatione men-  
tis irasci? bene igitur nostri, cum omnia essent in  
morbis uitia, quod nullum erat iracundia foedius,  
iracundos solos morbosos nominauerunt. oratorem



uero irasci minime decet, simulare non dedecet. an tibi irasci tū uidemur, cum quid in causis acrius, & uehementius dicimus? quid? cū iam rebus transactis, et præteritis orationes scribimus, num irati scribimus?

» Ecquis hoc animaduertit? Vincite, num aut egisse unquam iratum Aesopū, aut scripsisse existimamus iratum Accium? aguntur ista præclare, & ab oratore quidem melius, si modo est orator, quàm ab ullo histrione: sed aguntur leniter, & mente tranquilla. Libidinem uero laudare, cuius est libidinis? Themistoclem, & Demosthenem mihi profertis: additis Pythagoram, Democritum, Platonem. quid? uos studia libidinem uocatis? quæ uel optimarū rerum, ut ea sunt, quæ profertis, sedata tamen, & tranquilla esse debent. iam ægritudinem laudare, unam rem maxime detestabilem, quorum est tandem philosophorum? à commodè dixit Afranius.

» Dum modo doleat aliquid, doleat quod lubet: dixit enim de adolescente perduto ac dissoluto: nos autem de constantī uiro, ac sapienti quærimus. & quidem illam ipsam iram centurio habeat, aut signifer, uel ceteri, de quibus dici non necesse est, ne rhetorum aperiamus mysteria: utile est enim uti motu animi, qui uti ratione non potest: nos autem, ut testificor sæpe, de sapiente quærimus. At etiam æmulari utile est, obrectare, misereri. cur misereare potius, quàm feras opem, si id facere possis? an sine misericordia liberales esse non possumus? non enim suscipere ipsi ægritudines propter alios debemus, sed alios, si possumus, lenare ægritudine. Obrectare uero alteri,

kk iij



aut illa uitiosa æmulatione, quæ riuilitati similis est, æmulari, quid habet utilitatis, cum sit æmulantis angustia alieno bono, quod ipse non habeat; obrectantis autem alieno bono, quod id etiam alius habeat? quis id approbare possit, ægritudinem suscipere pro experientia, si quid habere uelis? nam solum habere uelle, summa demerita est. Mediocritates autem malorum quis laudare recte possit? quis enim potest, in quo libido, cupiditas ne sit, non libidinosus & cupidus esse? in quo ira, non iracundius? in quo angor, non anxius? in quo timor, non timidus? libidinosum igitur, & cupidum, & iracundum, & anxium, & timidum censemus esse sapientem? de cuius excellentia multa quidem dici quæ uis fuisse, lateque possint, sed breuissime illo modo, sapientiam esse rerum diuinarum, & humanarum scientiam, cognitionemque, quæ causæ cuiusque rei sit. ex quo efficitur, ut diuina imitetur, humana omnia inferiora uirtute ducant. in hunc tu igitur, tanquam in mare, quod est uentis subiectum, perturbationem cadere tibi dixisti uideri? quid est, quod tantam grauitatem, constantiamque perturbet? an improuisum aliquid, atque repentinum? quid potest accidere tale ei, cui nihil subitum est, quod homini euenire possit? Nā quod aiunt nimia refecari oportere, naturalia relinquere: quid tandem potest esse naturale, quod idem nimium esse possit? sunt enim omnia ista ex errorum orta radicibus. quæ euellenda, & extrahenda penitus, non circuncidenda, nec amputanda sunt. Sed quoniam suspicor te non tam de sapiente, quam de te ipso querere (illū enim putas omni perturbatione esse liberū, te uis) uideamus, quā



ta sint, quæ à philosophia remedia morbis animorum  
adhibeantur: est enim quædam medicina certe: nec tã  
fuit hominum generi infensa, atque inimica natura, ut  
corporibus tot res salutare, animis nullam inuenerit.  
de quibus est hoc etiam merita melius, quod corporum  
adiumenta adhibetur extrinsecus, animorum salus in=  
clusa in his ipsis est. sed quo maior est in eis præstãtia, et  
diuinior, eo maiore indigent diligentia. itaque bene  
adhibita ratio cernit, quid optimum sit; neglecta, mul=  
tis implicatur erroribus. ad te igitur mihi iam cõuer=  
tenda omnis oratio est: simulas enim quærere te de sapien=  
te; quæris autem fortasse de te. Earum igitur pertur=  
bationum, quas exposui, uariæ sunt curationes: nam  
neque omnis ægritudo una ratione sedatur: alia est  
enim lugenti, alia miseranti, alia inuidenti adhibenda  
medicina: est enim in omnibus quatuor perturbationi=  
bus illa distinctio, utrũ ad uniuersam perturbationem,  
quæ est aspernatio rationis, aut appetitus uehemẽtior,  
an ad singulas, ut ad metum, libidinem, reliquasq; me=  
lius adhibeatur oratio; Et utrũ illud nõ uideatur ægre  
ferendum, ex quo suscepta sit ægritudo, an omnium re=  
rum tollenda omnino ægritudo: ut si quis ægre ferat,  
se pauperem esse, id ne disputes, paupertatem malum  
non esse, an hominem ægre ferre nihil oportere. nimi=  
rum hoc melius: ne, si forte de paupertate non persua=  
deris, sit ægritudini concedendum: ægritudinem autẽ  
sublata proprijs rationibus, quibus heri usi sumus, quo=  
dam modo etiam paupertatis malum tollitur. sed o=  
mnis eiusmodi perturbatio, animi placatione ablua=  
tur, illa quidem, cum doceas, nec bonum illud esse,



T V S C. Q V A E S T.

ex quo lætitia aut libido oriatur, nec malum, ex quo aut metus, aut ægritudo. ueruntamen hæc est certa, & propria sanatio, si doceas, ipsas perturbationes per se esse uitiosas, nec habere quidquam aut naturale, aut necessarium: ut ipsam ægritudinem leniri uidemus, cū obijcimus moerētibus imbecillitatem animi effœminati, cumq; eorum grauitatem, constantiamq; laudamus, qui non turbulente humana patiantur. quod quidē solet eis etiam accidere, qui illa mala esse censent, ferenda tamen æquo animo arbitrantur. putat aliquis uoluptatem esse bonum, alius autem pecuniam: tamen & ille ab intemperantia, & hic ab auaritia auocari potest. illa autem altera ratio, & oratio, quæ simul & opinionem falsam tollit, & ægritudinem detrahit, est ea quidē utilior, sed raro proficit, neque est ad uulgus adhibenda. quædam autem sunt ægritudines, quas lenare illa medicina nullo modo possit: ut si quis ægre ferat, nihil in se esse uirtutis, nihil animi, nihil officij, nihil honestatis, propter mala is quidē angatur, sed alia quædam ad eum sit admouenda curatio, & talis quidē, quæ possit esse omnium, etiam de cæteris rebus discrepantium philosophorum: inter omnes enim conuenire oportet, commotiones animorum à recta ratione auersas esse uitiosas, ut, etiam si nec mala sint illa, quæ metum, ægritudinem uel, nec bona, quæ cupiditatem, lætitiā uel moueant, tamen sit uitiosa ipsa commotio: constantem enim uolumus quendam, sedatum, grauem, humana omnia prementem illum esse, quem magnanimum, & fortem uirum dicimus: talis autem nec moerens, nec timens, nec cupiens, nec ge-



stiens esse quisquam potest : eorum enim hæc sunt, qui  
 euentus humanos superiores, q̄ suos animos esse ducūt.  
 quare omnium philosophorum, ut ante dixi, una ratio  
 est medendi, ut nihil, quale sit illud quod perturbet ani-  
 mum, sed de ipsa sit perturbatione dicendū. itaque pri-  
 mum in ipsa cupiditate, cum id solum agitur, ut ea tol-  
 latur, nō est querendum, bonum illud nec ne sit, quod  
 libidinem moueat : sed libido ipsa tollenda est : ut si-  
 ue, quod honestum est, id sit summum bonum, siue uo-  
 luptas, siue horum utrumque coniunctum, siue illa tria  
 genera bonorum, tamen, etiam si uirtutis ipsius uehe-  
 mentior appetitus sit, eadem sit omnibus ad deterrendū  
 adhibenda oratio. cōtinet autem sedationem animi hu-  
 mana in conspectu posita natura : quæ quo facilius  
 expressa cernatur, explicanda est oratione cōmunis cō-  
 ditio, lexq; uitæ. itaque nō sine causa cum Orestem fas-  
 bulam doceret Euripides, primos tres uersus reuocasse  
 dicitur Socrates :

- » Neque tam terribilis ulla fando oratio est,
- » Neque fors, neque ita coelitus inuectum malum,
- » Quod non natura humana patiendo ferat.

est autem utilis ad persuadendum ea, quæ acciderunt,  
 ferri & posse, & oportere, enumeratio eorum, qui tulerunt.  
 etsi ægritudinis sedatio & hesternæ disputatione explicata est,  
 & in consolationis libro, quem in medio (nō enim sapientes eramus) mœrore, & dolore cōscrip-  
 simus: quodq; uerat Chrysippus ad recētes quasi tumo-  
 res animi remedium adhibere, id nos fecimus, naturæq;  
 uim attulimus, ut magnitudini medicinæ doloris magni-  
 tudo cōcederet. Sed ægritudini, de qua satis est dispu-



## TVSC. QVAEST.

ratū, finitimus est metus. de quo pauca dicenda sunt. Est enim metus, ut aegritudo praesentis, sic ille futuri mali. itaque nō nulli aegritudinis partem quādā metū esse dicebāt. alij autem metū praemolestiā appellabant, quod est quasi dux consequentis molestiae. quibus igitur rationibus instantia feruntur, eisdem contemnuntur sequentia. nam uidendū est in utrisque, ne quid humile, summissum, molle, effeminatum, fractum, abiectumq; faciamus: sed quanquam de ipsius metus inconstantia, imbecillitate, leuitate dicendum est, tamen multum prodest ea, quae metuuntur, ipsa cōtemnere. itaque, siue casu accidit, siue consilio, percomode factum est, quod eis de rebus, quae maxime metuuntur, de morte, & de dolore, primo, & proximo die disputatum est quae si probata sunt, metu magna ex parte liberati sumus. Ac de malorum opinione haecenus. uideamus nunc de bonorum, id est de laetitia, & de cupiditate. Mihi quidem in tota ratione ea, quae pertinet ad animi perturbationem, una res uidetur causam continere, omnes eas esse in nostra potestate, omnes iudicio susceptas, omnes uoluntarias. hic igitur error est eripiendus, haec detrahenda opinio: atque ut in malis opinatis tolerabiliora, sic in bonis sedatiora sunt efficienda ea, quae magna, & laetabilia dicuntur. atque hoc quidem cōmune malorū, & bonorū: ut si iam difficile sit persuadere, nihil earum rerum, quae perturbent animum, aut in malis, aut in bonis esse habendum, tamen alia ad alium motum curatio sit adhibenda, aliaq; ratione maleuolus, alia amator, alia rursus anxius, alia timidus corrigendus. atque erat facile, sequentem eam rationem, quae



maxime probatur de bonis, & malis, negare unquam  
 letitia affici posse insipientem, quod nihil unquam habe-  
 ret boni. sed loquimur nunc more communi. sint sanè  
 ista bona, quæ putantur, honores, diuitiæ, uoluptates,  
 ceteraq; : tamen in eis ipsis potiundis exultans, ge-  
 stiensq; letitia turpis est: ut, si videre concessum sit, ui-  
 tuperetur tamen cachinnatio: eodẽ enim uitio est effu-  
 sio animi in letitia, quo in dolore contractio; eademq;  
 leuitate cupiditas est in appetendo, qua letitia in fruen-  
 do: & ut nimis afflictæ molestia, sic nimis elati lati-  
 tia iure indicantur leues. & cum inuidere, ægritudinis  
 sit; malis autẽ alienis uoluptatem capere, letitiæ utrũ-  
 que immanitate, & feritate quadã proponenda casti-  
 gari solet. atque ut confidere decet, timere nõ decet: sic  
 gaudere decet, letari nen decet, quoniam docendi cau-  
 sam gaudio letitiam distinguimus. illud iam supra di-  
 ximus, fieri contractionem animi recte nunquam pos-  
 se, elationem posse: aliter enim Næuianus ille gaudet  
 Hector,

- » Latius sum
- » Laudari me abs te pater laudato uiro;  
 aliter ille apud Trabeam Chærea,
- » Lena delinita argento nutum obseruabit meum,
- » Quid uelim, quid studeam. adueniens digito impellam  
 ianuam:
- » Fores patebunt. de improviso Chrysis ubi me aspexerit,
- » Alacris obuiam mihi ueniet complexũ exoptans meũ,
- » Mihi se dedet:  
 quàm hæc pulchra putet, ipse iam dicet.
- » Fortunam ipsam anteibo fortunis meis.



TVSC. QV AEST.

hæc lætitia quàm turpis sit, satis est diligenter attendē-  
tem penitus uidere. & ut turpes sunt, qui efferunt se  
lætitia tum, cum fruuntur ueneris uoluptatibus: sic  
flagitiosi, qui eas inflammato animo concupiscunt. to-  
tus uero iste, qui uulgo appellatur amor (nec hercule  
inuenio, quo nomine alio possit appellari) tantæ læuita-  
tis est, ut nihil uideam, quod putem conferendum.  
quem Cæcilius,

- » =Deum qui non summum putet,
- » Aut stultum, aut rerum esse imperitum existimet;
- » Cui in manu sit, quem esse dementem uelit,
- » Quem sapere; quem sanari, quem in morbum iniici;
- » Quem contra amari, quem accersiri, quem expeti.

ð præclarâ emendatricem uitæ poeticam, quæ amorem,  
flagitiū, & leuitatis auctorem, in concilio deorū collocā-  
dum putet. de comœdia loquor: quæ, si hæc flagitia  
non probaremus, nulla esset omnino. quid autem ex  
tragœdia princeps ille Argonautarum?

- » Tu me amoris magis, quàm honoris seruauisti gratia.  
quid ergo? hic amor Medæe quanta miseriarum incē-  
dia excitauit? atque ea tamen apud alium poetā pa-  
tri dicere audet, se coniugem habuisse
- » Illū, amor quē dederat, qui plus pollet, potiorq; est patre.  
sed poetæ ludere sinamus, quorum fabulis in hoc flagi-  
tio uersari ipsum uidemus Iouem. ad magistros uirtu-  
tis, philosophos ueniamus: qui amorem negant stu-  
pri esse, & in eo litigant cum Epicuro, non multum,  
ut opinio mea fert, mentiente: quis est enim amor iste  
amicitiæ? cur neque deformem adolescentem quis-  
quam amat, neque formosum senem? mihi quidē hæc



in Græcorum gymnasijs nata consuetudo uidetur : in quibus isti liberi , & concessi sunt amores . bene igitur Ennius,

- » Flagitij principium est nudare inter ciues corpora .  
qui ut sint, sicut fieri posse uideo, pudici, solliciti tamen  
& anxij sunt, eoq; magis, quod se ipsi continent , &  
exercent . atque ut muliebres amores omittam, quibus  
maiores licentiam natura concessit : quis aut de Ga-  
nymedis raptu dubitat, quid poetæ uelint; aut non in-  
telligit, quid apud Euripidem & loquatur, & cupiat  
Laius? quid denique homines doctissimi, & summi poe-  
tæ de se ipsis, & carminibus edant, & cantibus? fortis  
uir in sua Rep. cognitus, quæ de iuuenum amore scri-  
psit Alcæus? nam Anacreontis quidem tota poesis est  
amatoria . maxime uero omnium flagrasse amore Rhe-  
ginum Ibicum, apparet ex scriptis . atque horum omnium  
libidinosos esse amores uidemus . philosophi sumus exor-  
ti, & auctores quidem nostro Platone, quem non iniu-  
ria Dicæarchus accusat; qui amoris auctoritatem tri-  
bueremus . Stoici uero & sapientem amaturum esse  
dicunt : & amorem ipsum, conatum amicitiae faciundæ  
ex pulchritudinis specie definiunt . qui si quis est in re-  
rum natura sine sollicitudine, sine desiderio, sine cura,  
sine suspirio, sit sanè : uacat enim omni libidine : hæc  
autem de libidine oratio est . sin autem est aliquis amor,  
ut est certe, qui nihil absit, aut nō multum ab insania,  
qualis in Leucadia est :
- » Si quidem sit quisquam deus, cui ego sum curæ .  
at id erat deis omnibus curandum, quemadmodum hic  
frueretur uoluptate .



- 22 Heu me infelicem .  
 nihil uerius . probe & ille,  
 23 Sanus ne es, qui temere lamentare ?  
 sic insanus suis etiā uidetur . at quas tragœdias effecit ?  
 24 Te Apollo sancte fer opem , teq; omnipotens Neptune  
 inuoco ,  
 25 Vosq; adeo uenti . —  
 mundū totū se ad amorem suū subleuandū cōuersurū  
 putat : Venerem unam excludit, ut iniquam .  
 26 Nam quid ego te appellem Venus ?  
 eā prae libidine negat curare quidquā . quasi uero ipse  
 non propter libidinem tanta flagitia, & faciat, & di-  
 cat . sic igitur affecto hæc adhibenda curatio est, ut ei il-  
 lud, quod cupiat, ostendatur q̄ leue, q̄ contemnendum, q̄  
 nihil sit omnino, q̄ facile uel aliunde, uel alio modo per-  
 fici, uel omnino negligi possit . adducendus est etiam nō  
 nunquam ad alia studia, sollicitudines, curas, negocia .  
 loci denique mutatione, tanquā ægroti nō conualescen-  
 tes, sæpe curandus est . etiā nouo quodā amore ueterem  
 amorem tāquam clauo clauum eijciendum putāt . ma-  
 xime autem admonendus, quantus sit furor amoris : o-  
 mnibus enim ex animi perturbationibus est profecto  
 nulla uehementior : ut, si iam ipsa illa accusare nolis,  
 supra dico, & corruptelas, & adulteria, incesta deni-  
 que, quorum omnium accusabilis est turpitudine : sed ut  
 hæc omittamus, perturbatio ipsa mentis in amore fœda  
 per se est . nam ut illa præteream, quæ sunt furoris : hæc  
 ipsa per sese quam habent læuitatem, quæ uidentur esse  
 mediocria ?  
 27 —iniuriæ ,

22 Su  
 23 Bell  
 24 Ra  
 25 Qu  
 hæc  
 prae  
 turb  
 nabi  
 si na  
 tur, e  
 pudor  
 ro qu  
 sania  
 tres t  
 26 Quis  
 27 Quis  
 nosti,  
 tur in  
 pareat  
 fratre  
 28 Maior  
 29 Qui il  
 igitur  
 30 Impi  
 31 Man  
 eorum  
 gredie  
 dicim  
 de me  
 debet



- 22 Suspiciones, inimicitiae, inducia,  
 23 Bellum, pax rursum. incerta haec si tu postules  
 24 Ratione certa facere, nihilo plus agas,  
 25 Quam si des operam ut cum ratione insanias.

haec inconstantia, mutabilitasq; mentis quem non ipsa prauitate deterreat? est etiā illud, quod in omni perturbatione dicitur, demonstrandū, nullam esse nisi opinabilem, nisi iudicio susceptam, nisi uoluntariam. etenim si naturalis amor esset, & amarent omnes, & amarētur, & semper amarent, & idem amarent, neque aliū pudor, aliū cogitatio, aliū satietas deterreret. Ira uero quanquam diu perturbat animū, dubitationem insaniam non habet; cuius impulsu existit etiam inter fratres tale iurgium:

- 26 Quis homo te exuperauit unquā gentiū impudentia?  
 27 Quis autem malitia te?  
 nosti, quae sequuntur: alternis enim uersibus intorquentur inter fratres grauissimae cōtumeliae: ut facile appareat Atrēi filios esse, eius, qui meditatur poenam in fratrem nouam.  
 28 Maior mihi moles, maius miscendum malum,  
 29 Qui illius acerbum cur contundam, & cōprimā. quae igitur haec erunt moles? audi Thyestem ipsum:  
 30 Impius hortatur me frater, ut meos malis miser  
 31 Manderem natos. =

eorum uiscera apponit: quid est enim, quod non progrediatur eodem ira, quod furor? itaque iratos proprie dicimus exisse de potestate, id est de consilio, de ratione, de mente: horum enim potestas in totum animū esse debet. his autem sunt subtrahendi, in quos impetum



T V S C. Q V A E S T.

conantur facere, dum se ipsi colligant ( quid est autem  
se ipsum colligere, nisi dissipatas animi partes rursum in  
suū locum cogere ? ) aut rogandi, orandiq; sunt, ut, si  
quam habent ulciscendi uim, differāt in tempus aliud,  
dum deferuescat ira. deferuere autem certe signifi-  
cat ardorem animi inuita ratione excitatū. ex quo il-  
lud laudatur Archytæ : qui cū uillico factus esset ira-  
tior, quo te modo, inquit, accepiſsem, nisi iratus essem?  
ubi sunt ergo isti, qui iracundiam utilem dicūt ? potest  
utilis esse insania ? at naturalis est. an quidquam esse  
potest secundū naturam, quod sit repugnante ratione ?  
quo modo autem, si naturalis esset ira ; aut alius alio  
magis iracundus esset ; aut finem haberet prius, quā  
esset ulta, ulciscendi libido ; aut quanquam poeniteret,  
quod fecisset per iram ? ut Alexandrum Regem uide-  
mus : qui cum interemisset Clytū familiarem suū,  
uix à se manus abstinuit: tāta uis fuit poenitendi. quis  
bus cognitis, quis est qui dubitet, quin hic quoque motus  
animi sit totus opinabilis, ac uoluntarius ? quis enim du-  
bitarit, quin agrotationes animi, qualis est auaritia, glo-  
rie cupiditas, ex eo, quod magni aestimetur ea res, ex  
qua animus agrotat, oriatur ? unde intelligi debet, per-  
turbationē quoque omnē esse in opinione. Et si fiden-  
tia, id est firma animi cōfissio, scientia quædam est, Et  
opinio grauis, nō temere assentiens : metus quoque est  
diffidētia expectati, et impendētis mali. et si spes est ex-  
pectatio boni mali expectationem esse necesse est metū.  
ut igitur metus, sic reliquæ perturbationes sunt in ma-  
lo. ergo ut constantia scientiæ, sic perturbatio erroris  
est. qui autem natura dicuntur iracundi, aut misericor-  
des,



des, aut inuidi, aut tale quid, ij sunt eiusmodi constituti,  
 quasi mala ualitudine animi, sanabiles tamē, ut Socra-  
 tes dicitur, cum multa in cōuentu uitia collegisset in eū  
 Zopyrus, qui se naturam cuiusque ex forma perspicere  
 profitebatur, derisus est à ceteris, qui illa in Socrate ui-  
 tia nō agnoscerent; ab ipso autē Socrate subleuatus est,  
 cum illa sibi uitia inesse, sed ratione à se deiecta dice-  
 ret. ergo ut optima quisque ualitudine affectus, potest  
 uideri alius, ut natura, ad aliquem morbū procliuior:  
 sic animus alius ad alia uitia propensior. qui autē non  
 natura, sed culpa uitiosi esse dicuntur, eorum uitia cō-  
 stant ex falsis opinionibus rerum bonarum, ac mala-  
 rum, ut sit alius ad alios motus perturbationesq; procli-  
 uior. Inueteratio autem ut in corporibus agrius depel-  
 litur, sic in animis quoque perturbatio: citiusq; repenti-  
 nus oculorum tumor sanatur, quā diuturna lippitu-  
 do depellitur. sed cognita iam causa perturbationum,  
 quæ omnes oriuntur ex iudicijs opinionum, & uolun-  
 tatibus, sit iam huius disputationis modus. scire autem  
 nos oportet, cognitis, quoad possint ab homine cognosci,  
 bonorum & malorum finibus, nihil à philosophia posse  
 aut maius, aut utilius optari, q̄ hæc, quæ à nobis hoc  
 quatruiduo disputata sunt. morte enim contempta, &  
 dolore ad patiendum leuato, adiunximus sedationem  
 ægritudinis: qua nullum homini maius malum est. etsi  
 enim omnis animi perturbatio grauis est, nec multum  
 differt ab amentia: tamen ita ceteros, cum sint in ali-  
 qua perturbatione aut metus, aut lætitiæ, aut cupidita-  
 tis, commotos modo, & perturbatos dicere solemus; at  
 eos, qui se ægritudini dederūt, miseros, afflictos, erum-



TVSC. QVAEST.

nos, calamitosos . itaque non fortuito factū uidetur,  
sed à te ratione propositū, ut separatim de ægritudine,  
& de cæteris perturbationibus disputaremus : in ea est  
enim fons miseriarum, & caput . sed & ægritudinis,  
& reliquorum animi morborum una sanatio est, om-  
nes opinabiles esse, & uoluntarios, eaq; re suscipi, quòd  
ita rectum esse uideatur . hūc errorem, quasi radicem  
omnium malorum , stirpitus philosophia se extrahendā  
pollicetur . demus ergo nos huic excolendos, patiamurq;  
nos sanari: his enim malis insidentibus, nō modo beati,  
sed ne sani quidem esse possumus . aut igitur negemus  
quidquam ratione confici, cum contra nihil sine ratio-  
ne recte fieri possit : aut, cum philosophia ex rationum  
collatione constet, ab ea, si & boni, & beati uolumus  
esse, omnia adiumenta , & auxilia petamus bene, bea-  
teq; uiuendi .



M. TVLLII CICERONIS TVSCV  
LANARVM QVAESTIONVM  
LIB. QVINTVS, VIRTVTVM  
AD BEATE VIVENDVM  
SE IPSA ESSE CON  
TENTAM.

Virtus hic dies Brute finem faciet  
Tusculanarū disputationum: quo  
die est à nobis ea de re, quā tu ex  
omnibus maxime probas, disputa=  
tum: placere enim tibi admodum  
sensi ex eo libro, quem ad me ac=

curatissime scripsisti, et ex multis sermonibus tuis, virtu=  
tem ad beate uiuendū se ipsa esse contentam. quod etsi  
difficile est probatu, propter tam uaria & tam multa  
tormenta fortunæ: tale tamen est, ut elaborandum sit,  
quo facilius probetur: nihil est enim omnium, quæ in  
philosophia tractantur, quod grauius, magnificentiusq;  
dicatur. nā cum ea causa impulerit eos, qui primi se ad  
philosophiæ studium cōtulerunt, ut, omnibus rebus post=  
habitis, totos se in optimo uitæ statu exquirendo colloca=  
rent: profecto spe beate uiuēdi tantam in eo studio cu=  
ram, operamq; posuerunt. quod si ab ijs inuenta, et per=  
fecta uirtus est, & si præsidij ad beate uiuendū in uir=  
tute satis est: quis est, qui non præclare & ab illis posi=  
tam, & à nobis susceptam operam philosophandi arbi=  
tretur? sin autem uirtus subiecta sub uarios, incertosq;  
casus famula fortunæ est, nec tantarum uirium est, ut

ll ij



T V S C . Q V A E S T .

se ipsa tueatur: uereor, ne non tam uirtutis fiducia nitendum nobis ad spem beate uiuendi, quam uota facienda uideatur. equidem eos casus, in quibus me fortuna uehementer exercuit, mecum ipse considerans, huic incipio sententiae diffidere, interdum etiam humani generis imbecillitatem, frugalitatemque; extimescere: uereor enim, ne natura, cum corpora nobis infirma dedisset, ipsaque et morbos insanabiles, et dolores intolerabiles adiunxisset, animos quoque dederit et corporum doloribus congruentes, et separatim suis angoribus et molestiis implicatos. sed in hoc me ipse castigo, quod ex aliorum, et ex nostra fortasse mollitie, non ex ipsa uirtute de uirtutis robore existimo: illa enim, si modo est ulla uirtus, quam dubitationem auunculus tuus Brute sustulit; omnia, quae cadere in hominem possunt, subter se habet; eaque despiciens, casus contemnit humanos; culpaque omni carens, praeter se ipsam nihil censet ad se pertinere. nos autem omnia aduersa tum uerientia metu augentes, tum maerore praesentia, rerum naturam, quam errorem nostrum damnare malumus. sed et huius culpe, et ceterorum uitiorum, peccatorumque; nostrorum omnis a philosophia petenda correctio est. cuius in sinum cum a primis temporibus aetatis nostra uoluntas, studiumque nos contulisset, his grauissimis casibus in eundem portum, ex quo eramus egressi, magna iactati tempestate confugimus. o uirtus philosophia dux, o uirtutis indagatrix, expultrixque uitiorum, quid non modo nos, sed omnino uita hominum sine te esse potuisset? tu urbes peperisti: tu dissipatos homines in societatem uitae conuocaisti: tu eos



inter se primo domicilijs, deinde coniugijs, tum literarum, & uocum communione iunxisti: tu inuentrix legum, tu magistra morum, & disciplina fuisti. ad te confugimus: à te opem petimus: tibi nos, ut antea magna ex parte, sic nunc penitus, totosq; tradimus. est autem unus dies bene, & ex praeceptis tuis actus, peccanti immortalitati anteponendus. cuius igitur potius opibus utamur, quam tuis? quæ & uitæ tranquillitatem largita nobis es, & terrorem mortis sustulisti. at philosophia quidem, tantum abest, ut perinde, ac de hominū est uita merita, laudetur, ut à multis etiā uituperetur. uituperare quisquam uitæ parentem, & hoc parricidio se inquinare audet? & tam impie ingratus esse, ut eam accuset, quam ueteri deberet, etiam si minus percipere potuisset. sed, ut opinor, hic error, & hæc indoctorum animis offusa caligo est, quod tam longe retro respicere non possunt, nec eos, à quibus uita hominum instructa primo sit, fuisse philosophos arbitrantur. quam rem antiquissimam cum uideamus, nomen tamen esse confitemur recens. nam sapientiam quidem ipsam quis negare potest non modo re esse antiquam, uerum etiam nomine? quæ diuinarum, humanarumq; rerum, tum initiorum, causarumq; tum cuiusque rei cognitione hoc pulcherrimum nomē apud antiquos assequeretur. itaque & illos septem, qui à Græcis σοφοί, sapientes à nostris & habebantur, & nominabantur, & multis ante seculis Licurgum, cuius temporibus Homerus etiam fuisse ante hanc urbem conditam traditur, etiam heroicis ætatibus Vlyxem, & Nestorem accepimus & fuisse, & habitos esse sapientes. nec uero



T V S C. Q V A E S T.

Atlas sustinere coelum, nec prometheus affixus Cauca-  
so, nec stellatus Cepheus cum uxore, genero, filia tra-  
deretur, nisi coelestium diuina cognitio nomen eorū ad  
errorem fabulae traduxisset. à quibus duēli deinceps om-  
nes, qui in rerum contemplatione studia ponebant, sa-  
pientes & habebantur, & nominabantur: idq; eorum  
nomen usque ad Pythagore manauit aetatem. quem, ut  
scribit auditor Platonis Ponticus Heraclides, uir doctus  
in primis, Phliuntem ferunt uenisse, eumq; cum Leon-  
te principe Phliasiorum doctē, et copiose differuisse quæ-  
dam: cuius ingenium, & eloquentiam cum admiratus  
esset Leon, quæsiuisse ex eo qua maxime arte confide-  
ret: at illum, artem quidem se scire nullam, sed esse  
philosophum: admiratum Lontem nouitatem nominis,  
quæsisse, quinam essent philosophi, & quid inter eos,  
& reliquos interesset: Pythagoram autem respondiisse,  
similem sibi uideri uitam hominum, & mercatum eū,  
qui haberetur maximo ludorum apparatu totius Græ-  
ciae celebritate: nam ut illic alij corporibus exercitatis  
gloriam, & nobilitatem coronæ peterent, alij emendi,  
aut uendendi quæstu, & lucro ducerentur, esset au-  
tem quoddam genus eorum, idq; uel maxime ingenu-  
um, qui nec plausum, nec lucrum quærerent, sed ui-  
sendi causa uenirent, studiosēq; perspicerent, quid age-  
retur, & quo modo; item nos quasi in mercatus qua-  
dam celebritate ex urbe aliqua, sic in hanc uitam ex  
alia uita, & natura profectos, alios gloriæ seruire,  
alios pecuniæ, raros esse quosdam, qui, cæteris omni-  
bus pro nihilo habitis rerum naturam studiose intue-  
rentur. hos se appellare sapientiæ studiosos, id est enim



philosophos : & ut illic liberalissimum esse spectare ,  
nihil sibi acquirentem ; sic in uita longe omnibus studijs  
contemplationem rerum , cognitionemq; prestare . nec  
uero Pythagoras nominis solum inuentor , sed rerum  
etiam ipsarum amplificator fuit . qui cum post hunc  
Phliasium sermonē in Italiam uenisset , exornauit eam  
Græciam . quæ magna dicta est , & priuatim , & pu-  
blice præstantissimis & institutis , & artibus . cuius de  
disciplina aliud tempus fuerit fortasse dicendi . sed ab  
antiqua philosophia usque ad Socratem , qui Archelaū  
Anaxagore discipulum audierat , numeri motusq; tra-  
elabantur , & unde omnia orirentur , quo ue recede-  
rent : studioseq; ab his siderum magnitudines , inter-  
ualla , cursus inquirebantur , & cuncta cœlestia . So-  
crates autem primus philosophiam deuocauit è cœlo ,  
& in urbibus collocauit , & in domos etiam introdu-  
xit , & coegit de uita , & moribus , rebusq; bonis , &  
malis querere . cuius multiplex ratio disputandi , re-  
rumq; uarietas , & ingenij magnitudo . Platonis me-  
moria , & literis consecrata , plura genera effecit dis-  
sentientium philosophorum . è quibus nos id potissimum  
consecrati sumus , quo Socratem usum arbitramur ; ut  
nostram ipsi sententiam tegeremus , errore alios leuare-  
mus , & in omni disputatione , quid esset simillimum  
ueri , quæreremus . quem morem cum Carneades acu-  
tissime , copiosissimeq; tenuisset , fecimus & aliàs sæpe ,  
& nuper in Tusculano , ut ad eam consuetudinem  
disputaremus . & quatridui quidem sermonem su-  
perioribus ad te perscriptum libris misimus : quinto  
autem die , cum eodem in loco confedissemus , sic est



T V S C. Q V A E S T.

propositum, de quo disputaremus. A. Non mihi uidetur ad beate uiuendum satis posse uirtutem. M. At hercule Bruto meo uidetur: cuius ego iudicium, pace tua dixerim, longe antepono tuo. A. Non dubito. nec id nunc agitur, in illum quantum ames: sed hoc, quod mihi dixi uideri, quale sit, de quo à te disputari uolo. M. Nempe negas ad beate uiuendū satis posse uirtutē? A. Prorsus nego. M. Quid? ad recte, honeste, laudabiliter, postremo ad bene uiuendum satis ne est praesidij in uirtute? A. Certe satis. M. Potes igitur, aut qui male uiuat, non eum miserum dicere; aut, quem bene fateare, eum negare beate uiuere? A. Quidni possim? nam etiam in tormentis recte, honeste, laudabiliter, & ob eam rem bene uiui potest, dum modo intelligas quid nunc dicam bene: dico enim, constanter, grauius, sapienter, fortiter. haec etiam in equuleum conijciuntur, quod uita non aspirat beata. M. Quid igitur? sola ne beata uita quæso relinquitur extra hostium, limenq; carceris, cum constantia, grauitas, fortitudo, sapientia, reliquæq; uirtutes rapiantur ad tortorem, nullumq; recusent nec supplicium, nec dolorem? A. Tu, si quid es facturus, noua aliqua conquiras oportet. ista me minime mouent, non solum quia peruulgata sunt sed multo magis, quia, tanquam leuia quædam uina, nihil ualent in aqua, sic Stoicorum ista magis gustata quàm potata delectant. uelut iste chorus uirtutum in equuleum impositus, imagines constituit ante oculos cū amplissima dignitate, ut ad eas cursim perreçtura, nec eas beata uita à se difertas passura uideatur: cum autem animum ab ista pìctura, imaginibusq; uirtutum



ad rem, ueritatemq; traduxeris, hoc nudum reliquatur, possit ne quis beatus esse quādiu torqueatur. quamobrem hoc nunc quæramus. uirtutes autem noli uereri ne expostulent et queratur se à beata uita esse relictas. si enim nulla uirtus prudentia uacat, prudentia ipsa hoc uidet, non omnes bonos esse etiam beatos: multa q; de M. Attilio, Q. Capione, M. Aquilio recordatur: beatamq; uitam, si imaginibus potius uti, quàm rebus ipsis placet, conantem ire in equuleum retinet ipsa prudentia, negatq; ei cum dolore, & cruciatu quidquam esse commune. M. Facile patior te isto modo agere: et si iniquum est præscribere mihi te quemadmodum à me disputari uelis. sed quæro, utrum aliquid actum superioribus diebus, an nihil arbitremur? A. Actum uero, & aliquantum quidem. M. Atqui, si ita est profligata iam hæc, & penè ad exitum adducta quæstio est. A. Quo tandem modo? M. Quia motus turbulenti, iactationesq; animorum incitata, & impetu inconsiderato elata, rationem omnem repellentes, uita beatæ nullam partem relinquunt: quis enim potest mortem aut dolorem metuens, quorum alterum sæpe adest, alterum semper impendit, esse non miser? quid, si idem (quod plerumque fit) paupertatem, ignominiam, infamiam timet, si debilitatem, cecitatem, si denique, quod non singulis hominibus, sed potentibus populis sæpe contingit, seruitutem: potest ea timens esse quisquam beatus? quid, qui non modo ea futura timet, uerum etiam fert, sustinetq; præsentia? adde eodem exilia, luctus, orbitates. qui rebus his fractus ægritudine eliditur, potest tandem esse non miserrimus?



T V S C. Q V A E S T.

quid uero illum, quem libidinibus inflammatum, & furentem uidemus, omnia rabide appetentem cum in-  
explebili cupiditate, quoq; affluentius uoluptates undi-  
que hauriat, eo grauius, ardentiusq; sitientem, non ne  
recte miserrimum dixeris? quid? elatus ille leuitate, in-  
aniq; letitia & exultans, & temere gestiens, non ne ta-  
to miserior, quanto sibi uidetur beatior? ergo, ut hi mi-  
seri, sic contra illi beati, quos nulli metus terrent, nul-  
la ægritudines exedunt, nullæ libidines incitant, nullæ  
fuitiles letitiæ exultantes languidis liquefaciunt uolupta-  
tibus. ut maris igitur tranquillitas intelligitur, nulla ne-  
minima quidem aura fluctus commouente: sic animi  
quietus, & placatus status cernitur, cum perturbatio  
nulla est, qua moueri queat. quod si est, qui uim for-  
tunæ, qui omnia humana, quæcūque accidere possunt,  
tolerabilia ducat, ex quo nec timor eum, nec angor at-  
tingat, idemq; , si nihil concupiscat, nulla efferatur ani-  
mi inani uoluptate: quid est, cur is non beatus sit? &  
si hæc uirtute efficiuntur, quid est, cur uirtus ipsa per  
se non efficiat beatos? A. Atqui alterum dici non potest,  
quin ij, qui nihil metuant, nihil angantur, nihil con-  
cupiscant, nulla impotenti letitia efferantur, beati sint:  
itaque id tibi concedo. alterum autem iam integrum  
non est: superioribus enim disputationibus effectum est,  
uacare omni animi perturbatione sapientem. M. Ni-  
mirum igitur confecta res est: uidetur enim ad exitum  
uenisse quæstio. A. Propemodum id quidem. M. Ve-  
runtamen mathematicorum iste mos est, nō philosopho-  
rum. nam geometræ cū aliquid docere uolunt; si quid  
ad eam rem pertinet eorum, quæ ante docuerunt, id

sum  
cat  
cu  
cor  
ni  
te  
ref  
hor  
uita  
sequ  
tent  
sed  
sum  
ciat  
esse  
enim  
da q  
ulla  
ue  
nam  
legib  
per  
bea  
uid  
mo  
om  
non  
inf  
qui  
no



sumunt pro concesso, & probato; illud modo explicant, de quo ante nihil scriptum est. philosophi quamcunque rem habent in manibus, in eam, quæ cōueniūt, congerunt omnia: etsi alio loco disputata sunt. quod nī ita esset, cur Stoicus, si esset quæsitum satis ne ad beatē uiuendum uirtus posset, multa diceret? cui satis esset respondere, se ante docuisse nihil bonum esse, nisi quod honestum esset: hoc probato, consequens esse, beatam uitam uirtute esse contentam: & quo modo hoc sit cōsequens illi, sic illud huic: ut, si beata uita uirtute cōtenta sit, nisi honestum quod sit, nihil aliud sit bonum. sed tamen non agunt sic. nam & de honesto, & de summo bono separatim libri sunt: & cum ex eo efficiatur, satis magnam in uirtute ad beatē uiuendum esse uim; nihilo minus hoc agunt separatim: proprijs enim, & suis argumentis, & admonitionibus tractanda quæque res est, tanta præsertim: caue enim putes ullam in philosophia uocem emissam clariorem, ullum uel esse philosophiæ promissum uberius, aut maius. nam quid proficitur dī boni? perfecturam se, quī legibus suis paruisset, ut esset contra fortunam semper armatus, ut omnia præsidia haberet in se bene beatēq; uiuendi, ut esset semper denique beatus. sed uidero, quid efficiat. tantisper hoc ipsum magni astimmo, quod pollicetur. nam Xerxes quidem refertur omnibus præmijs, donisq; fortunæ, non equitatu, non pedestribus copijs, non nauium multitudine, non infinito pondere auri contentus, præmium proposuit, qui inuenisset nouam uoluptatem. qua ipse inuenta, non fuit contentus: neque enim unquam finem inue-



T V S C. Q V A E S T.

niet libido . nos uellem premio elicere possemus, qui no-  
bis aliquid attulisset, quo hoc firmitus crederemus . A.  
Vellem id quidem : sed habeo paululum , quod requi-  
ram : ego enim assentior, eorum, quæ posuisti , alteri  
consequens esse, ut, quemadmodum, si quod honestum  
sit, id solum sit bonum, sequatur beatam uitam uirtu-  
te confici ; sic, si uita beata in uirtute sit, nihil esse nisi  
uirtutem bonum . sed Brutus tuus auctore, & Aristot-  
ne, & Antiocho non sentit hoc : putat enim, etiam si  
sit bonum aliquod præter uirtutem . M. Quid igitur?  
contra Brutum ne me dicturū putas ? A. Tu uero, ut  
uidetur : nam præfinire non est meum . M. Quid cui-  
que igitur consentaneum sit, alio loco . nam ista mihi  
& cum Antiocho sæpe, & cum Aristote nuper, cum  
Athenis imperator apud eū diuersarer , dissensio fuit:  
mihi enim non uidebatur quisquam esse beatus posse ,  
cū in malis esset : in malis autem sapientem esse posse,  
si essent ulla corporis, aut fortunæ mala . dicebant hæc,  
quæ scripsit etiā Antiochus locis pluribus , uirtutem ip-  
sam per se beatam uitam efficere posse , neque tamen  
beatissimam : deinde ex maiore parte plerasque res no-  
minari, etiam si qua pars abesset ; ut uires , ut ualetu-  
dinem, ut diuitias, ut honorem, ut gloriam ; quæ ge-  
nere, non numero cernerentur : item beatam uitam ,  
etiam si ex aliqua parte claudicaret, tamen ex multo  
maiore parte obtinere nomen suum . hæc nunc enu-  
cleare non ita necesse est : quanquam non constantis-  
sime dici mihi uidentur . nam & qui beatus est, nō in-  
telligo quid requirat , ut sit beator ( si est enim quod  
desit, ne beatus quidem est ) & quod ex maiori parte



unamquāque rem appellari spectariq; dicunt, est ubi id isto modo ualeat : cum uero tria genera malorum esse dicant ; qui duorum generum malis omnibus urgeatur , ut omnia aduersa sint in fortuna , omnibus oppressum corpus & confectum doloribus , huic paululū ne ad beatam uitam deesse dicemus , non modo ad beatissimam ? hoc illud est , quod Theophrastus sustinere nō potuit . nam cum statuisset uerbera , tormenta , cruciatu , patrie euerfiones , exilia , orbitates magnam uim habere ad male , misereq; uiuendum ; non est ausus elate , & ample loqui , cū humiliter , demisseq; sentiret . quā bene , nō quæritur : constanter quidem certe . itaq; mihi placere non solet consequentia reprehendere , cum prima concesseris . hic autem , elegantissimus omnium philosophorum , & eruditissimus , non magnopere reprehenditur , cum tria genera dicit bonorum : uexatur autem ab omnibus , primū in eo libro , quem scripsit de uita beata , in quo multa disputat , quamobrem is , qui torqueatur , qui crucietur , beatus esse non possit . in eo etiam putatur dicere in rotam beatam uitam nō ascendere . nusquam id quidem dicit omnino , sed , quæ dicit , idem ualent . possum igitur , cui concesserim in malis esse dolores corporis , in malis fortunæ naufragia , huic succensere dicenti , non omnes bonos esse beatos , cum in omnes bonos ea , quæ ille in malis numerat , cadere possint ? uexatur idem Theophrastus & libris , & scholis omnium philosophorum , quod in Callisthene suo laudari illam sententiam ,

- » Vitam regit fortuna , non sapientia .  
negant ab ullo philosopho quidquam dictū esse languis-



T V S C. Q V A E S T.

dus. recte id quidem: sed nihil intelligo dici potuisse cōstantius. si enim tot sunt in corpore bona, tot extra corpus in casu, atque fortuna: nō ne consentaneū est, plus fortunam, quā domina rerum sit & externarum, & ad corpus pertinentium, quā cōsiliū ualere? an malumus Epicurum imitari? qui multa praeclare saepe dicit: quā enim sibi constanter, cōuenienterq; dicat, nō laborat. laudat tenuem uictum. philosophi id quidem, sed si Socrates, aut Antisthenes diceret, nō is, qui finem bonorum uoluptatem esse dixerit. negat quenquam iucunde posse uiuere, nisi idem honeste, sapienter, iusteq; uiuat. nihil grauius, nihil philosophia dignius, nisi idem hoc ipsum, honeste, sapienter, iuste, ad uoluptatem referret. quid melius, quā fortunam exiguam interuenire sapienti? sed hoc is ne dicit, qui, cum dolorem non modo maximum malum, sed solum malum etiam dixerit, toto corpore opprimi possit doloribus acerrimis, tum cum maxime contra fortunam gloriatur? quod idem melioribus etiam uerbis Metrodorus. Occupaui, inquit, te fortuna, atque cepi, omnesq; adiutus tuos interclusi, ut ad me aspirare non posses. praeclare, si Aristoteli, aut si Stoicus Zeno diceret, qui, nisi quod turpe esset, nihil malum duceret. tu uero Metrodore, qui omne bonum in uisceribus, medullisq; condideris, & definieris, summum bonum firma corporis affectione, explorataq; spe contineri; fortunae adiutus interclusisti? quo modo? isto enim bono iam exposcari potes. atqui his capiuntur imperiti: & propter huiusmodi sententias istorum hominum est multitudo. acute disputantis illud est, non quid quisque dicat, sed



quid cuique dicendum sit, uidere . uelut in ea ipsa sententia , quam in hac disputatione suscepimus , omnes bonos semper beatos uolumus esse . quos dicam bonos , perspicuum est : omnibus enim uirtutibus instructos, et ornatos , tum sapientes , tum uiros bonos dicimus . uideamus, qui dicendi sint beati . equidem hos existimo , qui sint in bonis, nullo adiuncto malo. nec ulla alia huic uerbo, cum beatum dicimus, subiecta notio est, nisi, secretis malis omnibus, cumulata bonorum complexio . hanc assequi uirtus, si quidquam prater ipsam boni est , non potest : aderit enim malorum , si mala illa dicimus , turba quædam , paupertas, ignobilitas , humilitas , solitudo , amissio suorum , graues dolores corporis, perdita ualetudo , debilitas , cæcitas , interitus patriæ , exilium, seruitus. denique in his tot, et tantis, atque etiam quæ plura possunt accidere , potest esse sapiens ; nam hæc casus importat, qui in sapientem potest incurrere : at si ea mala sunt , quis potest præstare . sapientem semper beatum fore , cum uel in omnibus his uno tempore esse possit ? non igitur facile cōcedo neque Bruto meo, neque cōmunibus magistris, neque ueteribus illis, Aristoteli, Speusippo, Xenocrati, Polemoni, ut, cum ea, quæ supra enumerauimus, in malis numerent, ydem dicant semper beatum esse sapientem . quos si titulus hic deletat insignis, & pulcher, Pythagora, Socrate, & Platone dignissimus , inducant animum, illa, quorū splendore capiuntur , uires , ualitudinem, pulchritudinem, diuitias , honores , opes contemnere , eaque , quæ his contraria sint pro nihilo ducere . tum poterunt clarissima uoce profiteri, se neq; fortunæ impetu , nec mul-



T V S C . Q V A E S T .

tudinis opinione, nec dolore, neque paupertate ter-  
 rerī, omniaq; sibi in sese esse posita, neque esse quid-  
 quam extra suam potestatem, quod dicant in bonis.  
 neque hunc & hæc loqui, quæ sunt magni cuiusdam,  
 & alii viri, & eadem, quæ vulgus, in malis, & bo-  
 nis numerare, concedi ullo modo potest. quæ gloria  
 commotus Epicurus exoritur. cui etiam, si diis placet,  
 uidetur semper sapiens beatus. hic dignitate huius sen-  
 tentiæ capitur: sed nunquam id diceret, si ipse se audi-  
 ret: quid est enim, quod minus conveniat, quàm ut  
 is, qui uel summum, uel solum malum dolorem esse  
 dicat, idem censeat, quàm hoc suauē est, tum, cum do-  
 lore crucietur, dicturum esse sapientem? non igitur ex  
 singulis uocibus philosophi spectandi sunt, sed ex per-  
 petuitate, atque constantia. A. Adducis me, ut tibi  
 assentiar. sed tua quoque uide ne desideretur cōstātia.  
 M. Quonam modo? A. Quid legi tuum nuper quar-  
 tum de finibus. in eo mihi uidebare, contra Catonem  
 differens, hoc uelle ostendere, quod mihi quidem pro-  
 batur, inter Zenonem, & Peripateticos nihil præter  
 uerborum nouitatem interesse. quod si ita est, quid est  
 causæ, quin, si Zenonis rationi consentaneum sit sa-  
 tis magnam uim in uirtute esse ad beate uiuendum,  
 liceat idem Peripateticis dicere? rem enim opinor spe-  
 ctari oportere, non uerba. M. Tu quidem tabellis ob-  
 signatis agis mecum, & testificaris quid dixerim ali-  
 quando, aut scripserim. cum alijs isto modo, qui le-  
 gibus impositis disputant. nos in diem uiuimus: quod-  
 cunque nostros animos probabilitate percussit, id dici-  
 mus: itaque soli sumus liberi. ueruntamen, quoniam  
 de constantia



de constantia paulo ante diximus, non ego hoc loco id  
querendum puto, uerum ne sit quod Zenoni placue-  
rit, quodq; eius auditori Aristoni, bonum esse solum  
quod honestum esset, sed, si ita esset, tum ut hoc totum  
beate uiuere in una uirtute poneret. quare demus hoc  
sanè Bruto, ut sit beatus semper sapiens. quàm sibi  
conueniat, ipse uiderit. gloria quidem huius sententiæ  
quis est illo uiro dignior? nos tamen teneamus, ut sit  
idem beatissimus: etsi Zeno Citæus, aduena quidam,  
& ignobilis, uerborum opifex, insinuasse se in antiquā  
philosophiam uidetur. huius sententiæ grauitas à Pla-  
tonis auctoritate repetatur: apud quem sæpe hæc ora-  
tio usurpata est, ut nihil præter uirtutem diceretur bo-  
num. uelut in Gorgia Socrates, cum esset ex eo quæsi-  
tum, Archelaum Perdicæ filium, qui tum fortunatissi-  
mus haberetur, non ne beatum putaret? Haud scio, in-  
quit: nunquam enim cum eo locutus sum. an tu aliter  
id scire non potes? nullo modo. tu igitur ne de Persæ-  
rum quidem Rege magno potes dicere, beatus ne sit? an  
ego possum, cum ignorem, quàm sit doctus quàm uir  
bonus? quid? tu in eo sitam uitam beatam putas? ita  
prorsus existimo, bonos beatos, improbos miseros. miser  
ergo Archelaus? certe, si iniustus. Videtur ne omnē  
hic beatam uitā in una uirtute ponere? quid uero in  
epitaphio? quo modo idem? Nā cui uiro, inquit, ex se  
ipso apta sunt omnia, quæ ad beate uiuendum ferunt,  
nec suspensa aliorum aut bono casu, aut contrario pen-  
dere ex alterius euentis, & errare coguntur; huic opti-  
me uiuendi ratio comparata est. hic est ille moderatus,  
hic fortis, hic sapiens, hic, & nascentibus, & cadentibus

m m



T V S C. Q V A E S T.

cum reliquis commodis, tum maxime liberis, parebit, & obediet præcepto illi ueteri :

» Neque enim lætabitur unquam, neque mœrebit nimis,

» Quod semper in se ipso omnem spem reponet sui.

Ex hoc igitur Platonis quasi quodam sancto, augustinusq; fonte nostra omnis manabit oratio. unde igitur rectius ordiri possumus, quàm à communi parente natura? quæ, quidquid genuit non modo animal, sed etiã quod ita esset ortum è terra, ut stirpibus suis niteretur, in suo quidq; genere perfectum esse uoluit. itaque et arbores, & uites, & ea, quæ sunt humiliora, neque se tollere à terra altius possunt, alia semper uirent, alia hieme nudata uerno tempore tepefacta frondescent: neque est ullum, quod non ita uigeat interiore quodam motu, & suis quoque seminibus inclusis, ut aut flores, aut fruges fundat, aut baccas, omniaq; in omnibus, quantum in ipsis sit, nulla uì impediante perfecta sint. facilius uero etiam in bestiis, quod his sensus à natura est datus, uis ipsius naturæ perfici potest. nãque alias bestias nantes aquarum incolas esse uoluit, alias uolucres cœlo frui libero, serpentes quasdam, quasdam esse gradientes; earum ipsarum partim solinagas, partim congregatas; immanes alias, quasdam autem cicures, nō nullas abditas, terraq; reclusas. atque earū quæque suum tenens munus, cum in disparis animantis uitam transire non possit, manet in lege naturæ. et ut bestiis aliud aliq; præcipui à natura datū est, quod suū quæque retinet, nec discedit ab eo: sic homini multo quiddam præstantius. etsi præstantia debent ea dici, quæ habent aliquam comparationem. humanus autem animus decerptus ex



mente diuina, cū alio nullo, nisi cum ipso deo, si hoc fas est dictu, comparari potest. hic igitur, si est excultus, et si eius acies ita curata est, ut ne cæcetur erroribus; sit perfecta mens, id est absoluta ratio; quæ est idem, quod uirtus. & si omne beatum est, cui nihil deest, & quod in suo genere expletum, atque cumulatū est, idq; uirtutis est proprium: certe omnes uirtutis compotes beati sunt. et hoc quidem mihi cum Bruto conuenit, item cū Aristotele, Xenocrate, Speusippo, Polemone. sed mihi uidentur etiā beatissimi: quid enim deest ad beate uiuendum ei, qui confidit suis bonis? aut, qui diffidit, beatus esse qui potest? at diffidat necesse est, qui bona diuidit tripertito. qui. n. poterit aut corporis firmitate, aut fortunæ stabilitate confidere? atqui, nisi stabili, et fixo permanente bono, beatus esse nemo potest. quid igitur eius modi istorum est? ut mihi illud Laconis dictum in hos cadere uideatur: qui glorianti cuidam mercatori, quod multas naues in omnem oram maritimam dimisisset, nō sanè optabilis ista quidem est, inquit, rudētibz apta fortuna. an dubium est, quin nihil sit habendum in eo genere, quod uita beata complectitur, si id possit amitti? nihil enim inueterascere, nihil extingui, nihil cadere debet eorum, in quibus uita beata consistit: nam qui timebit ne quid ex his deperdat, beatus esse non poterit: uolumus enim eum, qui beatus sit, tutum esse, inexpugnabilem, septum, atque munitum, non ut paruo metu præditus sit, sed ut nullo. ut enim innocens is dicitur, non qui leuiter nocet, sed qui nihil nocet: sic sine metu is habendus est, non qui parua metuit, sed qui omnino metu uacat: quæ est enim alia fortitudo, nisi

m m ij



TVSC. QVAEST.

animi affectio cum in adeundo periculo, & in labore,  
ac dolore patiens, tum procul ab omni metu? atque hæc  
certe non ita se haberent, nisi omne bonū in una hone-  
state consisteret. qui autem illam maxime optatam, &  
expetitam securitatem (securitatem autem nunc appel-  
lo uacuitatem ægritudinis, in qua uita beata posita est)  
habere quisquam potest, cui aut adsit, aut adesse possit  
multitudo malorum? qui autem poterit esse celsus, &  
erectus, & ea, quæ homini accidere possunt, omnia par-  
ua ducens, qualem sapientem esse uolumus, nisi omnia  
sibi in se posita esse censebit? an Lacedæmonij Philippo  
minitanti per literas se omnia, quæ conarentur, prohi-  
biturum, quæsiuerunt num se esset etiam mori prohibi-  
turus? uir is, quem quærimus, non multo facilius tali  
animo reperietur, quàm ciuitas uniuersa? quid ad hæc  
fortitudinem, de qua loquimur, temperantia adiuncta,  
quæ sit moderatrix omnium commotionum? quid po-  
test ad beate uiuendum deesse ei, quem fortitudo ab  
ægritudine, & à metu uindictet, temperantia tum à li-  
bidine auocet, tum insolenti alacritate gestire non si-  
nat? hæc efficere uirtutem ostenderem, nisi superioris  
bus diebus essent explicata. atqui cum perturbationes  
animi miseram, sedationes autem uitam efficiant bea-  
tam; duplexq; ratio perturbationis sit, quodd ægritudo,  
& metus in malis opinatis, in bonorum autē errore le-  
titia gestiens, libidoq; uersentur; cum hæc omnia cum  
consilio, & ratione pugnent: his tu tam grauib; conci-  
tationibus, tamq; ipsis inter se dissentientibus, atq; distra-  
ctis, quem uacuum, solutum, liberum uideris, hūc dubita-  
bis beatum dicere? atqui sapiens semper ita affectus est:

sem  
ma  
et  
su  
lau  
tur,  
quid  
nest  
ri be  
quid  
quid  
integ  
et  
glor  
ram  
entm  
qui  
mus  
bus  
solu  
diffi  
quo  
qui  
aut  
ro  
go  
da  
qu  
nu  
bis



semper igitur sapiens beatus est. atque etiam omne bonum letabile est: quod autem letabile, id prædicandum, & præ se ferendum: quod tale autem, id etiam gloriosum: si uero gloriosum, certe laudabile: quod autem laudabile, profecto etiam honestum: quod bonum igitur, id honestum. at quæ isti bona numerant, ne ipsi quidem honesta dicunt. solum igitur bonum, quod honestum. ex quo efficitur, honestate una uitam contineri beatam. non sunt igitur ea bona dicenda, nec habenda, quibus abundantem licet esse miserrimum. an dubitas, quin præstans ualitudine, uiribus, forma acerrimis, integerrimisq; sensibus, adde etiam si libet pernicitatem, & uelocitatem, da diuitias, honores, imperia, opes, gloriam: si fuerit is, qui hæc habet, iniustus, intemperans, timidus, hebeti ingenio, atque nullo; dubitabis ne eum miserrimum dicere? qualia igitur ista bona sunt, quæ qui habeat, miserrimus esse possit? uideamus, ne, ut aceruus ex sui generis granis, sic beata uita ex sui similibus partibus effici debeat. quod si ita est, ex bonis, quæ sola honesta sunt, efficiendum est beatum. ea mixta ex dissimilibus si erunt, honestum ex his effici nihil poterit. quo detracto, quid poterit beatum intelligi? etenim quidquid est quod bonum sit, id expetendum est: quod autem expetendum, id certe approbandum: quod uero approbaris, id gratum acceptumq; habendum: ergo etiam dignitas ei tribuenda est. quod si ita est, laudabile sit necesse est. bonum igitur omne laudabile. ex quo efficitur, ut, quod sit honestum, id sit solum bonum. quod ni ita tenebimus, multa erunt, quæ nobis bona dicenda sint. omitto diuitias: quas, cum qui-

mm iij



T V S C. Q V A E S T.

uis, quamuis indignus, habere possit, in bonis non numero: quod enim est bonum, id non quivis habere potest. omitto nobilitatem, famamque; popularem, stultorum, improborumque; consensu excitatam. hæc, quæ sunt minima, tamen bona dicantur necesse est, cædidiuli dentes, uenusti oculi, color suavis, & ea, quæ Euryclia laudat Vlyxi pedes abluens, lenitudo orationis, mollitudo corporis. ea si bona dicemus, quid erit in philosophi gravitate, quam in vulgi opinione, stultorumque; turba, quod dicatur aut gravius, aut grandius? at enim eadem Stoici præcipua, uel producta dicunt, quæ bona isti dicunt illi quidem: sed his vitam beatam compleri negant: hi autem sine ijs esse nullam putant: aut, si sit beata, beatissimam certe negant. nos autem uolumus beatissimam: idque nobis Socratica illa conclusione confirmatur: sic enim princeps ille philosophiæ differebat; qualis cuiusque animi affectus esset, talem esse hominem; qualis autem ipse homo esset, talem esse orationem; orationi autem facta similia, factis vitam. affectus autem animi in bono uiro laudabilis: & uita igitur laudabilis boni uiri honesta ergo, quoniam laudabilis. ex quibus, bonorum beatam vitam esse, concluditur. etenim, proindeorum atque hominum fidem, parum ne cognitum est superioribus nostris disputationibus, an delectationis & otij consumendi causa locuti sumus, sapientem ab omni concitatione animi, quam perturbationem uoco, semper uacare? semper in animo eius esse placidissimam pacem? uir igitur temperatus, constans, sine metu, sine aegritudine, sine alacritate ulla, sine libidine, non ut beatus? at semper sapiens talis: semper igitur beatus:



iam uero qui potest uir bonus non ad id, quod laudabile sit, omnia referre, quæ agit, quæq; sentit? refert autem omnia ad beate uiuendum: beata igitur uita laudabilis. nec quidquam sine uirtute laudabile: beata igitur uita uirtute conficitur. atque hoc sic etiam concluditur. nec in misera uita quidquam est prædicabile, aut gloriandum, nec in ea, quæ nec misera sit, nec beata. Et est in aliqua uita prædicabile aliquid, & gloriandum, ac præ se ferendum: ut Epaminondas,

» Consilijs nostris laus est attonsa Laconum:  
ut Africanus,

» A sole exoriente, supra Meotij paludes,

» Nemo est, qui factis me æquiparare queat.

quod si beata uita glorianda, & prædicanda, & præ se ferenda est: nihil est enim aliud, quod prædicandum, et præ se ferendum sit. quibus positis, intelligis quid sequatur. Et quidem nisi ea uita beata est, quæ est eadem honesta: sit aliud necesse est melius uita beata: quod enim erit honestum, certe fatebuntur esse melius: ita erit beata uita melius aliquid: quo quid potest dici peruersius? quid? cum fateatur satis magnam uim esse in uitijs ad miseram uitam, non ne fatendum est, eandem uim in uirtute esse ad beatam uitam? contrariorum enim contraria sunt consequentia. quo loco quæro, quam uim habeat libra illa Critolai: qui cum in alteram lancem animi bona imponat, in alteram corporis, & externa; tantum propendere illam boni lancem putet, ut terram & maria deprimat. quid igitur aut hunc prohibet, aut etiam Xenocratem illum grauissimum philosophorum, exaggerantem tantopere uirtutem, & extenuantem

mm iij



## TVSC. QVAEST.

cetera, & abijcientem, in uirtute non beatam modo uirtutem, sed etiam beatissimam ponere? quod quidem nisi sit, uirtutum interitus consequetur: nam in quem cadit ægritudo, in eundem metum cadere necesse est: est enim metus futura ægritudinis sollicita expectatio. in quem autem metus, in eundem formido, timiditas, paupor, ignauia. ergo ut idem uincatur interdum necesse est, nec putet ad se præceptum illud Atrei pertinere, Proinde ita parent se in uita, ut uinci nesciant. hic autem uincetur, ut dixi; nec modo uincetur, sed etiam seruiet. at nos uirtutem semper liberam uolumus, semper inuictam. quæ nisi sunt, sublata uirtus est. at qui si in uirtute satis est præsidij ad bene uiuendum, satis est etiam ad beate: satis est enim certe in uirtute, ut fortiter uiuamus: si fortiter, etiam ut magno animo, & quidem ut nulla re unquam terreamur, semperque si mus inuicti. sequitur, ut nihil poeniteat, nihil defit, nihil obstat. ergo omnia profluenter, absolute, prospere: igitur beate. satis autem ad fortiter uiuendum uirtus potest: satis ergo etiam ad beate. etenim ut stultitia, et si adepta est quod concupiuit, nunquam se tamen satis consecutam putat: sic sapientia semper eo contenta est, quod adest, neque eam unquam sui poenitet. simile ne putas C. Lælij unum Consulatum fuisse, & eum quidem cum repulsa (sed cum sapiens, & bonus uir, qualis ille fuit, suffragijs præteritur, non populus à bono Cōsule potius, quam ille à uano populo repulsam fert?) sed tamen, utrum malles te, si potestas esset, semel, ut Lælium, Consulem, an, ut Cinnam, quater? non dubito, tu quid responsurus sis: itaque uideo, cui commit-



nam. non quemuis hoc idem interrogarem: responderet enim alius fortasse, se non modo quatuor Cōsulatus uni antepone, sed unum diem Cynnæ multorum, & clarorum uirorum totis ætatibus. Lælius si digito quem attigisset, pœnas dedisset: at Cinna collegæ sui Consuli Cn. Octauij præcidi caput iussit, P. Crassi, L. Cæsaris nobilissimorum hominum, quorum uirtus fuerat domi, militiæq; cognita; M. Antonij omnium eloquentissimi, quos ego audierim; C. Cæsaris, in quo mihi uidetur fuisse specimen humanitatis, salis, suauitatis, leporis. beatus ne igitur, qui hos interfecit? mihi contra non solum eo uidetur miser, quod ea fecit; sed etiam quod ita se gessit, ut ea facere ei liceret. et si peccare nemini licet. sed sermonis errore labimur: id enim licere dicimus, quod cui que conceditur. utrum tandem beatior C. Marius, tū, cum Cimbricæ uictoriæ gloriam cum collega Catulo cōmunicauit, penè altero Lælio, (nam hūc illi duco simillimum) an cū ciuili bello uictor iratus necessarijs Catuli deprecantibus non semel respondit, sed sæpe, moriatur? in quo beatior ille, qui huic nefariæ uoci paruīt; quāuis, qui tā scelerate imperauit: nam cum accipere, quā facere præstat iniuriam; tum morti iam ipsi aduentanti paululum procedere obuiam, quod fecit Catulus, quā, quod Marius, talis uiri interitu sex suos obruere Cōsulatus, & contaminare extremum tempus ætatis. duodequadraginta annos tyrannus Syracusanorum fuit Dionysius, cum V. & XX. natus annos dominatum occupasset. qua pulchritudine urbē, quibus autem opibus præditam, seruitute oppressam tenuit ciuitatem? atqui de hoc homine à bonis auctoribus sic scriptū accepimus,



## TVSC. QV AEST.

summam fuisse eius in uictu temperantiam, in rebusq;  
gerendis uirum acrem, & industrium, eundem tamen  
maleficum natura, & iniustum. ex quo omnibus bene  
ueritatem intuentibus uideri necesse est miserrimum: ea  
enim ipsa, quæ concupierat, ne tū quidem, cum om-  
nia se posse censebat, consequebatur. qui cum esset bo-  
nis parentibus, atque honesto loco natus (et si id quidem  
alius alio modo tradit) abundaretq; & æqualium fami-  
liaritatibus, & consuetudine propinquorum, haberet  
etiam more Græciæ quosdam adolescentes amore coniū-  
ctos; credebat eorum nemini; sed ijs, quos ex familijs  
locupletum seruos delegerat, quibus nomen seruitutis ip-  
se detraxerat, & quibusdam conuenis, & feris barba-  
ris corporis custodiam committebat. ita propter iniu-  
stam dominatus cupiditatem in carcerem quodā modo  
ipse se incluserat. quin etiam, ne tonsori collum com-  
mitteret, tondere filias suas docuit. ita sordido, ancil-  
lariq; artificio regie uirgines, ut tonstriculæ, tonde-  
bant barbam, & capillum patris. & tamen ab ijs ip-  
sis, cum iam essent adultæ, ferrum remouit; insituitq;  
ut candentibus inglandium putaminibus barbam sibi,  
& capillum adurerent. cumq; duas uxores haberet, Ari-  
stomachem ciuem suam, Doridem autem Locrēsem; sic  
noctu ad eas uentitabat, ut omnia specularetur, & per-  
scrutaretur ante. & cum fossam latam cubiculari le-  
cto circumdedisset, eiusq; fossæ transitum ponticulo li-  
gneo coniunxisset, eum ipsum, cum fores cubiculi clau-  
serat, detorquebat. idemq; cum in communibus sug-  
gestis consistere non auderet, concionari ex turri alta so-  
lebat. atque is cum pila ludere uellet (studise enim id



facilitabat) tunicamq; poneret, adolescentulo, quem amabat, tradidisse gladium dicitur. hic cum quidam familiaris iocans dixisset, huic quidem certe uitā tuam committis, arrisissetq; adolescens; utrunque iussit interfici; alterum, quia uiam demonstrauisset interimēdi sui; alterum, quia id dictum risu approbauisset. atque eo facto sic doluit, ut nihil grauius tulerit in uita: quem enim uehementer amaret, occiderat. sic distrahuntur in contrarias partes impotentium cupiditates. cum huic obsecutus sis, illi est repugnandum. quanquam hic quidem tyrannus ipse indicauit, quā esset beatus. nam cum quidam ex eius assentatoribus Damocles commemoraret in sermone copias eius, opes, maiestatem dominatus, rerum abundantiam, magnificentiam aedium regiarum, negaretq; unquam beatiorem quēquam fuisse: uis ne igitur, inquit, d Damocle, quoniam hæc te uita delectat, ipse eandem degustare, & fortunam experiri meam? cum se ille cupere dixisset, collocari iussit hominem in aureo lecto, strato pulcherrimo, textili stragulo, magnificis operibus picto, abacisq; complures ornauit argento, auroq; celato. tum ad mensam eximia forma pueros delectos iussit consistere, eosq; ad nutum illius intuentes diligenter ministrare. aderant unguenta, coronæ: incendebantur odores: mensæ exquisitissimis epulis extruebantur. fortunatus sibi Damocles uidebatur. in hoc medio apparatus fulgentem gladium è lacunari seta equina appensum demitti iussit, ut impenderet illius beati cernicibus. itaque nec pulchros illos administratores aspicebat, nec plenum artis argentum: nec manum por-



T V S C. Q V A E S T.

rigebat in mensam : iam ipsæ defluebant coronæ : des-  
 nique exorauit tyrannum , ut abire liceret, quòd iam  
 beatus nollet esse. satis ne uidetur declarasse Dionysius  
 nihil esse ei beatum , cui semper aliquis terror impen-  
 deat ? atque ei ne integrum quidem erat , ut ad iusti-  
 tiam remigraret, ciuibusq; libertatem et iura redderet:  
 ijs enim se adolescens improvida ætate irretierat erra-  
 tis, eaq; cõmiserat, ut saluus esse non posset, si sanus es-  
 se coepisset. quantopere uero amicitias desideraret, qua-  
 rum infidelitatem extimescebat, declarauit in Pythago-  
 reis duobus illis : quorum cum alterum uadem mortis  
 accepisset, alter, ut uadem suum liberaret, præsto fuis-  
 set ad horam mortis destinatam ; utinam ego, inquit,  
 tertius uobis amicus ascriberer . quàm huic erat mise-  
 rum carere consuetudine amicorum , societate uictus ,  
 sermone omnino familiari ? homini præsertim docto &  
 puero , & artibus ingenuis erudito . musicorum uero  
 perstudiosum accepimus, poetam etiam tragicū : quàm  
 bonum , nihil ad rem : in hoc enim genere nescio quo  
 pacto magis, q̃ in alijs, suum cuique pulchrum est. ad-  
 huc neminem cognoui poetā (& mihi fuit cum Aquil-  
 nio amicitia) qui sibi non optimus uideretur . sic se res  
 habet, te tua, me delectant mea . sed ut ad Dionysium  
 redeamus: omni cultu, & uictu humano carebat uiue-  
 bat cū fugitiuis, cum facinorosis, cū barbaris: neminem,  
 qui aut libertate dignus esset, aut uellet omnino liber es-  
 se , sibi amicū arbitrabatur. non ergo iam cū huius ui-  
 ta, qua tetrius, miserius, detestabilius excogitare nihil pos-  
 sum, Platonis, aut Archytæ uitam comparabo, doctorū  
 hominū, & planè sapientiū. ex eadem urbe humilē ho-



nunculum à puluere, & radio excitabo, qui multis an-  
 nis post fuit, Archimedem . cuius ego Quæstor ignora-  
 tum ab Syracusanis, cum esse omnino negarent, septu-  
 undique, & uestitum uepribus, & dumetis indagauit  
 sepulcrum : tenebam enim quosdam senariolos, quos in  
 eius monumento esse inscriptos acceperam; qui declara-  
 bant in summo sepulcro sphaeram esse positam cum cy-  
 lindro . ego autem cum omnia collustrarem oculis (est  
 enim ad portas Agragianas magna frequentia sepul-  
 crorum) animaduerti columellam non multum è du-  
 mis eminentem : in qua inerat sphaera figura, & cylin-  
 dri . atque ego statim Syracusanis ( erant autem prin-  
 cipes mecum ) dixi, me illud ipsum arbitrari esse, quod  
 quærerem . immissi cum falcibus multi purgarunt, &  
 aperuerunt locum . quod cum patefactus esset aditus, ad  
 aduersam basim accessimus . apparebat epigramma exe-  
 sis posterioribus partibus uersiculorum, dimidiatis fe-  
 rè . ita nobilissima Græciæ ciuitas, quondam uero etiā  
 doctissima, sui ciuis unius acutissimi monumentū igno-  
 rasset, nisi ab homine Arpinate didicisset . sed redeat  
 unde aberrauit oratio . quis est enim omnium, qui mo-  
 do cum musis, id est cum humanitate, & cum doctri-  
 na habeat aliquod commercium, qui se non hunc ma-  
 thematicum malit, quàm illum tyrannum ? si uitæ mo-  
 dum, actionemq; quærimus : alterius mens rationibus  
 agitandis, exquirendisq; alebatur, cum oblectatione so-  
 lertiæ ; qui est unus suauissimus pastus animorum : al-  
 terius cade, & iniurijs, cum & diurno & no-  
 cturno metu . age confer Democritum, Pythagoram,  
 Anaxagoram : quæ regna, quas opes studijs eorum, &



## T V S C. Q V A E S T.

delectationibus antepones? etenim quæ pars optima est in homine, in ea situm esse necesse est illud quod quæris omnium optimum. quid est autem in homine, sagaci, ac bona mente melius? eius bono fruendum est igitur, si beati esse uolumus: bonum autem mentis est uirtus: ergo hac beatam uitam contineri necesse est. hinc omnia, quæ pulchra, honesta, præclara sunt, ut supra dixi, sed dicendum illud idem paulo uberius uidetur, plena gaudiorum sunt. ex perpetuis autem plenisque gaudijs cum perspicuum sit uitam beatam existere, sequitur ut ea existat ex honestate. sed, ne uerbis solum attingamus ea, quæ uolumus ostendere, proponenda quædam quasi mouentia sunt, quæ nos magis ad cognitionem, intelligentiamque conuertant. sumatur enim nobis quidam præstans uir optimis artibus, isque animo parumper, et cogitatione fingatur. primum ingenio eximio sit, necesse est: tardis enim mentibus uirtus non facile comitatur. deinde ad inuestigandum ueritatem studio incitato. ex quo triplex ille animi foetus existit; unus in cognitione rerum positus, et in explicatione naturæ; alter in descriptione expetendarum, fugiendarumue rerum; tertius in iudicando, quid cuique rei sit consequens, quid repugnans: in quo inest omnis tui subtilitas dissendi, tum ueritas iudicandi. quo tandem igitur gaudio affici necesse est sapientis animum cum his habitantem, pernoctantemque curis? et cum totius mundi motus conuersionesque perspexerit, sideraque uiderit innumera, uabilia coelo inherencia cum eius ipsius motu congruere certis infixis sedibus? septem alia suos quaque tenere cursus, multum inter se aut altitudine, aut humilitate dis-



stantia, quorum uagi motus rata tamen, & certa sui  
cursus spatia definiant: horum nimirum aspectus impu-  
lit illos ueteres, & admonuit, ut plura quærerent. in-  
de est indagatio nata initiorum, & tanquam seminū,  
unde essent omnia orta, generata, concreta, quāq; cu-  
iusque generis uel inanimi, uel animati, uel muti, uel  
loquentis origo, quæ uita, quis interitus, quāq; ex alio  
in aliud uicissitudo, atque mutatio, unde terra, & qui-  
bus librata ponderibus; quibus cauernis maria susti-  
neantur; in qua omnia delata gravitate medium mū-  
di locum semper expetant; qui est idem infimus in ro-  
tundo. hæc tractanti animo, & noctes & dies cogitā-  
ti, existit illa d deo Delphis præcepta cognitio, ut ipsa  
se mens uitæ exutam, cognoscat, coniunctamq; cum  
diuina mente se sentiat, ex quo insatiabili gaudio com-  
pleatur: ipsa enim cogitatio de ui, & natura deorum,  
studium incendit illius æternitatis imitandæ: neque se  
in breuitate uitæ collocatam putat, cum rerum causas  
alias ex alijs aptas, & necessitate nexas uidet. quibus  
ab æterno tempore fluentibus in æternum, ratio ta-  
men, mensq; moderatur. hæc ille intuens, atque suspi-  
ciens, uel potius omnes partes, orasq; circumspectans,  
quanta rursus animi tranquillitate humana, & citæ-  
riora considerat? hinc illa cognitio uirtutis existit: efa-  
lorescunt genera, partesq; uirtutum: inuenitur, quid  
sit quod natura spectet extremū in bonis, quod in ma-  
lis ultimum, quod referenda sint officia, quæ degendæ  
ætatis ratio deligenda. quibus & talibus rebus exquisi-  
tis, hoc uel maxime efficitur, quod hac disputatione  
agitamus, ut uirtus ad beate uiuendum sit se ipsa con-



T V S C . Q V A E S T .

tenta . sequitur tertia , quæ per omnes partes sapientiæ manat , & funditur , quæ rem diffinit , genera disper- tit , sequentia adiungit , perfectæ concludit , uera & falsa diiudicat , differendi ratio , & scientia . ex qua cum summa utilitas existit ad res ponderandas , tū ma- xime ingenua delectatio , & digna sapientia . sed hæc otij . transeat idem iste sapiens ad Remp . tuendū : quid eo possit esse præstantius , cum contineri prudentia uti- litatem ciuium cernat , iustitia nihil in suam domum inde deriuat , reliquis utatur tot tamq; uarijs uirtuti- bus ? adiunge fructum amicitiarum : in quo à doctis positum est cum consilium omnis uitæ , consentiens , & penè conspirans , tum summa iucunditas è quotidiano cultu , atque uictu . quid hæc tandem uita desiderat , quo sit beator ? cui rei refertæ tot , tantisq; gaudijs , fortu- na ipsa cedat necesse est . quod si gaudere talibus bonis animi , id est uirtutibus , beatum est , omnesq; sapien- tes ijs gaudijs perfruuntur : omnes eos confiteri beatos esse necesse est . A . Etiam ne in cruciatu , atque tormē- tis ? M . An tu me in uiola putas , aut in rosa dicere ? an Epicuro , qui tantummodo induit personam philoso- phi , & sibi ipse hoc nomen inscripsit , dicere licebit , quod quidem , ut habet se res , me tamen plaudente di- cit , nullum sapienti esse tempus , etsi uratur , torquea- tur , secetur , quin possit exclamare , quàm pro nihilo puto ? cum præsertim omne malum dolore definiat , bo- num uoluptate , hæc nostra honesta , turpia irrideat , dicatq; nos in uocibus occupatos inanes sonos fundere , neque quidquam ad nos pertinere , nisi quod aut leue , aut asperum in corpore sentiatur . huic ergo , ut dixi ,

non

non  
bit  
bo  
dicere  
cum  
rem,  
parau  
pitudin  
patien  
una se  
platum  
patiatu  
stro ge  
uideo,  
te uolu  
pienzer  
quidm  
in bon  
me qu  
demie  
uoce  
desce  
laqu  
leo, i  
dum  
do, q  
diui  
ut  
bec  
tim



non multum differenti à iudicio ferarum, obliuisci licebit sui? Et tum fortunam contemnere, cum sit omne & bonum eius, & malum in potestate fortunæ? tum dicere se beatum in summo cruciatu, atque tormentis, cum constituerit non modo summum malum esse dolorem, sed etiam solum? nec uero illa sibi remedia comparauit ad tolerandū dolorem, firmitatem animi, turpitudinis uerecundiā, exercitationem, consuetudinemq; patiendi, præcepta fortitudinis, duritiam uirilem: sed una se dicit recordatione, acquiescere præteritarū uoluptatum: ut si quis æstuans, cum uim caloris nō facile patiat, recordari uelit, se aliquando in Arpinati nostro gelidis fluminibus circumfusus fuisse: non enim uideo, quo modo sedare possint mala præsentia præteritæ uoluptates. sed cum is dicat semper beatum esse sapientem, cui dicere hoc, si sibi constare uellet, nō liceret: quidnam faciendum est ijs, qui nihil expetendum, nihil in bonis ducendum, quod honestate careat, existimāt? me quidem auctore etiam Peripaterici, ueteresq; Academici balbutire desinant aliquādo, aperteq; & clara uoce audeāt dicere, beatam uitā in Phalaridis taurum descensuram. sint enim tria genera bonorum, ut iam à laqueis Stoicorum, quibus usum me pluribus, quādam soleo, intelligo, recedamus: sint sanè illa genera bonorū, dum corporis, & externa iacent humi, & tantummodo, quia sumenda sunt, appellentur bona: alia autem diuina illa, longe, lateq; se pandant, cœlumq; cōtingāt, ut ea qui adeptus sit, cur eum beatum modo, & non beatissimum etiam dixerim? dolorem uero sapiens ex timescet? is enim huic maximæ sententiæ repugnat.

n n



T V S C. Q V A E S T.

nam contra mortem nostrā, atque nostrorum, contrāq;  
 ægritudinem, & reliquas animi perturbationes satis  
 esse uidemur superiorum dierum disputationibus ar-  
 mati, & parati. dolor esse uidetur acerrimus uirtuti  
 aduersarius. ita ardentes faces intentat: is fortitudi-  
 nem, magnitudinem animi, patientiam se debellaturū  
 minatur. huic igitur succumbet uirtus? huic beata  
 sapientis, & constantis uiri uita cedit? quā turpe,  
 o dii boni. pueri Spartiatae non ingemiscunt uerberum  
 dolore laniati. adolescentium greges Lacedæmone uidi-  
 mus ipsi incredibili contentione certantes pugnis, cal-  
 cibus, unguibus, morsu, denique ut exanimaretur, prius-  
 quam se uictos faterentur. quæ barbaria India uastior,  
 aut agrestior? in ea tamen gente primum ij, qui sa-  
 pientes habentur, nudi ætatem agunt, & Caucaſi ni-  
 ues, hiemalemq; uim perferunt sine dolore; cumq; ad  
 flammam se applicuerint, sine gemitu adurantur. mu-  
 lieres uero in india, cū est cuiusque earū uir mortuus,  
 in certamen, iudiciūq; ueniunt, quam plurimum il-  
 le dilexerit: plures enim singulis solent esse nuptæ. quæ  
 est uictrix, ea lata proſequentibus suis, unā cum uiro  
 in rogam imponitur: illa uicta, mœsta discedit. nun-  
 quam naturam mos uinceret: est enim ea semper inui-  
 cta. sed nos umbris, delicijs, otio, langore, desidia ani-  
 mum infecimus, opinionibus, maloq; more delinitum  
 molliuimus. Aegyptiorum morem quis ignorat? quo-  
 rum imbutæ mentes prauitatis erroribus, quamuis car-  
 nificinam prius subierint, quā ibim, aut aspidem,  
 aut felem, aut canem, aut crocodilum uiolent: quorum  
 etiam si imprudentes quippiam fecerint, pœnam nul-



lam recusent. de hominibus loquor. quid bestiae? non  
 ne frigus, non famem, non montiuagos, atque siluestres  
 cursus, lustrationesque patiuntur? non ne pro suo partu  
 ita propugnant, ut vulnera excipiant? nullos impetus,  
 nullos ictus reformident? omitto, quae perferant, quaeque  
 patiantur ambitiosi honoris causa; laudis studiosi, glo-  
 ria causa; amore incensi, cupiditatis. plena uita  
 exemplorum est. sed adhibeat oratio modum, & re-  
 deat illuc, unde deflexit. dabit, dabit, inquam, se in  
 tormenta uita beata: nec iustitiam, temperantiam, in-  
 primisque fortitudinem, magnitudinem animi, patien-  
 tiam prosecuta, cum tortoris os uiderit, consistet: uir-  
 tutibusque omnibus sine ullo animi terrore ad cruciatum  
 profectis, resistet extra fores (ut ante dixi) limenque car-  
 ceris: quid enim ea foedius, quid deformius sola relicta,  
 comitatu pulcherrimo segregata? quod tamen fieri nul-  
 lo pacto potest: nec enim uirtutes sine beata uita cohae-  
 rare possunt, nec illa sine uirtutibus. itaque ea tergiuer-  
 sari non sinent, secumque rapiunt ad quemcunque ipse  
 dolorem; cruciatumque ducentur: sapientis est enim  
 proprium, nihil, quod poenitere possit, facere, nihil inuitum;  
 splendide, constanter, grauius, honeste omnia; nihil ita  
 expectare, quasi certo futurum; nihil, cum acciderit,  
 admirari, ut inopinatum, ac nouum accidisse uideatur;  
 omnia ad suum arbitrium referre; suis stare iudicijs.  
 quo quid sit beatius, mihi certe in mentem uenire non  
 potest. Stoicorum quidem facilis conclusio est. qui cum  
 finem bonorum esse senserint, congruere naturae, cumque  
 ea conuenienter uiuere: cum id sit in sapiente situm non  
 officio solum, uerum etiam potestate, sequatur necesse



T V S C. Q V A E S T.

est, ut cuius in potestate summum bonum, in eiusdem  
uita beata sit. ita sit semper uita beata sapientis. Ha-  
bes, quæ fortissime de beata uita dici putem, et, quo mo-  
do nunc est, nisi quid tu melius attuleris, etiā uerissime.  
A. Melius quidem asserere nihil possum: sed à te impe-  
trare libenter uelim, nisi molestū sit, quoniam te nulla  
uincula impediunt ullius certæ disciplinæ, libasq; ex o-  
mnibus quodcūque te maxime specie ueritatis mouet;  
quod paulo ante Peripateticos, ueteremq; Academiam  
hortari uidebare, ut sine retractatione libere dicere au-  
derent, sapientes esse semper beatissimos, id uelim audi-  
re, quemadmodum his putes consentaneū esse id dicere:  
multa enim à te cōtra istam sententiam dicta sunt, &  
Stoicorū ratione cōclusa. M. Utamur igitur libertate:  
qua nobis solis in philosophia licet uti, quorum oratio  
nihil ipsa iudicat, sed habetur in omnes partes, ut ab  
alijs possit ipsa per sese nullius auctoritate adiuncta iu-  
dicari. & quoniam uideris hoc uelle, ut, quacunque  
dissentientium philosophorum sententia de finibus sit,  
tamen uirtus satis habeat ad uitam beatam præsidij;  
quod quidem Carneadem disputare solitū accepimus;  
sed is, ut contra Stoicos, quos studiosissime semper re-  
fellebat, & contra quorum disciplinam ingenium  
eius exarserat: nos illud quidem cum pace agemus.  
si enim Stoici fines bonorum recte posuerunt, confecta  
res est, necesse est semper beatum esse sapientem. sed  
quæramus unamquamque reliquorum sententiam, si  
fieri potest, ut hoc præclarum quasi decretum beatæ  
uitæ possit omnium sententijs, & disciplinis conue-  
nire. sunt autem hæc de finibus, ut opinor, retentæ,



defensæq; sententiæ : primū simplices quatuor ; nihil bonū, nisi honestum, ut Stoici ; nihil bonum, nisi uoluptatem, ut Epicurus ; nihil bonum, nisi uacuitatem doloris, ut Hieronymus ; nihil bonum, nisi naturæ primis bonis aut omnibus, aut maximis frui, ut Carneades cōtra Stoicos differebat. hæc igitur simplicia : illa mixta ; tria genera bonorum, maxima animi, secunda corporis, externa tertia, ut Peripatetici, nec multo ueteres Academici secus. uoluptatem cum honestate Clitomachus, & Callipho copulauit. indolentiam autem honestati Peripateticus Diodorus adiunxit. hæ sunt sententiæ, quæ stabilitatis aliquid habeant. nā Aristonis, Pyrrhonis, Herilli, non nullorumq; aliorum euauerunt. hi quid possint obtinere, uideamus, omissis Stoicis : quorum satis uideor defendisse sententiam. & Peripateticorum quidem explicata causa est : præter Theophrastū, & si qui illū secuti, imbecillius horrent dolorem, & reformidant. reliquis quidē licet facere, quod ferè faciunt, ut grauitatem, dignitatemq; uirtutis exaggeret. quam cū ad cælum extulerint, quod facere eloquentes homines copiose solent ; reliqua ex collatione facile est cōterere. atque contemnere : nec enim licet ijs, qui laudem cū dolore petendam esse dicunt, negare eos esse beatos, qui illam adepti sunt. quanquam enim sint in quibusdam malis, tamen hoc nomen beati longe, & late patet. nā ut quæstiosa mercatura, fructuosa oratio dicitur, non si altera semper omni danno, altera omnis tempestatis calamitate semper uacet, sed si multo maiori ex parte extet in utraque felicitas : sic uita, non solū si undique referta bonis est, sed si multo maiore, &

n n iiij



## TVSC. QVAEST.

grauiore ex parte bona propendent, beata recte dici po-  
 test. sequetur igitur horum ratione uel ad supplicium  
 beata uita uirtutem, cumq; ea descendet in taurum,  
 Aristotele, Xenocrate, Speusippo, Polemone auctoribus,  
 nec eam minimis blandimentis corrupta deferet. ea-  
 dem Calliphontis erit, Diodoriq; sententia. quoru uter-  
 que honestatem sic complectitur, ut omnia, quae sine ea  
 sint, longe, & retro ponenda censeat. reliqui habere se  
 uidentur angustius, enarrant tamen, Epicurus, Hiero-  
 nymus, & si qui sunt, qui disertum illum Carneadem  
 curent defendere: nemo est enim, qui eorum bonorum  
 animum putet esse iudicem, eumq; cōdocefaciat, ut ea,  
 quae bona, mala'ue uideantur possit contemnere. nam  
 quae tibi Epicuri uidetur, eadem erit Hieronymi, &  
 Carneadis causa, & Hercle omnium reliquorum: quis  
 enim parum est contra mortem, aut dolorem paratus?  
 ordiamur ab eo, si placet, quem mollem, quem uolu-  
 ptarium dicimus. quid? is tibi mortem ne uidetur, an  
 dolorem timere? qui eum diem, quo moritur, beatum  
 appellat; maximisq; doloribus affectus, eos ipsos inuen-  
 torum suorum memoria, & recordatione confutat, nec  
 hoc sic agit, ut ex tempore quasi effutire uideatur: de  
 morte enim ita sentit, ut, dissoluto animante, sensum  
 extinctum putet; quod autem sensu careat, nihil ad  
 nos id iudice pertinere. item de dolore certa habet quae  
 sequatur: quorum magnitudinem breuitate consola-  
 tur, longinquitatem leuitate: quid tandem? isti gran-  
 diloqui contra haec duo, quae maxime angunt, melius  
 se habent, quam Epicurus? an ad cetera, quae mala  
 putantur, non & Epicurus, & reliqui philosophi sa-



tis parati uidentur? quis non paupertatem extimescit?  
 neque tamen quisquam philosophorum. hic uero ipse  
 quam paruo est contentus? nemo de tenui uictu plura  
 dixit: etenim quæ res pecuniæ cupiditatem afferunt, ut  
 amor, ut ambitioni, ut quotidianis sumptibus copiæ  
 suppetant; cum procul ab ijs omnibus rebus absit, cur  
 pecuniam magnopere desideret, uel potius curet omni-  
 no? an Scythes Anacharsis potuit pro nihilo pecuniam  
 ducere, nostrates philosophi facere non potuerunt?  
 illius epistola fertur his uerbis. Anacharsis Hanno-  
 ni salutem. Mihi amictus est Scythicum regmen, cal-  
 camentum solorum callum, cubile terra, pulpamen-  
 tum fames: lacte, caseo, carne uescor. quare ut ad-  
 quietum me licet. munera autem ista, quibus es de-  
 lectatus, uel ciuibus tuis, uel dijs immortalibus dona.  
 Omnes ferè philosophi omnium disciplinarum, nisi  
 quos à recta ratione natura uitiosa detorsisset, hoc  
 eodem animo esse potuerunt. Socrates, in pompa  
 cum magna uis auri argentiq; ferretur, quam multa  
 non desidero, inquit. Xenocrates, cum legati ab Ale-  
 xandro quinquaginta ei talenta attulissent, quæ eras  
 pecunia temporibus illis, Athenis præsertim, maxima;  
 adduxit legatos ad coenam in Academiam; ijs appo-  
 suit tantum, quod satis esset, nullo apparatu. cum  
 postridie rogarent eum, cui numerari iuberet, quid?  
 uos hesternæ, inquit, cœnula non intellexistis, me  
 pecunia non egere? quos cum tristiores uidisset,  
 XXX minas accepit, ne aspernari Regis liberalita-  
 tem uideretur. at uero Diogenes liberius, ut Cynicus,  
 Alexandro roganti, ut diceret si quid sibi opus esset, nunc

n n iij



T V S C. Q V A E S T.

quidem paululum, inquit, à sole absis. offecerat uidelicet apricanti. & hic quidem disputare solebat, quanto Regem Persarum uita, fortunaq; superaret: sibi nihil deesse, illi nihil satis unquam fore: se eius uoluptates nō desiderare, quibus nunquam satiari ille posset, suas eū consequi nullo modo posse. uides, credo, ut Epicurus cupiditatum genera diuiserit, nō nimis fortasse subtiliter, utiliter tamen; partim esse naturales, & necessarias; partim naturales, & non necessarias; partim neutrum: necessarias satiari posse penē nihilo: diuitias enim naturæ parabiles esse. secundum autem genus cupiditatum nec ad potiendū difficile censet, nec uero ad carendū. tertias, quod essent planē inanes, neque necessitatē modo, sed ne naturam quidem attingerent, funditus eiiciendas putauit. hoc loco multa ab Epicureis disputantur, hæq; uoluptates sigillatim extenuantur: quarū genera non contemnunt, querunt tamen copiam: nam & obscenas uoluptates, de quibus multa ab illis habetur oratio, faciles, communes, in medio sitas esse dicunt; easq; si natura requirat, non genere, aut loco, aut ordine, sed forma, ætate, figura metiendas putant; ab ijsq; abstinere minime esse difficile; si aut ualetudo, aut officium, aut fama postulet; omninoq; genus hoc uoluptatum optabile esse, si non obsit, prodesse nunquam. totumq; hoc de uoluptate sic ille præcepit, ut uoluptatē ipsam per se, quia uoluptas sit, semper optandam, expectandamq; putet; eademq; ratione dolorem ob id ipsum, quia dolor sit, semper esse fugiendum: itaque hac usurum compensatione sapientem, ut uoluptatem fugiat, si ea maiorem dolorem effectura sit; & dolorem



suscipiet maiorem efficientem uoluptatem, omniaq; iucunda, quanquam sensu corporis iudicentur, ad animum referri tamen. quocirca corpus gaudere tam diu, dum presentem sentiret uoluptatem; animū & presentem percipere pariter cum corpore, & prospicere uenientem, nec prateritam praterfluere sinere: ita perpetuas, & cōtextas uoluptates in sapiente fore semper, cum expectationi speratorum, perceptarum memoria iungeretur. atque ijs similia ad uictum etiam transferuntur, extenuanturq; magnificentia, & sumptus epularum, quod paruo cultu natura contenta sit. etenim quis hoc non uidet, desiderijs ista condiri omnia? Darius in fuga, cum aquam turbidam, & cadaueribus inquinatam bibisset, negauit unquam se bibisse iucundius. nunquam uidelicet sitiens biberat. nec esuriens Ptolemaeus ederat. cui cum peragrati Aegyptum, comitibus non consecutis, cibarius in casa panis datus esset, nihil uisum est illo pane iucundius. Socratem ferunt, cum usque ad uesperum contentius ambulare, quā situmq; esset ex eo, quare id faceret; respondisse, se, quo melius cōnaret, obsonare ambulando famem. quid? uictum Lacedamoniorum in Phiditijs non ne uidemus? ubi cum tyrannus cōnauisset Dionysius, negauit se iure illo nigro, quod cōnæ caput erat, delectatum. tum is, qui illa coxerat, minime mirum, inquit: condimenta enim defuerunt. quæ tandem, inquit ille? labor in uenatu, sudor, cursus ab Eurota, fames, sitis: his enim rebus Lacedamoniorum epulæ condiuntur. atque hoc non ex hominum more solum, sed etiam ex bestijs intelligi potest, quæ, ut quidquid obiectum est, quod modo



## TVSC. QVAEST.

natura non sit alienum, eo contentæ non quærunt amplius. ciuitates quædam uniuersæ, morte doctæ, parsimonia delectantur, ut de Lacedæmonijs paulo ante diximus. Persarum à Xenophonte uictus exponitur: quos negat ad panem adhibere quidquam, præter nasturtium. quanquam, si quædam etiã suauiora natura de sideret, quàm multa ex terra, arboribusq; gignuntur cum copia facili, tum suauitate præstantia? adde siccitatem: quæ consequitur hanc continentiam in uictu. ad de integritatem uoletudinis. confer sudantes, ruetantes, refertos epulis, tanquam opimos boues: tum intelles, qui uoluptatem maxime sequantur, eos minime consequi, iucunditatemq; uictus esse in desiderio, non in sotietate, Timotheum, clarum hominem Athenis, & principem ciuitatis, ferunt, cum cœnauisset apud Platonem, eoq; conuiuio admodum delectatus esset, uidissetq; eum postridie, dixisse, uestre quidem cœnæ non solum in præsentia, sed etiam postero die iucundæ sunt. quid, quodd ne mente quidem recte uti possumus multo cibo, & potione completi? est præclara epistola Platonis ad Dionis propinquos: in qua scriptum est his ferè uerbis. Quod cum uenissem, uita illa beata, quæ ferebatur, plena Italicarum, Siracusanarumq; mensarum, nullo modo mihi placuit, bis in die saturum fieri, nec unquam pernoctare solum, ceteraq; , quæ comitantur huic uitæ, in qua sapiens nemo efficitur unquam, moderatus uero multo minus. Quæ enim natura tam mirabiliter temperari potest? quo modo igitur iucunda uita potest esse, à qua absit prudentia? absit moderatio? ex quo Sardanapali opulentissimi Syriæ Regis er



ror agnoscitur, qui incidi iussit in busto,

» Hæc habeo, quæ edi, quæq; exsaturata libido.

» Hæsit: at illa iacent multa, & præclara relicta.

quid aliud, inquit Aristoteles, in bouis, non in Regis sepulcro inscriberes? hæc habere se mortuum dicit, quæ ne uiuus quidem diutius habebat, quàm fruebatur. cur igitur diuitiæ desiderantur? aut ubi paupertas beatos esse non sinit? signis credo, tabulis, ludis. si quis, est qui his delectetur, nõ ne melius tenues homines fruuntur, quàm illi, qui his abundant? est enim earum omnium rerum nostra in urbe summa in publico copia. quæ qui priuati habent, nec tam multa, & raro uident, cum in sua rura uenerint. quos tamen pungit aliquid, cum, illa unde habebant, recordantur. dies deficiet, si uelim paupertatis causam defendere: aperta enim res est, & quotidie nos ipsa natura admonet, quam paucis, quàm paruís rebus egeat, quàm uilibus. num igitur ignobilitas, aut humilitas, aut etiam popularis offensio sapientem beatum esse prohibebit? uide, ne plus commendatio in uulgo, & hæc, qui expetitur, gloria molestia habeatur, quàm uoluptatis. leuiculus sanè noster Demosthenes, qui illo susurro delectari se dicebat aquam ferentis mulierculæ, ut mos in Græcia est, insusurrantisq; alteri, hic est ille Demosthenes. quid hoc leuius? at quantus orator? sed apud alios loqui uidelicet didicerat, non multum ipse secum. intelligendum est igitur nec gloriæ popularem ipsam per se expetendam, nec ignobilitatem extimiscendam. ueni inquit Athenas Democritus, neque me quisquam ibi agnouit. constantem hominem, et grauitem, qui gloriatur, à gloria se abfuisse. an tibi



## TVSC. QVAEST.

nes, iſq; , qui fidibus utuntur, ſuo, non multitudinis arbitrio cantus numeroſq; moderatur: uir ſapiens, multo arte maiore præditus, non quid ueriffimum ſit, ſed quid uelit uulguſ, exquiret? an quidquã ſtultius, q̃, quos ſingulos ſicut operarios, barbarioſq; cõtemnas, eos aliquid putare eſſe uniuerſoſ? ille uero noſtras ambitiones, leuitateſq; contemnet, honoreſq; populi, etiam ultro delatoſ, repudiabit: noſ autem eoſ neſcimus, antequam pœnitere cœpit, contemnere. eſt apud Heraclitum phyſicum de principe Ephęſiorũ Hermodoro: uniuerſoſ ait Ephęſioſ eſſe morte mulctandoſ, quodd, cum ciuitate expellerent Hermodorum, ita locuti ſunt, nemo de nobis unus excellat, ſed, ſi quiſ extiterit, alio in loco, & apud alio ſit. an hoc non ita ſit omni in populo? non ne omnem exuperantiam uirtutis oderũt? quid? Ariſtides (malo enim Græcorum, quã noſtra proferre) non ne ob eam cauſam expulſuſ eſt patria, quodd præter modum iuſtuſ eſſet? quãtiſ igitur moleſtiſ uacant, qui nihil omnino cũ populo contrahunt? quid eſt enim dulcius otio literato? iſ dico literiſ, quibuſ infinitatem rerum, atque naturæ, & in hoc ipſo mundo cœlum, terras, maria cognoscimus. contempto igitur honore, contempta etiam pecunia, quid relinquitur, quod extimeſcendum ſit? exilium, credo: quod in maximis malis ducitur. id ſi propter alienam, & offenſam populi uoluntatem malũ eſt: quã ſit ea contemnenda, paulo ante dictum eſt. ſin abeſſe à patria miſerum eſt: plenæ miſerorum provinciæ ſunt: ex quibuſ admodum pauci in patriam reuertũtur. at mulctantur boniſ exuleſ. quid tum? parum ne multa de to-

lerand:  
rum na  
rum de  
qua eta  
Xenocr  
Theoph  
Carned  
Poſidoni  
quã dom  
cere pote  
oratio, c  
cõſolari  
ratio eſt  
quũtur  
beate qu  
cri uox  
Patria  
Socrate  
ret, mi  
& ciu  
animo  
tamen  
Epicu  
quodd  
miſe  
ceſſi  
da e  
qui  
ſello  
rini



leranda paupertate dicuntur? iam uero exiliū, si rerum naturam, non ignominia nominis querimus, quātum demum à perpetua peregrinatione differt? in qua etates suas philosophi nobilissimi consumpserunt, Xenocrates, Crantor, Arcefilas, Lacides, Aristoteles, Theophrastus, Zeno, Cleanthes, Chrysippus, Antipater, Carneades, Panætius, Clitomachus, Philo, Antiochus, Posidonius, innumerabiles alij: qui semel egressi, nunquā domū reuertere. at enim non sine ignominia afficere poterit sapientem. de sapiente enim est hac omnis oratio, cui iure id accidere nō possit: nā iure exulante cōsolari nō oportet. postremo ad omnes casus facillima ratio est eorū, qui ad uoluptatem ea referunt, quæ sequuntur in uita, ut, quocunque hæc loco suppedient, ibi beate queant uiuere. itaque ad omnem rationem Teucri uox accommodari potest,

\*) Patria est, ubicunque est bene.

Socrates quidem cum rogaretur, cuiatem se esse diceret, mundanum inquit: totius enim mundi se incolam, & ciuem arbitrabatur. quid T. Albutius? non ne animo æquissimo Athenis exul philosophabatur? cui tamen illud ipsum non accidisset, si in Rep. quiescens, Epicuri legibus paruisset. qui enim beator Epicurus, quoddam in patria uiuebat, quā Metrodorus, quoddam Athenis? ante Plato Xenocratem uincebat, aut Polemo Arcefilā, quo esset beator? quā uero ista ciuitas æstimanda est, ex qua boni sapientesq; pelluntur. Demaratus quidem Tarquini Regis nostri pater, tyrannum Cypsellum quoddam ferre non poterat, fugit Tarquinos Corintho, & ibi suas fortunas constituit, ac liberos pro-



TVSC. QVAEST.

creavit. num stulte anteposuit exilij libertatem domes-  
ticae servituti? Iam vero motus animi, solitudines,  
ægritudinesq; obliuiones leniuntur, traductus animis ad  
uoluptatem. non sine causa igitur Epicurus ausus est  
dicere, semper in pluribus bonis esse sapientem, quia  
semper sit in uoluptatibus. ex quo effici putat ille,  
quod quærimus, ut sapiens semper beatus sit. etiam  
ne, si sensibus carebit oculorum, si aurium? etiam:  
nam ista ipsa contemnit. primum enim, horribilis  
ista cecitas quibus tandem caret uoluptatibus? cum  
quidam etiam disputent cæteras uoluptates in ipsis ha-  
bitare sensibus; quæ autem aspectu percipiantur,  
ea non uersari in oculorum ulla iocunditate; ut ea,  
quæ gustemus, olfaciamus, tractemus, audiamus,  
in ea ipsa, ubi sentimus, parte uersentur: in oculis  
tale nihil sit. animus accipit quæ uidemus. animo  
autem multis modis, uarijsq; delectari licet, etiam si  
non adhibeatur aspectus. loquor autem de docto homi-  
ne, & erudito, cui uiuere est cogitare: sapientis enim  
cogitatio non ferme ad inuestigandum adhibet oculos  
aduocatos: etenim si nox non adimit uitam beatam,  
cur dies nocti similis adimat? nam illud Antipatri Cy-  
renaici est quidem paulo obscœnius, sed non absurda  
sententia est: cuius cæcitatem cum muliercula lamen-  
tarentur, quid agitis, inquit? an uobis nulla uideatur  
uoluptas esse nocturna? Appium quidem ueterem il-  
lum, qui cæcus annos multos fuit, & ex magistrati-  
bus, & ex rebus gestis intelligimus in illo suo casu nec  
priuato, nec publico muneri defuisse. C. autem Drusi  
domum compleri consultoribus solitam accepimus: cū,

quorum  
bebant  
in sena  
deerat.  
literis. E  
mi uixit  
lophica  
saretur  
tur, cui  
in studi  
fieri poss  
bis præci  
berent.  
philosop  
tulisset  
enim u  
quod qu  
cile poss  
critus l  
re non  
honest  
rat; &  
motio  
etiam  
alij se  
mitat  
rare  
fuisse  
gio,  
pug



quorum res esset, sua ipsi non uidebant, cæcum adhi-  
beant ducem. pueris nobis Cn. Aufidius prætorius &  
in senatu sententiam dicebat, nec amicis deliberantibus  
deerat, & Græcam scribebat historiam, & uidebat in  
literis. Diodorus Stoicus cæcus multos annos nostræ do-  
mi uixit. is uero, quod credibile uix esset, cum in phi-  
losophia multo etiam magis assidue, quàm antea, uer-  
saretur, & cum fidibus Pythagoreorum more utere-  
tur, cumq; ei libri noctes, & dies legerentur, quibus  
in studijs oculis non egebat: tamen, quod sine oculis  
fieri posse uix uidetur, geometriæ munus tuebatur, uer-  
bis præcipiens discantibus, unde, quò, quàmq; lineam scri-  
berent. Asclepiadem ferunt non ignobilem Eretricum  
philosophum, cum quidam quæreret quid ei cæcitas at-  
tulisset, respondisse, ut puero uno esset comitator. ut  
enim uel summa paupertas tolerabilis sit, si liceat,  
quod quibusdam Græcis, quotidie: sic cæcitas ferri fa-  
cile possit, si non desint subsidia ualeitudinem. Demo-  
critus luminibus amissis alba scilicet, & atra discerne-  
re non poterat: at uero bona, mala; æqua, iniqua;  
honestæ, turpia; utilia, inutilia; magna, parua pote-  
rat; & sine uarietate colorum licebat uiuere beate, sine  
motione rerum non licebat. atque his uir impediri animi  
etiam aciem aspectu oculorum arbitrabatur: & cum  
alii sepe, quod esset ante pedes, non uiderent, ille infi-  
nitatem omnem peregrinabatur, ut nulla in extremi-  
tate consisteret. traditum est etiam, Homerum cæcum  
fuisse. at eius picturam, non possum uidemus: quæ re-  
gio, quæ ora, qui locus Græciæ, quæ species formæ, quæ  
pugna, quæ acies, quod remigium, qui motus



T V S C. Q V A E S T.

hominum, qui ferarum non ita expictus est, ut, quæ ipse non uiderit, nos ut uideremus effecerit? quid ergo aut Homero ad delectationem animi, ac uoluptatem, aut cuiquam docto defuisse unquam arbitramur: aut, ni ita se res haberet, Anaxagoras, aut hic ipse Democritus agros, & patrimonia sua reliquissent, huic discendi, querendiq; diuinæ delectationi toto se animo dedidissent? itaque augurem Tyresia, quem sapientem fingunt poeta, nunquā inducunt deplorantem cæcitatem suam: at uero Polyphemum Homerum cū immanem, ferumq; finxisset, cum ariete etiam colloquentem facit, eiusq; laudare fortunas, quod, quā uellet, ingredi posset, et, quæ uellet, attingere. recte hic quidem: nihilo enim erat ipse Cyclops, quā aries ille, prudentior. In surditate uero quidnā est mali? erat surdaster M. Crassus: sed aliud molestius, quod male audiebat, etiā si, ut mihi uidebatur, iniuria. Epicurei nostri Græce fieri nesciunt, nec Græci Latine: ergo hi in illorum, & illi in horum sermone surdi: omnesq; id nos in ijs linguis, quas non intelligimus, quæ sunt innumerabiles, surdi profecto sumus. at uocem citharædi non audiūt: ne stridorem quidem serræ tum, cum acuitur; aut grunitum, cum iugulatur sus; nec, cum quiescere uolunt, fremitum murmurantis maris. & si cantus eos forte delectant, primum cogitare debent, antequam hi sint inuenti, multos beate uixisse sapientes: deinde multo maiorem percipi posse legendis his, quā audiendis uoluptatem. tum, ut paulo ante cacos ad aurium traducebamus uoluptatem, sic licet surdos ad oculorum: etenim qui secum loqui poterit, sermonem alio

terius

cerius  
idem o  
loribus  
runque  
ducti, u  
cur fere  
portus e  
num ni  
mortem  
cantha  
ne in tr  
multa  
pauca  
sta de  
est, ne  
dam pi  
lex, qu  
inquit,  
pariter  
uolent  
iurias  
quas  
& Hi  
tentia  
homo  
quide  
tami  
dem  
ciens  
nls



terius non requiret . congerantur in unum omnia, ut  
idem oculis, & auribus captus sit : prematur etiā do-  
loribus acerrimis corporis : qui primum per se ipsi ple-  
runque cōficiunt hominem : sin forte lōginitate pro-  
ducti, uehementius tamen torquent, quā ut causa sit  
cur ferantur; quid est tandē dī boni, quod laboremus?  
portus enim pręsto est, quoniam mors ibidem est, æter-  
num nihil sentienti receptaculū. Theodorus Lysimacho  
mortem minitanti, magnum uero, inquit, effecisti, si  
Cantharidis uim consecutus es. Paulus Persę deprecāti  
ne in triūpho duceretur, in tua id, inquit, potestate est.  
multa primo die, cum de ipsa morte quæreremus; non  
pauca etiā postero, cum ageretur de dolore, sunt di-  
cta de morte : quę qui recordetur, haud sanē periculū  
est, ne non mortem aut optandam, aut certe non timen-  
dam putet . mihi quidem in uita, seruāda uidetur illa  
lex, quę in Gręcorum conuiuīis obtinetur . aut bibat,  
inquit, aut abeat . et recte . aut enim fruatur aliquis  
pariter cum alijs uoluptate potandi, aut, ne sobrius in  
uiolentiam uiolentorum incidat, ante discedat: sic in  
iurias fortunę, quas ferre nequeas, defugiendo relin-  
quas . hæc eadem, quę Epicurus, totidem uerbis dicit  
& Hieronymus. quodd si ijs philosophis, quorum ea sen-  
tentia est, ut uirtus per se ipsa nihil ualeat, omne, quod  
honestum nos, & laudabile esse dicimus, id illi cassum  
quiddam, et inanis uocis sono decoratum esse dicant, et  
tamen semper beatum esse censent sapiētem : quid tan-  
dem a Socrate, & Platone, perfectisq; philosophis fa-  
ciendum putes? quorum alij tantam præstantiā in bo-  
nis animi esse dicunt, ut ab his corporis, & externa ob-



T V S C. Q V A E S T.

scirentur . alij autem hæc ne bona quidem ducunt, in  
animo reponunt omnia . quorum cōtrouersiam solebat  
tanquam honorarius arbiter iudicare Carneades: nam  
cum, quæcunque bona Peripateticis, eadem Stoicis com  
moda uiderentur ; neque tamen Peripatetici plus tri  
buerent diuitijs, bonæ ualitudini , ceterisq; rebus gene  
ris eiusdem, quàm Stoici, cum ea re, non uerbis pondera  
rentur : causam esse dissidendi negabat . quare hunc  
locum cæterarum disciplinarum philosophi quemadmo  
dum obtinere possint, ipsi uiderint . mihi tamen gratū  
est, quodd de sapientium perpetua bene uiuendi faculta  
te dignum quiddam philosophorum uoce profitentur .  
sed quoniam mane est eundum, has quinque dierum di  
sputationes memoria comprehendamus . equidem me  
etiam conscripturum arbitror: ubi enim melius uti pos  
sumus hoc, cuiusmodi est, otio ? ad Brutumq; nostrum  
hos libros alteros quinque mittemus : à quo non modo  
impulsi sumus ad philosophicas scriptiones , uerū etiam  
lacessiti . in quo quantum cæteris profuturi sumus, nō  
facile dixerimus: nostris quidem acerbissimis doloribus,  
uarijsq; , & undique circumfusus molestijs alia nulla  
potuit inueniri lenatio .

SCH

T

FII

potest .

P A

triam,

nij testi

locum

rone .

H C

et plas

ut glos

E F

nes, in

gressio

non, u

tibus

quati

cium

se in

om

nur

non



SCHOLIA PAULI MANVTII IN  
TVSCVLANAS QVAESTIO-  
NES CICERONIS.

Pagina 149.

FIERI autem potest ] Mallem, Ferri autem  
potest.

157:

PARTITAM illam, & auitam ] Recte pa-  
tritiam, non autem patriam, ut antea legebatur. id No-  
nij testimonio comprobatur, qui in uerbo patritia hunc  
locum recitat, & affert praeterea exemplum ex Var-  
rone.

159.

HOC est se ipsum posse cognoscere ] Frigidum,  
& planè supernuacaneum: itaque puto esse tollendum,  
ut glossam.

161.

ERRANTIVM stellarum cursus, progressio-  
nes, institutiones ] Ex duabus dictionibus, cursus, pro-  
gressiones, feci coniecturam, legendum esse, institutiones,  
non, ut antea, institutiones: ut similibus, & convenien-  
tibus utatur uerbis. sunt autem correctiones quaedam:  
quarum etsi ratio non explicatur, tamen, quibus iudi-  
cium est paulo subtilius, facile, cur factae sint, ipsi per  
se intelligunt. rudibus autem, & tardis, & ijs, qui sibi  
omnia minutatim concidi, omniaq; tanquam mansa à  
nutrice inseri in os uolunt, ego quidem, ut satisfaciam,  
non laboro.

oo ij



SCHOLIA IN TVSC. QVAEST.

163.

FONTES scatere, herbis prata conuestirier ]  
Hic, scatere, pronunciandū est media correpta, ut ana-  
pæstus fiat, scater' her. alioqui uersus claudicabit. sic &  
Lucretius libro V. Largifluū fontem scatere, atque erū-  
pere lumen. & infra in eodem libro, Et partim plano  
scatere, atque erumpere campo. Plautus etiam, opinor  
in Cassina, olere, protulit, media contracta: Non om-  
nes possunt olere unguenta exotica.

164.

NE QUID QVAM aliud est ] Nequidquā  
pro nihilo, non probo: non enim fert latini sermonis cō-  
suetudo. Nihil quidquā aliud est, habet Maffei liber:  
placet: sic enim locutus est Terentius in Adelphis,  
Nihil quidquam uidi latius. & Plautus in Merc.  
Nihil Charine te quidem quidquam pudet.

164:

E G O autem nunquam ita te in hoc sermone di-  
mittam ulla uti ratione, ut mors tibi uideri malū pos-  
sit. ] Neque sensus, neque locutio placet. quid enim si-  
bi uult, nūquam te in hoc sermone dimittā ulla uti ra-  
tione? quis uero unquam sic locutus est, nūquam te di-  
mittam ulla uti ratione? uerbum dimitto & latinum  
est, & ueteribus usitatum, neque eodem modo semper,  
sed uarie, cum infinito autem nunquam. itaque etsi ni-  
hil immutauī, ne facerem id, quod faciendum non est,  
ut mihi plus tribuerem, quā libris manuscriptis: ta-  
men non dubito, quin ita legendum, & distinguendū  
sit. Ego autem nunquam ita te in hoc sermone dimit-  
tam, ulla uti ratione mors tibi uideri malum possit.



Cum autem erroris originem quærerem, hanc reperi, quod particulā illam, uti, quæ hoc loco adiunctiua coniunctio est, lector opinatus infinitiui esse modum a uerbo utor, cum superiore membro coniunxit: & ut hoc imperite, ita illud impudenter, quod, ut, addidit de suo, ut aduerbium, ita, haberet quod referretur: cum, uti pro ut esse positum, non intelligeret.

164:

LABAMVS, mutamusq; sententiam clarioribus etiam in rebus: in his est enim aliqua obscuritas. Forte rectius hoc modo. Labamus, mutamusq; sententiā. clarioribus etiam in rebus inest aliqua obscuritas.

165:

MIGRARE. A. Spero, &c. ] Elegātius, si, notis literarum, quibus personæ significantur, inductis, continuata oratione ita legatur. Migrare: spero fore, ut contingat id nobis: sed fac, ut isti uolunt, animos non remanere post mortem: uideo nos, si ita sit, priuari spe beatioris uitæ: mali uero, &c.

166.

QVASI uero ista, uel quidquam ] Qui Viterbi Episcopus fuit, Petrus Crassus, uir bene doctus, & ingenio præstans, putabat esse legendum, Quasi uero ista uel quidquam. eamq; coniecturā in suo libro scripserat. quā ego uel dissentientibus libris manuscriptis ualde probō. error inde natus est, quod, uel pro uel, ueteres scribebant: de quo Politianus in Miscell. unde in librum de uniuersitate idem mendum irrepit pagina 198: ubi legendum est, uel cum eadem coniunxit, non, uel cum eadem coniunxit.

oo iij



SCHOLIA IN TVSC. QV AEST.

168:

OMNIA ista perinde ut cuique data sunt, pro rata parte aut longa, aut brevia dicuntur. ] Legebatur antea, pro rata parte à uita longa. nos sensum secuti, aut longa, correximus, adiuti non nihil à libro Maffei manuscripto, in quo legitur, aut ita: ex quo sum adductus, ut, dictione, ita, in alium locum translata, sic legem dū opinarer. omnia ista, perinde ut cuique data sunt, ita pro rata parte aut longa, aut brevia dicuntur.

170.

ET hoc quidem hoc modo: nihil autem melius aestimo. ] Ex antiquo libro Maffei legendum puto: Et hæc quidem hoc modo: nihil autem melius extremo: ut hoc totum non ex Socratis oratione sit, sed à Cicerone per interpositionem prolatum: nam neque in Platonis apologia hæc sunt, & dictio illa, inquit, quæ subsequitur, ideo uidetur esse illata, ut quasi interruptum superioris orationis filum contexeret.

170.

IN quos Symonides. ] In præpositio hic accipitur in bonam partem, pro in quorum laudem, ut de Oratore libro II. Multa in Castorem scripta, & Pollucem. et de natura deorum libro I. Catulus dilexit Roscium: in quem etiam illud est eius, Constiteram exorientē Auroram forte salutans, & quæ sequuntur. De senectute etiam, in quem, inquit illud elogium, unicum plurimæ consentiunt gentes populi primum fuisse uirum. His exemplis adducti sumus, ut, in quos, emendaremus, cum, in quo, antea legeretur.



171.

HAEC in errore uersentur ] Concinnius, Hic in errore uersetur .

173.

SOLENNES, & statum sacrificium ] Statum lego, non statutum, ut habent aliquot impressi libri. sic & in oratione de Arusp. resp. Statas solennesq; ceremonias. & Liuius lib. XL. Proficiscuntur ab Thessalonica Aeniam ad statum sacrificium. manauit autem latius hoc mendum, ut in ueterum libris saepe, pro statum, legatur statutum.

176.

REFELLERE sine pertinacia, et refelli sine iracundia ] Mallem sic, Refelli sine pertinacia, & refellere sine iracundia.

182.

AUT Philoetam ] Vel in cōiunctione, AUT, mendum inest, uel aliquid desideratur: itaque placet legere ut est in Maffei libro, Prometheum, aut Philoetam.

182.

LECTVLO, &c. ] Libro II. de Fin. sequentes uersus non ad Philoetam, sed ad saxum Lénium referuntur.

196.

NOLITE hospites adire ad me ilico istic ] Trochaicus est, in quem non cadit iambus: itaque non puto eos recte sentire, qui uerbis aliter collocatis ita legunt, Nolite hospites ad me adire ilico istic: nam in quarta sede iambus esset.

oo iij



196.

TANTA uis sceleris in corpore hæret ] Trochaicus imperfectus : pedem enim desiderat : quem restituere sine libris manuscriptis nefas est : Tanta uis sceleris meo in corpore hæret , legendum quandoque sum opinatus : quam opinionem nondum mihi uenit in mentem cur abijcerem : itaque eam protuli , hoc tamen animo ut , si quis contra dixerit , pugnare nolim . Versus in pedes ita diuidendum esset , Tanta=uis sce=leris meo in=corpo=r hæret .

204.

CADENTES ] Carætes , antea legebatur . itaq ; est in libris manuscriptis : mihi tamen uisum est ut emendarem , cadentes : ex Homeri uersu , in quo est , πίπτου=σιν : quod significat , cadunt . uersus autem hi , quos Cicerone uertit , sunt Iliados T .

207.

NIHIL mali ] Puto rectius , Nihil noui . nam si legas , Mali , ad Cleanthis rationem reuolueris . dixit etiã pagina 217 . Animo sic excubat sapiens , ut ei nihil improprium accidere possit , nihil inopinatum , nihil nouum .

214.

VT sunt alij ad alios morbos ] Imperfecta similitudo : nam ad particulam , ui , quæ respondeat , uox non est . forte ita corrigendum . Ut sunt alij ad alios morbos procliuiiores ; itaque dicimus grauedinosos quosdã , quosdam torminosos , non quia iam sint , sed quia sæpe ; sic alij ad metum .



ALITER ferat ] Opinor legendum esse, ferat:  
siquidem ad uocem, stultis, refertur.

ADVERSA ratione ] Maffei liber, Aversa à  
ratione. probo. nam etiam supra, 211: Zenoni, inquit,  
est diffinitio, ut perturbatio sit auersa à recta ratione  
contra naturam animi commotio. & 113: Omnium  
perturbationum fontem esse dicunt intemperantiam:  
quæ est à tota mente, & à recta ratione defectio, sic  
auersa à præscriptione rationis, ut nullo modo, &c.

IRA uero quanquam diu perturbat animum, du-  
bitationem insanie non habet ] Mendum est in uoce,  
quanquam. ueteres libri, quos ego uiderim, habent, quæ  
quam, deprauate omnino, si respicimus, dictio ira quod  
referatur. quodd si coniecturæ locus est, ita legerem: Ira  
uero, quàm diu perturbat animum, dubitationem insa-  
nie non habet.

AT NATURALIS EST. ] Obiectio:  
cui respondet quod sequitur; An quidquid esse potest se-  
cundum naturam, quod sit repugnante ratione? &  
est sententia, nisi fallor, multo concinnior, quàm si le-  
gas, ut antea, aut naturalis est? cum præcedenti mem-  
bro connectens. ut autem hunc locum una dempta lite-  
ra correximus, sic paulo post alium una immutata re-  
stituimus. nam ubi legebatur, priusquam esset ulla ulci-  
scendi libido, nos sensu meliore emendauimus, prius,  
quàm esset ulla, ulciscendi libido.



SCHOLIA IN TVSC. QVAEST.

242.

C V I rei refertur ] Concinnius, Cui referte

246.

F A C E R E non potuerunt? ] Iacet uerbum, facere, & planè otiosum hic est. lege sine eo: multo erit elegantius.

247.

Q V I D Q V I D obiectum est ] Aut, pro Quid = quid, legendum est, Quid: aut, Quiddid, hic accipien- dum pro Quidque: ut apud Lucretium libro II. inq; suos quiddid rursus reuocare meatus. & libro I I I I. Semper enim summum quiddid de rebus abundat. & libro V. sic unum quiddid paulatim protrahit ætas in medium. Possem ex oratoribus loca recitare: sed ego, in latinis locutionibus ubi quid eiusmodi occurrit, quod si- ne exemplorum comprobatione durius uideatur, liben- tius poetarum utor auctoritate, quàm oratorum: sunt enim poetæ certiores latinæ linguæ testes, propterea quòd metri ratio facit, ut mutationi non tam facile lo- cus sit: quod in oratoribus contra uidemus.

249.

A T enim non sine ignominia afficere poterit sa- pientem ] Locus recte stellula notatus: mendum enim subesse constat. forte ita restituit posset. At enim non erit sine ignominia. ignominia afficere poterit sapien- tem? de sapiente enim est hæc omnis oratio. senten- tia certe hæc uidetur esse: quibus autem uerbis expli- canda sit, statuere nostrum non est. studiosi libros antiquos adeant, & eorum ope utentes locum emen- dent.



PHILOSOPHIAE CIC.

250:

OMNES QVE id nos   Id, non uideo quid sse  
Elet. antiqui scribebant, It. inde mihi orta coniectu-  
ra est, ut, Item, legendum putarem.

F I N I S.

SERIES LITERARVM.

aa bb cc dd ee ff gg hh ii kk ll mm nn oo

Omnes quaterniones.

APVD ALDI FILIOS.


VENETIIS, M. D. XLVI.

005266375



































3. 50.